


कुल्लू रे लौके री तैँइयै लूकै  
लिखीदी यीशु री खुशखबरी



# Gospel of Luke

Kulluvi



*Published by :*


## **OPERATION AGAPE**

Agape Bhawan, B-XI-1995, Brown Road,  
Ludhiana, Punjab, India.

Ph : 0161-2610761, 5002024.

Email : [mail@operationagape.com](mailto:mail@operationagape.com).

Web : [www.operationagape.com](http://www.operationagape.com).



*For Christian resources in Kulluvi language, visit*  
[www.kulvi.in](http://www.kulvi.in)



## दूई शब्द

मुक्ति पाणै री तेंईयै आसा की केरना? पापा ना छुटकारा पाणै री तेंईयै की केरना? कौस विधियै आसै पापै री माफी पाई सका सी? भारत देश अलग-अलग धर्म-संस्कृति रा मँच सा। लिखणू आलै एई देशै री धौरती ना खडै होइया माहणू री सैभी ना बड़ी समस्या रा समाधान एसा कताबै रै ज़रियै दैसदें लागै सी। ऐ कताब सच्चाई रा पता लागै होर पापै रै बन्धना ना मुक्त होणै रा एकमात्र ज़रिया सा। यीशुऐ बोलू, “रस्ता, सच्चाई होर ज़िन्दगी हाँऊ सा, मूँ बगैर कोई परमेश्वरा हागँ नी जाई सकदा।” परमेश्वर तुसा सँधै झुरी केरा सा होर तुसरी ज़िन्दगी री तेंईयै परमेश्वरा हागँ एक नोखी योजना सा। यीशुऐ बोलू, “हाँऊ एथै री तक आऊ सा कि तुसै भरपूर ज़िन्दगी पालै।”

### एसा कताबै रै बारै ना ज़ाणकारी

लुकै लिखीदी परमेश्वरै री वाणी एकी ऐण्डै अवतारै रै बारै ना सा जुणी री वजहा ना माणहु रै बीचा ना होर सर्वशक्तिमान परमेश्वरै रै बीचा ना मेल मिलाप हुआ। ऐ अवतार यीशु रै रूपा ना हुआ। कि तुसै ऐ सचची कहाणी शुणी सा। सर्वशक्तिमान परमेश्वर एक माणहु रै रूपा ना ऐसा धौरती पँधै आए। तिनरै स्वभावा ना कोई पाप नीति आथी स पाप जुण आसा सैभी ना, सैभी ना पैहिलै मर्द होर बेटडी रै वंश होंगै री वज़ह सँधै आऊ। इनां पाप रहित परमेश्वरै रै बेटै रै बारै ना 4000 साल पैहिलै दैसूदा ती। तिनरै ऐसा धौरती पँधै अवतार लैणै री सचची वभिषयवाणी, तिनरै जन्म होंगै ना बोहु पैहिलै लिखीदी ती। यीशुऐ निषपाप ज़िन्दगी जीई। यीशुऐ परमेश्वरै री झुरी माणहु रै पापा बै माफ केरिया होर सैभी बिमारी बै ठीक केरिया रियाई। यीशुऐ आपणी निषपाप ज़िन्दगी जे ऐसा धौरती पँधै ती आसरै पापै री तेंईयै बलिदान केरी। ताकि दुजी बार परमेश्वर होर माणहु रै बीचा ना सबंध बैणू लोड़ी। परमेश्वरा रा मेमना तिन्हा सैभी री तेंईयै बलिदान हुआ जुणा तिन्हा पँधै बशाह केरा सी। लुकै लिखीदी परमेश्वरै री वाणी, यीशुबै ज़ाणनै री तेंईयै, शांति पाणै री तेंईयै होर मोक्ष पाणै री तेंईयै होर परमेश्वरा बै आपणै बापू रै रूपा ना पाणै री एक शुरुआत होइ सका सा।

### रूप रेखा

- 1 लुकै ऐ कताब किबै लिखी (1:1-4)
- 2 यहून्ना बपतिसमै देणू आलै होर यीशु रा जन्म (1:5-2:52)
- 3 यहून्ना बपतिस्मै री समाज सेवा (3:1-20)
- 4 यीशु रा बपतिस्मा होर जाँच (3:21-4:13)
- 5 गलीला ना यीशु री जनसेवा (4:14-9:50)

6 गलीला ना यरूशलेमै री यात्रा (9:51-19:27)

7 प्रभु यीशु रा यरूशलेमा ना आखरी हफ्ता (19:28-23:56)

8 प्रभु यीशु रा जिंदा होणा(24:1-12)

9 प्रभु यीशु रा लोका ना हेरिना होर स्वर्गा बै ज़ाणा (24:1-53)

**1** <sup>1</sup>आदरणीय थियुफिलुस जे घटना आसा बीचें घटी तिनरें बारें ना बोहू सारें लोकें लिखू सा । <sup>2</sup>जैण्डा कि आसाबै यीशु रें तिन्हा चेलें दैसू, ठीक तैण्डाए तिन्है लोकें लिखू सा। तिन्है चेलें ए गैला आपणी औछिये होंदी हेरी होर लोका बिचें ऐ शुभ संदेश प्रगट करू। <sup>3</sup>तिन्हा गेलें री में शुरू ना लेइया बडै ध्याना सेंधें जाँच केरी सा होर तिन्हा गैला बै तेरी तैँइयें बौढें लिखणा मुँबें शोभला भी लागा, <sup>4</sup>ताकि तू ज़ाणला कि जे शिक्षा तौभै धिनी सा सौहै सच सा।

### यहून्नै रें पैदा होणें री भविष्यवाणी

<sup>5</sup>जैबे हेरोदेस यहूदिया रा राजा ती तैबै अबियाह रें दला ना जकर्याह नां रा एक यहूदी पुजारी ती, तेइरी लाडी बी हारून पुजारी रें वंशै री ती होर तेसरा नां एलिसाबेथ ती। <sup>6</sup>ते दुयें परमेश्वरा सामनै धर्मी ती, होर प्रभु री सारी आज्ञा ता विधी पेंधें चला ती। <sup>7</sup>तिनरें कोई भी लुआद नी ती आँथी, किबैकि एलिसाबेथ बांडी ती होर ते दुयें बूढें ती।

<sup>8</sup>जकर्याह आपणें दलै री तरफा ना परमेश्वरा सामनै पुजारी रा कोम केरा ती। <sup>9</sup>पुजारी रीती रें मुताबिक जकर्याह रें नां री चिड्डी निकती कि स प्रभु रें मन्दिरा ना जाइया धूप पकाला। <sup>10</sup>जैबै जर्क्याह धूप पकांदा लागा दा ती ता लोकें री सारी मण्डली बाहरें प्रार्थना

केरदी लागी दी ती, <sup>11</sup>तैबे प्रभु रा एक स्वर्गदूत जकर्याह ना धूप पकेणें री वेदी रें दैहिणी धिरें खड़ा हेरूआ। <sup>12</sup>जकर्याह तेई स्वर्गदूत हेरिया बोहू डौरु होर कोमदा लागा। <sup>13</sup>पर स्वर्गदूतें जकर्याह बै बोलू, “हे जकर्याह डौरदा मत किबैकि तेरी प्रार्थना शुणी दी सा, होर तेरी लाडी एलिसाबेथा सेंधें तैरें एक बेटा पैदा होणा तू तेइरा नां यहून्ना रेखेई।” <sup>14</sup>तेइरी वज़ह ना तौभै बोहू खुशी होणी होर बोहू सारें लोका भी तेईरें पैदा होणें सेंधें खुश होणा। <sup>15</sup>तेई प्रभु सामनै महान् होणा, तेई दाखरस होर मदिरा कदी बी नी पीणी होर तेई आपणी आमै रें पेटा ना पवित्र आत्मै रें वशा ना होणा। <sup>16</sup>तेई बोहू सारें इस्राइली लोका तिन्हरें प्रभु परमेश्वरा धिराबै फेरनै। <sup>17</sup>होर तेई ऐलियाह साही आत्मा ना बडै सामर्थी होणा होर तेई प्रभु रें आगें ज़ाइया बापू तिन्हरें बचचें सेंधें मिलाणें होर परमेश्वरें री गैला नी मैनणू आएं बै ऐण्डी गैला दसला कि ते धर्मी साही वचार रखलें होर परमेश्वराबै मैनलें। ऐण्डै तैरहें तेई प्रभु री तैँइयें लोका तयार केरनै।

<sup>18</sup>जकर्याहै स्वर्गदूता ना पुछू, “हाँऊ कैण्डै ज़ाणी सका सा कि तेई ऐण्डा होणा? किबैकि हाँऊ बूढा सा, होर मेरी लाडी बी बूढी हुई सा।” <sup>19</sup>स्वर्गदूतें जकर्याह बै बोलू, “मेरा नां गब्रिएल सा होर हाँऊ परमेश्वरा सामनै खड़ा रौहा



स्वर्गदूत होर मरियम (1:28)

सा। हाँऊ तौभै इन्हा शोभली गैला दसणै री तेंइयै भेजू सा।” 20 शुण, जां ढोई ए गैला पूरी नी होली, त नैढै रौहणा, होर तेरै गैला नी केरिनी, किबैकि तें मेरी गैला रा बशाह नी केरू जो ठीक बौक्ता ना पूरी होणी ।

21 लोका जकर्याह बै निहाल्दै लागै ती, होर ते एसा गैला ना हैरान ती कि जकर्याह बै मन्दिरा ना एतरी देरी किबै होंदी लागी सा। 22 पर जैबै जकर्याह बाहरै आऊ ता तेइरै तिन्हा सेंधै गैला निस्सी केरूई होर स हाँथै लाईया इशारा केरा ती तैबै तिन्है लोकै ज्ञाणू कि जकर्याह बै मन्दिरा ना ज़रूर कोई दर्शन मिलू। 23 जैबै जकर्याह रै मन्दिरा ना सेवा केरनै रै ध्याडै पूरै हुऐ ता स आपणै घौरा बै नौठा। 24 इन्हा रोज़ा बाद जकर्याह री लाड़ी एलिसाबेथ सुजदी रौही होर पोंज म्हीनै तक आपू बै गज़िहाँदी रौही, 25 होर बोल्दी लागी, “प्रभुऐ मेरी तेंइयै ऐ केतरा शोभला कोम केरू सा। एई बौगतै तेइयै मूँ पेंधै केतरी दया केरी सा मेरै कोई लुआद नी ती आँथी, एसा बेइजती ना प्रभुऐ हाँऊ बचाई।”

## यीशु रै पैदा होणै री भविष्यवाणी

26 जैबै एलिसाबेथा बै छौऊआ म्हीना लागा ती तैबै परमेश्वरै गब्रिएल स्वर्गदूत गलीलै रै नासरत शैहरा बै एक कुंवारी हागगै भेजू। 27 तेसरी मंगणी युसुफ नां रै म्हणू सेंधै हुई ती जो दाऊदै रै वंशा रा ती। तेसा कुंवारी रा नां मरियम ती। 28 स्वर्गदूतै मरियमा हागगै भीतरै एजिया बोलू, “आन्नद होर जय तेरी हो, त पेंधै प्रभु रा अनुग्रह हुआ सा।” 29 पर एसा गल शुणिया मरियम डौरी होर सोचदी लागी कि स्वर्गदूतै री गैला रा की मतलव होई सका सा। 30 स्वर्गदूतै मरियमा बै बोलू, “हे; मरियम डौरदी मत, किबैकि त पेंधै परमेश्वरा रा अनुग्रह हुआ सा।” 31 शुण, त सुजदी रौहणा, तेरै एक शोहरू होणा होर तू तेई रा नां यीशू रखेई। 32 तेई महान् होणा, होर लोका तेईबै परम प्रधान परमेश्वरै रै बेटै बोलणा। प्रभु परमेश्वरा तेइबै तेइरै पूर्वज राजा दाऊदा साही राज़ केरने बै देणा। 33 तेई इस्राइली लोका पेंधै सदा राज़ केरना, होर तेइरा राज्य कदी खत्म नी होणा । 34 मरियमै स्वर्गदूता ना पूछू “ऐ कैण्डै होई सका सा? हाँऊ ता आज़ी कुंवारी सा।” 35 स्वर्गदूतै बोलू, “पवित्र आत्मा त पेंधै एणा होर परमेश्वरै री शक्ति त पेंधै छांऊ पाणी, तैबै स जे पैदा होणूआ सा स पवित्र होणा होर लोका तेइबै परमेश्वरै रै बेटै बोलणा।” 36 शुणा, तेरी रिश्तेदार एलिसाबेथै रै भी बुढापै ना बेटा होणुआ सा। लोका तेसाबै बांढी बोला ती, पर ऐ तेसरा सुजणै रा छौऊआ म्हीना लागा सा। 37 किबैकि परमेश्वरै री तेंइयै सैब किछु संभव सा



मरियम होर एलिसाबेथ (1:39)

। <sup>38</sup>मरियमै बोलू, “शुण, हाँऊ ता प्रभु री दासी (भक्त) सा, जेंढा तुसै बोलू तेंढा मूं सेंघे हुआ लोड़ी।” तेता ना बाद स्वर्गदूत मरियमा हागगै ना नौठा।

### मरियम एलिसाबेथा बै मिलदी ज़ा सा

<sup>39</sup> किछ़ रोज़ा बाद मरियम यहूदिया जिल्लै रै एकी पहाड़ी शैहरा बै एलिसाबेथा बै मिलदी नौठी । <sup>40</sup> होर तौखै ज़ाइया मरियमै जकर्याह रै घौरा ना तेई री लाड़ी इलिशिबा बै नमस्ते केरी। <sup>41</sup> ज़ाँ इलिशिबै मरियमै री नमस्तै शुणी ता बच्चा तेसरै पेटा ना पटीकू होर स पवित्र आत्मा ना भौरूई। <sup>42</sup> होर इलिशिबै ज़ोरा सेंघे बोलू, “तू सभी बेटड़ी मूंझै धन्य सा, होर तेरै पेटा रा शोहरू भी धन्य सा।” <sup>43</sup> मेरी तेंइयै ऐ केतरी इज्जती री गल सा कि मेरै प्रभु री आमा मुबै मिलदी मूं हागगै आई सा। <sup>44</sup> हेर, जां में तेरी नमस्तै शुणी ता शोहरू मेरै पेटा ना खुशी सेंघे पटीकू। <sup>45</sup> तू धन्य सा किबैकि तैं बशाह केरू कि परमेश्वरा ए गैला पूरी केरनी।

### मरियम परमेश्वरै री जय -जयकार केरा सा

<sup>46</sup> तैबै मरियमै बोलू,

“मेरी आत्मा परमेश्वरै री प्रशंसा  
(बड़ाई) केरा सा।”

<sup>47</sup> मेरी आत्मा मेरै उद्धार केरनू  
आयै ना खुश हुई।

<sup>48</sup> किबैकि तेइयै आपणी दीन-हीन  
दासी पैंधे कृपा-दृष्टि केरी,  
ऐबै ना लेइया जुगा-जुगा ढौई  
लोका मुंबै धन्य बोलणा।

<sup>49</sup> किबैकि सर्वशक्तिमान  
परमेश्वरै मेरी तेंइयै बड़ै-बड़ै  
कोम केरै सी। तेई रा नाँ  
पवित्र सा।

<sup>50</sup> जुणा परमेश्वरा ना डौरा सी,  
तिन्हरी पीढी- पीढी ढौई  
परमेश्वरै री दया बणी  
रौहणी।

<sup>51</sup> हेरा, जुणा आपणै आपू बै बड़ा  
होर ताकतवर बुझा ती, प्रभुयै  
ते कैण्डै तितर-बितर केरै।

<sup>52</sup> परमेश्वरै राजै राजगद्दी ना  
हटायै, होर दीन म्हणू गद्दी  
पैंधे बशायै।

<sup>53</sup> परमेश्वरै भूखै म्हणू शोभली  
चीज़ा सेंघे तृप्त केरै, होर  
सेठ म्हणू खाली हाँथ वापस  
भेजै।

<sup>54</sup> परमेश्वरै आपणै सेवक इसाइलै री  
मज़त केरी, कि स आपणी  
तेसा दया बै याद केरला ज़ो  
प्रभुयै तेई पैंधे केरी।

55 जे अब्राहम होर तेइरै वंशा पैंधै

सदा रोहणी, जैदा कि प्रभुयै

आसरै बुजुर्गा बै बोलू सा।

56 मरियम लगभग त्रा म्हीनै ढौई

इलिशिबा सेंधै रोही होर तेता ना बाद

आपणै घौरा बै वापस नौठी।

### यूहन्ना बपतिस्मै देणू आयै रा जन्म

57 तैबै इलिशिबै रै सुजणै रै ध्याइँ पूरै  
हुऐ होर तेसै एकी बेटै बै जन्म धिना।

58 जैबै तेसरै पड़ोसियै होर रिशतैदारै शुणू

कि प्रभुऐ तेसा पैंधै केतरी दया केरी

सा तैबै तिन्है तेसा सेंधै खुशी मनाइ।

59 जैबै शोहरू औठ रोज़ा रा हुआ, तैबै ते

तेइरा खतना केरदै आए होर तेइरा नां

तेइरै बापू रै नां पैंधै जकरयाह रखणा

चाहा ती। 60 परन्तु इलिशिबै बोलू, “नैई

एईरा नां यूहन्ना रखणा।” 61 तिन्है लोकै

इलिशिबा बै बोलू, तैरै रिशतैदारा मूँझै

कौसी रा एण्डा नां नी आँथी। 62 तैबै

तिन्है शोहरू रै बापू ना इशारै सेंधै पुछू,

“कि तू एई शोहरू रा की नां रखणा

चाहा सा?” 63 तेइयै लिखणै री पौटी

मँगई होर तेता पैंधै लिखू, “एईरा नां

यूहन्ना सा।” तैबै सैभीबै बोहु हैरानी हुई।

64 तैबै एकदम जकर्याह रा मुंह होर जिभ

खुली हुआ होर स गैला केरदा लागा

होर परमेश्वरा रा धन्यवाद केरदा लागा।

65 तेइरै औरै-पौरै रोहणू आयै बै बड़ी डौर

पौई होर एसा गल्लै री खबर यहूदिया रै

सारै पहाड़ी देशा ना फैली। 66 सब शुणनु

आयै आपणै-आपणै मना ना वचार केरदै

लागै कि एई शोहरू कैण्डे होणा होला।

किबैकि प्रभु रा अनुग्रह एई पैंधै सा।

### जकर्याह प्रभु री स्तूति केरा सा

67 तेई शोहरू रा बापू जकर्याह पवित्र

आत्मा ना भौरुआ होर भविष्यवाणी

केरदा लागा; 68 इस्राइला रा प्रभु परमेश्वर

धन्य सा, किबैकि तेइयै आपणै लोका

पैंधै कृपा दृष्टि केरी होर तिनरा छुटकारा

केरू सा।

69 होर आपणै सेवक दाऊदै रै वंशा

ना, आसरी तैइयै एक महान्

मुक्ति देणू आला भेजू सा।

70 ज़ेण्डा कि परमेश्वरै आपणै

पराणै बौकतै रै पवित्र,

भविष्यवक्तै रै द्वारा बोलू

ती।

71 परमेश्वरै आसरै सब शत्रू होर,

बेइरी रै हौथा ना आसरा

उद्धार केरू सा।

72 परमेश्वरै आपणी प्रतिज्ञा ज़ो

आसरै बुजुर्गा सेंधै केरी ती,

तेसा याद केरिया आपणै

लोका पैंधै दया केरी।

73 सौहै शपथ परमेश्वरै आसरै बापू

अब्राहमा सेंधै खाई ती।

74 परमेश्वरा आसै शत्रू रै हौथा

ना छुणाणै ताकि, आसै नडौरै

होइया परमेश्वरै री सेवा केरी

सकलै।

75 ताकि आसै पवित्रता होर धार्मिकता

सेंधै, ज़िंदगी भर परमेश्वरै री

सेवा केरलै।

76 हे बालक त परम प्रधान

परमेश्वरै रा भविष्यवक्ता

कहलाइणा किबैकि त प्रभु

ना आगै-आगै चैलदै प्रभु री

तैइयै बौत तयार केरनी।





यीशु रा जन्म (2:7)



स्वर्गदूत फुआला बै दर्शन देआ सा (2:9)

77 त लोका बै ऐ दसणा कि, पापे री माफी सेंधे कैण्डे मुक्ति पाई सका सी।

78 परमेश्वरै री अपार कृपा सेंधे, स्वर्गा ना आसा पैधे ज्योति चमकणी।

79 ताकि ऐ ज्योति न्याहरै होर मोऊती री छाया ना बेठे दै लोका तक पुजली होर, आसा बै शांती री बौते ओंढणे ना मार्गदर्शन केरली

80 बालक यूहन्ना बड़ा होंदा रौहू होर आत्मिक शक्ति ना बढ़दा रौहू। बड़े होणे ना बाद जां तक तेइयै इसाइली लोका मुंझै आपणी सेवा शुरु नी केरी तां तक स सुसान जैगहा ना रौहू।

## प्रभु यीशू रा जन्म


(मती 1.18-25)

2<sup>1</sup> तिन्हा ध्याइ ना रोमी सम्राट अगेस्तुस राजे रोमी देशे रे सभी लोकै रे नाँ दर्ज केरने रा हुकुम धिना।  
2<sup>2</sup> ऐ पहिली नाँ लिखाई तेई बाँकतै हुई जैबे क्विरिनियुस सीरिया देशा रा राज्यपाल ती।<sup>3</sup> सबे लोका राजे रे हुकुमे रे मुताबिक आपणा-आपणा नाँ दर्ज केरने री तेंइये तिन्हा शैहरा बै नाँठे जौखे तिनरे बजुर्ग रौहा ती।

4 तैबे युसुफ भी जो दाऊदे रे वंशा रा ती, आपणी मंगेतरा सेंधे गलीलै ज़िल्लै रे नासरत शैहरा ना यहुदिया ज़िल्लै रे बैतलहम शैहरा बै नाँ दर्ज केरदा नाँठा।<sup>5</sup> स आपणी मंगेतर मरियमा सेंधे नाँठा जो ऐबे सुज्जदी ती।<sup>6</sup> तिनरे तौखे रौहदै-रौहदै मरियमे रे शोहरू ज़ोणने रे ध्याइ पूरे हुऐ।<sup>7</sup> होर तेसे आपणे पैहले बेटे बे जन्म धिना होर स फालडू न लपेटिया खुरली भीतर रखू। किबैकि सराय न तिनरी तेंइयै ज़ैगा नी ती आँथी।

## स्वर्गदूत फुआला बै शोभली खबर दैसा सा

8 तेई ज़िल्लै ना किछ फुआल तेसा राती ना छेता ना आपणे भेडे रे छुँडे री पौहरैदारी करदे लागे ती।<sup>9</sup> तैबे एकदम प्रभु रा एक दूत तिन्हा सामने प्रकट हुआ होर प्रभु री महिमा रा प्याशा तिन्हरै चोहु पासै चमकू होर ते फुआल बोहू डौरे।<sup>10</sup> पर स्वर्गदूते फुआला बै बोलू, “डौरदे मता शुणा मूं तुसाबे बड़ी खुशी री गल दसणी जो सभी लोकै री तेंइये होणी।”<sup>11</sup> औज दाऊदे रे शैहर बैतलैहमा



फुआल यीशु रा दर्शन केरा सी (2:16)

ना तुसरी तेंडयै एक मुक्ति देणुआ पैदा हुआ सा होर ऐ मसीह प्रभु सा। <sup>12</sup>तुसरी तेंडयै तेतै री ऐ पछियाण सा कि तुसा एक शोहरू फालडू न लपेटुआदा खुरली भीतरै हेरना।

<sup>13</sup>तैबै एकदम तेई स्वर्गदूता सेंधे बोहु सारै स्वर्गदूतै री मन्डली परमेश्वरै री स्तुति केरदी होर ऐण्डी बोलदी हेरूई, <sup>14</sup>“सर्गा ना परमेश्वरै री महिमा होर धौरती पेंधे तिन्हा माण्हू ना शाँती लोड़ी हुई, जौसा ना परमेश्वर खुश होआ सा।”

<sup>15</sup>जैबै स्वर्गदूत तिन्हा हागै ना स्वर्गा बै नौठे ता ते फुआल आपू ना दुणुयै कि “एजा आसा बैतलहम बै जाइया घैटीदी ऐ गैला हेरनी, जे प्रभुऐ आसबै दैसीदी सा।” <sup>16</sup>तिन्है फुआलै छेका जाइया मरियम, युसुफ होर खुरली ना रेखूदा स शोहरू हेरू। <sup>17</sup>इन्हा हेरिया फुआलै जो गैला तेई शोहरू रै बारै ना स्वर्गदूतै तिन्हाबै दैसी ती स प्रकट केरी। <sup>18</sup>फुआलै री इन्हा गैला शुणीया सैभी शुणनु आयै बै बड़ी हैरानी हुई। <sup>19</sup>पर मरियमै ए सारी गैला आपणै मना ना रेखी होर तिन्हरै बारै ना सोचदी रौही। <sup>20</sup>फुआलै जेकिछ शुणू होर हेरू तेतै री तेंडयै पमेश्वरै री जय-जयकार केरदै

वापस नौठे। किबैक स्वर्गदूतै तिन्हाबै जैण्डा बोलू ती सबकिछ तैण्डाए हुआ।

### यीशू रा नाँ रखणा

<sup>21</sup>जैबै शोहरू औठ रोज़ा रा हुआ तैबै पुजारिए तेइरा खतना केरू होर तेइरा नाँ यीशु रखू। ऐ नाँ स्वर्गदूतै यीशु रै पैदा होणे ना पैहलै दैसू ती। <sup>22</sup>जैबै मूसै री विधि रै मुताबिक मरियम होर युसुफै रै चोखै होणे रै ध्याइ पूरे हुऐ ता तिन्है यीशु यरूशलेमै रै मन्दिरा बै परमेश्वरा सामनै अर्पित केरनै री तेंडयै आणू। <sup>23</sup>जैण्डा कि विधि री कताबा ना लिखू सा, “हरेक जेठा शोहरू प्रभु री तेंडयै चोखै ठहरना।” तिन्है तैण्डाए केरू। <sup>24</sup>होर प्रभु री विधि ना लिखू सा: “कबूतरै रै दूई बच्चै या तिन्हा साही दूई चिड़ू री बौई चढ़ा।” एतै रै मुताबिक मरियम होर युसुफ भी बौई चढ़ादै नौठे।

### शमौनै री भविष्यवाणी

<sup>25</sup>यरूशलेमा ना शमौन नां रा एक माण्हू रौहा ती। स धर्मी होर बड़ा भक्त ती। तेई आन्दरै पवित्र आत्मा ती। स तेइ बौक्तै री राह हेरदा लागा ती कि जैबै इस्राइलै रै लोका बै तसल्ली देणू आ मसीहा एणा। <sup>26</sup>पवित्र आत्मै तेइवै दसू ती कि जैबै तक स परमेश्वरै भेजे दै मसीहा बै नी हेरला तैबै तक तैई नी मौरना। <sup>27</sup>पवित्र आत्मै रै बोलणै सेंधे स मन्दिरा बै आऊ होर तेई ध्याइ ना मरियम होर युसुफै नियमा ना दैसीदी विधि बै पूरा केरनै री तेंडयै यीशु मन्दिरा बै आणू। <sup>28</sup>तैबै शमौनै यीशु फाड़ै ना चैकू होर परमेश्वरै री स्तुति केरिया बोलू ।

29 "हे प्रभु, आपणें वायदें रें मुताबिक, आपणें एई भक्ता बै शाँति सेंधें मौरनै दैआ।"

30 किबैकी मेरी इना औछीयें ऐबै तें भेजू दा मुक्तिदाता हेरु सा।

31 ज़ो कि तें सैभी लोकें रें सामनै त्यार केरु सा।

32 स एक ज्योति ज़ेही होंगी होर जे यहूदी नी आथी तिन्हा पेंधें तेरी इच्छा प्रकट केरनी, होर तेरें इस्राइलें रें लोकें री तेंइयें महिमा रा कारण होणा।

33 शमौन यीशू रें बारें ना ज़े किछ बोलदा लागा ती तेई शुणिया मरियम होर युसुफ हैरान हुऐ। 34 शमौनै तिन्हा बै आर्शीवाद धिना हो शोहरु री आमा मरियमा बै बोल्, "हेर परमेश्वरें ऐ निश्चय केरु सा कि एई शोहरु री वजहा ना बोहू सारें इस्राइली लोका परमेश्वरा ना दूर होणें होर दुजें लोका परमेश्वरा धिराबै फिरना होर बोहू सारें लोका तेइरा विरोध केरना।" 35 तैबै बोहू सारें लोकें रें दिला आन्दरें ज़े विचार सी ते प्रकट होणै। ज़े व्यवहार लोका तेई सेंधें केरना तेतें री वजहा ना तौभै बड़ा भारी दुःख हौणा

**हन्ना नाँ री बेटड़ी भविष्यवाणी केरा सा**

36 भविष्यवाणी केरनू आई बेटड़ी हन्ना बी तेई बौक्तै मन्दिरा ना ती। स अशरें रें गोत्रा ना ती। तेसरें बापू रा ना फनुएल ती होर स बूढी ती। स विधवा ती किबैकि ब्याह रें सौत बौर्षा बाद तेसरा लाड़ा मुँआ ती। 37 तेसरी

उम्र चरासी बौर्ष ती होर स आज़ी बी विधवा ती। स मन्दिरा बै छौड़िया कोइंछै नीती जाँदी। स रात ध्याइ व्रत रखिया मन्दिरा ना परमेश्वरें री भक्ति केरा ती। 38 ज़ोस बौक्तै शमौन मरियम होर युसुफा सेंधें गैला केरदा लागा ती, हन्ना बी तेई बौक्तै तौखें पुजी होर परमेश्वरें रा धन्यवाद केरदी लागी। तेसै एज़िया यीशू रें बारें ना तिन्हा सैभि बै दैसू ज़ो यरुशलेमा बै छड़ाणू आयें राज़ें रा इंतज़ार केरदें लागें ती।

39 धर्म विधि रें सारें कोम-काज़ निबटाया युसुफ होर मरियम आपणें शैहर नासरता बै वापस नाँठे। 40 बालक यीशू परमेश्वरें री दया सेंधें शरीर होर बुद्धि ना बढदा रौहू किबैकि परमेश्वरा रा अनुग्रह तेई सेंधें ती।

**प्रभु यीशू मन्दिरा ना रूका सी**

41 यीशू रें आमा-बापू हर साल फसहा री जाच मनाँदें यरुशलेमा बै जा ती। 42 यीशू ज़ैबै बारा बौर्षा रा हुआ ता ते आपणी रीति रें मुताबिक फसह री जाच मनाँणें री तेंइयें यरुशलेमा बै नाँठे। 43 जाच खत्म होइया ज़ैबै यीशू रें आमा-बापू वापस नासरता बै आयें ता यीशू यरुशलेमा ना रूकू, पर यीशू रें आमा-बापू एसा ग़ल नी ति ज़ाणदे। 44 यीशू रें आमा-बापुयें ऐ सोचू कि यीशू होरी म्हणू सेंधें होला। सोनकें ढाँई ज़ैबै यीशू तिन्हा ना नी हेरुआ ता ते आपणें सेंधो होर रिश्तैदारा ज़ाँदरें यीशू बै तोपदें लागै। 45 ज़ैबै यीशू तिन्हा बै नी मिलू ता ते तेईबै तोपदें-तोपदें यरुशलेमा बै वापस आयें। 46 तिन्हा बै यीशू त्रा रोज़ा बाद

मन्दिरा ना धर्मगुरु री गैला शुणदा होर तिन्हा सेंधें स्वाल केरदा मिल्लू। <sup>47</sup> जेतरे बी म्हणुयै यीशू री गैला शुणी ते तेइरी री समझदारी होर स्वालें रै जवाब देणें रै तरीकें हेरिया हैरान ती कि ऐ एतरी समझदारी री गैला कौखेना केरा सा। <sup>48</sup> यीशू रै आमा-बापूयै जैबे स हेरू ता ते हैरान हुऐ। तेइरी आमा मरियमै यीशू बै बोल्लू, “बेटैया, तें आसा सेंधें ऐण्डा किबे केरू? तेरा बापू ता हाँऊ तौंभे तोपदैं-तोपदैं केतरें परैशान ती।” <sup>49</sup> तैबे यीशुऐ तिन्हा बै बोल्लू, तुसैं मुंबे किबे तोपा सी, कि तुसैं नी ज्ञाणदैं कि मुंबे आपणें बापू रै घौरा ना होणा चाहिए? <sup>50</sup> पर जे गल यीशुऐ तिन्हा बै बोली स गल तिन्है नी सोमझी। <sup>51</sup> तैबे ना बाद यीशू आपणें आमा-बापू सेंधें नासरता बै वापस नौठा होर आपणें आमा-बापू री गल मनदा रौहू। पर तेइरी आमै ए सारी गैला दिला ना डाही। <sup>52</sup> यीशू बुद्धि होर शरीरा ना बढदा रौहू। यीशू परमेश्वरा रा प्यारा ती होर लोका रा भी।

**यहून्ना मसीहै री तेंइयै बौत त्यार केरा सा**

(मती 3:1-12, मरकुस 1:1-8, यहून्ना 1:19-28)

**3** <sup>1</sup> तिबिरियुस राजें रै राजपाठें रै पँधुऐ बौर्षा ना जैबे पुँतियुस पिलातुस यहुदिया जिल्लै रा राज्यपाल ती होर हेरोदेस अनतिपास गलील जिल्लै ना राज्य केरदा लागा ती, होर तेइरा


भाई फिलिपुस इतुरैया होर त्रखोनितिस जिल्लै पैन्धै राज्य केरदा लागा ती, होर लिसानियास अबिलेनै जिल्लै ना राज्य केरदा लागा दा ती। <sup>2</sup> जैबे हन्ना होर कैफा यरूशलेमा ना माहापुजारी ती, तेई बौकतें परमेश्वर रा वचन बोणा ना जकर्याह रै बेटै यहून्ना हागगै पुजू। <sup>3</sup> तैबे यहून्ना यरदन नौइ रै औरलै-पौरलै सारै लाकें ना जाइया ऐण्डा प्रचार केरदा लागा कि पापें री माफी पाणें री तेंइयें लोका रा आपणें पाप छोड़िया बपतिस्मा लेणा जरूरी सा। <sup>4</sup> यशायाह भविष्यवक्तै आपणी कताबा ना यहून्नै रै बारें ना ऐ लिखू सा :

सुनसान जैगा ना एक पुकारनू आलै री अवाज शुणिदी लागी सा, प्रभु री तेंइऐ बौत त्यार केरात्, तेइरी सइका सीधी बणात।

<sup>5</sup> हरेक घाटी भौरुई लोडी, होर सैबे ढौंग ता धारा निशटी केरिनी, होर जे डैंगा सा स सिधा केरिना होर जे उथड़ा-निष्ठा सा स बराबर केरुआ लोडी।

<sup>6</sup> होर परमेश्वरा लोका कैण्डै बचाणें स सैभि महणू हेरना।

<sup>7</sup> जे लोकें री भीड़ यहून्ना हागगै बपतिस्मै लेंदी एजा ती, तिन्हा बै स बोला ती “ओ जहरीलै किडै साही लोको, परमेश्वरें री एणु आई दण्डा ना बघणें



यहून्ना बपतिस्मा देआ सा (3:7)

री तेंडयें तुसाबै कुणिये चिताउणी धिनी? 8 शोभलै कोम केरिया रिहात् कि तुसे पाप केरना छौडू सा, होर आपणै मना ना एण्डा मता सोचदैं कि आसरा किछ नी होणा, किबैकि आसै अब्राहमै री सन्तान सी। हाँऊ तुसाबै बोला सा, परमेश्वर इना पाथरा ना भी अब्राहमै री तेंडये सन्तान पैदा केरी सका सा। 9 'कराहडा ऐबै बूटै रै ज़लाडै पैधै रैखू सा। हर एक स बूटा जुणी ना शोभलै फ़ौल नी लागदैं स काटिया औगी ना पाणा।' 10 तैबै लोकै यहून्ना ना पुछू; "परमेश्वरै रै दण्डा बचणै री तेंडयें आसा की केरना?" 11 यहून्नै तिन्हा बै बोलू, "जुणी हागगै दुई कुरतै सी ता एक स तेई माहणू बै देला जूणि हागगै नी आँथी होर जुणि हागगै खाणै बै सा स तिन्हा सेंधे बौडला जुणी हागगै नी आँथी।" 12 किछ चुँगी लेणु आलै भी बपतिसमै लेन्दै आए होर तिन्है यहून्ना ना पुछू, "हे गुरु जी आसा की केरना?" 13 यहून्नै तिन्हा बै बोलू, "जेतरी चुँगी सरकारै ठहराई दी सा तेथा न जादा मता लेंदैं।" 14 तैबै किछ सपाही भी बोलदैं लागै, "आसै की केराऊँ?" यहून्नै तिन्हा बै बोलू, "तुसे कौसी सेंधे देबुए देणै री तेंडयें ज़बरदस्ती मता केरदैं

होर कौसी पैधे झूठा दोष मता लांदैं। आपणी कमाई ना खुश रोहात्। 15 ज़ैबै सैभे लोका मसीह री आश लाइया बेठै दैं ती होर सैभे आपणै-आपणै मना ना यहून्नै रै बारै ना वचार केरदैं लागै दैं ती कि ऐ मसीह ता नी। 16 तैबै यहून्नै तिन्हा सैभी बै बोलू, "हाँऊ ता तुसा बै पाणियै लाइया बपतिस्मा देआ सा पर स छेकै एणु आला सा जे मूं ना शक्तिशाली सा। हाँऊ ता एस लायक बी नी आँथी कि तेइरै बूटै रै तस्मै खोलनू। तेई तुसाबै पवित्र आत्मा होर औगी सेंधे बपतिस्मा देणा। 17 तेइरा शूप तेइरै हौथा ना सा। तेई आपणा खौह शोभली तैरहै साफ केरना। तेई गेहूं भूजा ना आँगी केरिया आपणी कोठड़ी ना डाहणै होर भूज नैई हिशणु आई औगी ना फुकणा। 18 यहून्ना एण्डै तैरहै बोहू सारी शिक्षा देईया लोका बै सुसमाचार शुणादा रोहू। 19 पर ज़ैबै यहून्नै हेरोदेस राज़े बै तेइरै भाई फिलिप्पुसै री लाड़ी सेंघलै बुरे कोमै रै बारै ना झिडकू, 20 ता हेरोदेसै राज़े यहून्ना बै जेला ना पाइया एथा ना बी बुरा कोम केरू।

**यहून्ना प्रभु यीशू बै बपतिस्मा देआ सा**

(मती 3:13-17, मरकुस 1:9-11)

21 पर यहून्नै रै जेल होणै ना पैहलै एक रोज़ ज़ैबै बोहू लोकै बपतिस्मा लेऊ ता यीशुए बी बपतिस्मा लेऊ। ज़ैबै यीशु प्रार्थना केरदा लागा तैबै सर्ग खुलू। 22 तैबै ना बाद पवित्र आत्मा कबूतरै रै शरीरै रै रूपा ना यीशु पैधे उतरी होर सर्गा ना परमेश्वरै यीशु बै बोलू: "तू मेरा प्यारा बेटा सा। हाँऊ त ना खुश सा।"

## यीशु री वंशावली

(मती 1: 1-11)

23 ज़ैबे यीशुए लोका मौंझै आपणी सेवा केरनी शुरू केरी, तैबै ते लगभग तीह बौर्षे रे ती। लोका यीशु बै युसुफा रा बेटा समझा ती। युसूफ एली रा बेटा ती। 24 एली मताता रा बेटा ती। मतात लेवी रा बेटा ती, लेवी मलकी रा बेटा ती, मलकी यन्ना रा बेटा ती, होर यन्ना युसुफा रा बेटा ती। 25 युसुफ मत्तित्याह रा बेटा ती। मत्तित्याह आमोसा रा बेटा, आमोस नहूमा रा बेटा ती। नहूम असल्याह रा बेटा होर असल्याह नोगहा रा बेटा ती। 26 नोगह माता रा बेटा ती, मात मत्तित्याह रा बेटा ती, मत्तित्याह शिमी रा बेटा, शिमि योसेखा रा बेटा होर योसेख योदाह रा बेटा ती। 27 योदाह योनाना रा बेटा ती, योनान रेसा रा बेटा, रेसा जरूब्बाबिला रा बेटा ती। जरूब्बाबिल शालतियेला रा बेटा होर शालतियेल नेरी रा बेटा ती। 28 नेरी मलकी रा बेटा ती। मलकी अद्दी रा बेटा ती, अद्दी कोसामा रा बेटा ती। कोसाम इलमोदामा रा बेटा होर इलमोदाम एरा रा बेटा ती। 29 एर यहोशु रा बेटा ती। यहोशु इलाज़ारा रा बेटा, इलाज़ार योरीमा रा बेटा ती। योरीम मताता रा बेटा होर मतात लेवी रा बेटा ती। 30 लेवी शमौना रा बेटा ती। शमौन यहुदाह रा बेटा, यहुदाह युसूफा रा बेटा ती। युसूफ योनाना रा बेटा होर योनान इलियाकीमा रा बेटा ती। 31 इलियाकीम मलेआह रा बेटा ती। मलेआह मिन्नाह रा बेटा, मिन्नाह मतता रा बेटा ती। मतता नाताना रा बेटा होर नातान दाऊदा रा

बेटा ती। 32 दाऊद यिशै रा बेटा ती। यिशै ओबेदा रा बेटा, ओबेद बोआज़ा रा बेटा ती। बोआज़ा सलमोना रा होर सलमोन नहशोना रा बेटा ती। 33 नहशोन अम्मीनादाबा रा बेटा ती। अम्मीनादाब आदमीना रा बेटा, होर आदमीन अरनी रा, अरनी हिस्मोना रा बेटा ती। हिस्मोन फिरिसा रा बेटा होर फिरिस यहुदाह रा बेटा ती। 34 यहुदाह याकूबा रा बेटा ती। याकूब इसहाका रा बेटा ती, इसहाक अब्राहमा रा बेटा ती। अब्राहम तिरह रा बेटा ती होर तिरह नाहोरा रा बेटा ती। 35 नाहोर सरूगा रा बेटा ती। सरूग रऊ रा बेटा, रऊ फिलिगा रा बेटा ती। फिलिग एबिरा रा बेटा ती होर एबिर शिलह रा बेटा ती। 36 शिलह केनाना रा बेटा ती। केनान अरफक्षदा रा बेटा ती, अरफक्षद शेम रा बेटा ती। शेम नूहा रा बेटा होर नूह लिमिक रा बेटा ती। 37 लिमिक मथूशिलह रा बेटा ती। मथूशिलह हनोका रा बेटा ती, हनोक यिरिदा रा बेटा ती। यिरिद महललेला रा बेटा होर महललेल केनाना रा बेटा ती। 38 केनान एनोशा रा बेटा ती। एनोश शेता रा बेटा ती, शेत आदमा रा बेटा होर आदम परमेश्वरै बणाऊ ती।

## यीशु री परीक्षा

(मती 4:1-11; मरकुस 1:12-13)

**4** 1 यीशु पवित्र-आत्मा ना भौरूड्या यरदन नौई ना वापस आऐ होर पवित्र आत्मै यीशु एकाँत जैग्हा ना घुमाऊ। 2 तौखै शैतानै चाही रोज़ा तक यीशु री जाँच केरदा रौहू। इन्हा रोज़ा ना यीशुए किछ नी खाऊ। ज़ैबै ए ध्याइँ पूरै हुऐ ता यीशु बै भूख लागी। 3 तैबै

शैताने यीशु बै बोलू, “अगर तू परमेश्वरा रा बेटा सा ता इन्हा पाथरा बै रोटी बैणनै बै बोल।” 4 पर यीशुए शैताना बै बोलू, “पवित्र शास्त्रा ना ऐ लिखू सा माणहु रोटिए लाइया केल्ली जिंदै नी रोहणा।” 5 तैबै शैताने यीशु उथड़ी ज़ेगा बै नेपे होर एकसी घड़ी ना दुनिये रै सारै देशे रै राज-पाठ रिहाए। 6 तेता ना बाद शैताने यीशु बै बोलू, “मूँ इना राज्ये री महिमा रा हक तौभै देणा। किबैकि ऐ सब किछ मेरा सा। हाँऊ जुणी बै देणा चाहा सा तेइबै देई सका सा।” 7 अगर तू मुबै प्रणाम केरला ता, मूँ इन्हा सैभी राज पाठा रा हक तौभै देणा। 8 यीशुए शैताना बै जवाब धिना, “पवित्र शास्त्रा ना ऐ लिखू सा तू सिर्फ आपणै प्रभु परमेश्वरा बै जे महाराज केर होर तेईरी सेवा केर।” 9 तैबै शैताने यीशु मन्दिरै री सैभी ना उथड़ी ज़ेगा पैधे नेपे होर बोलू, “अगर तू परमेश्वरा रा बेटा सा ता आपू बै औखना ढौंगे शेट।” 10 “किबैकि पवित्र शास्त्र बाइबला ना ऐ लिखू सा, 'परमेश्वरा आपणै स्वर्गदूता बै आज्ञा देणी ताकि ते तौभै बचालै।” 11 होर तिन्हा तू आपणै हौथा ना चेकणा ताकि तेरी जोंघा ना पाथरै लाइया ठोकर नी लागी लोड़ी। 12 यीशुए शैताना बै जवाब धिना, “पवित्र शास्त्रा ना ऐ बी बोलुआ सा “तू आपणै प्रभु परमेश्वरै री परख हेरेई केरदा।” 13 जेबै शैताने हर तरहा ना यीशु री जाँच केरी ता शोभला मौका मिलणै तक शैतान किछ बौक्तै री तेंइयै यीशु हागगै ना भैगू।

### यीशुए सेवै रै कोम शुरू केरै

(मती 4:12-17; मरकुस 1:14-15)

14 तैबै यीशु आत्मा ना भौरुइया गलील जिल्लै बै वापस आए होर जे किछ यीशु केरा ती तेतै री खबर बोणै री औगी साही सारै जिल्लै ना फैली। 15 यीशु यहूदी धर्म सभा ना उपदेश देआ ती होर सब लोका यीशु री सराहणा केरा ती।

### लोका नासरता ना यीशु रा अनादर केरा सी

(मती 13:53-58; मरकुस 6:1-6)

16 एथा ना बाद यीशु नासरता बै आए जौखै ते ओछे ना बडै हुए ती होर आपणै रीति-रिवाजे रै मुताबिक रामै रै ध्याइै ना सभा घौरा ना जाइया वचन पौढ़नै री तेंइयै खडै हुए। 17 तैबै यीशु हागगै यशायाह भविष्यवक्तै री कताब पौढ़नै री तेंइयै धिनी, यीशुए कताबै री स ज़ेगा खोली जौखै ऐ लिखू ती,

18 “प्रभु रा आत्मा मूँ पैधे सा किबैकि परमेश्वरै कंगाला बै शोभली खबर देणै री तेंइयै हाँऊ चुनू सा। गुलाम अज़ाद कैरिनै, काणै हेरदें लागणा, दुःखी होर लाचार लोका तिन्हा पैन्धै जुल्म केरनु आलै ना बचाइणै ।

19 होर परमेश्वरा रा आपणै लोका पैधे दया केरनै रा बौक्त आऊ सा। एसा गैला प्रगट केरनै री तेंइयै परमेश्वरै हाँऊ भेजू सा।”

20 एथा ना बाद यीशुए कताब बन्द केरी होर सेवकै रै हौथा ना कताब देइया बेटै। तैबै सभा घोरै रै सब लोका यीशु धिरे भाल्दै लागै। 21 तैबै यीशु तिन्हा बै बोल्दै लागै, “औज जे पवित्र शास्त्रा ना तुसै शुणु स एबे पूरा हुआ।” 22 तौखे बेटे दै सैभी लोकै यीशु री सराहणा केरी होर तिन्हैरै मुँहा ना निकुणू आई ज्ञाने री गैला शुणिया सैभै हैरान ती। ते एकी दूजै बै बोलदै लागै, “ऐ कैण्डे होई सका सा कि ऐ युसुफा रा बेटा नी आँथी?” 23 यीशुए तिन्हा बै बोलू, “तुसा मूँ सेंघे ऐ कहावत ज़रूर बोलणी 'वेईद जी पहिले आपणै आपू बै ठीक केर। जे चमत्कार तें कफरनहूमा ना केरै तिन्हा औखे आपणै शैहरा ना बी केर।” 24 पर हाँऊ तुसाबे सच बोला सा कि कोई भविष्यवक्ता आपणै शहरा ना आदर नी पाँदा। 25 ऐ सच सा कि जैबै परमेश्वरै रै भविष्यवक्ता एलियाह रै बौक्ता ना सादैं त्रा वौर्षा तक गाश नी आऊ होर सारै ईसाइल देशा ना अकाल पौऊ, तैबै इस्राइला ना एतरी बोहू विधवा ती जौंस बै मज़ती री ज़रूरत ती।” 26 पर परमेश्वरै एलियाहा बै तिन्हा ना कौसी बी यहूदी विधवा हागगै नी भेजू पर सारपत गां री विधवा हागगै भेजू जो यहूदी नी ती आँथी। 27 होर एलीशा भविष्यवक्ता(गुरु) रै बौक्ता ना इस्राइला ना बोहू सारै कोढ़ी ती पर तेईयै तिन्हा ना कोई बी ठीक नी केरू, सिर्फ सीरिया देशा रा नामान कोढ़ी ठीक केरू जुण कि यहूदी नी ती आथी। 28 सभा घोरै रै लोकै जैबै ए गैला शुणी ता ते झिकुए। 29 तिन्है लोकै उठिया यीशु शैहरा ना बाहरै खोलू होर स एकी ढौगा पेंधे बै

नेउ। जुणी पेंधे स शैहर बैणू ती, एता ना बाद ते यीशु बै ढौगै बुन शेटणा चाह ती। 30 पर यीशु तिन्हा मुंझै ना निकतै होर तौखे ना भैगै।

**यीशु चेटू फैसूदै माणहु बै ठीक केरा सी**

(मरकुस 1:21-28)


31 तैबै प्रभु यीशु गलील ज़िल्लै रै कफरनहूम शैहरा बै नौठे होर रामै रै ध्याइँ ना सभा घौरा ना जाइया उपदेश दैदै रौहै। 32 तौखे भी लोका यीशु रै उपदेश शुणिया हैरान हुऐ किबैकि यीशु आपणै वचना बै पूरै हका सेंघे बोला ती। 33 एक रोज़ जैबै यीशु सभा घौरा ना ती, तौखे चेटू फैसूदा एक माणहु ती होर स ज़ोरा सेंघे क्रीजा मारीया बोलदा लाग़ा, 34 “ओ नासरतै रै यीशु मेरा होर तेरा कि सम्बन्ध? तू की आसाबै परेशान केरदा आऊ सा? आसा बै नाश केरदा आऊ सा, हाँऊ ज़ाणा सा कि तू कुण सा? तू परमेश्वरै भेजू दा पवित्र माणहु सा।” 35 यीशुए तेइबै बोलू, “चुप रौह एई माणहु ना फेटै निकअ।” तैबै तेई चेटुऐ स माणहु धौरती पेंधे छाटू होर तेई माणहु ना निकता। सैभै लोका भाल्दै लागै दै ती। 36 तैबै लोका हैरान होइया एकी होरू बै बोलदै लागै, “एई रै बोलणै ना ऐण्ठी कि शक्ति सा कि चेटु बी एइरी शुणा सी होर एइरी मना सी।” 37 यीशुए जे किछ केरू तेतै खबर औगी साही सारै ना फैली।

**यीशु बीमार माणहु बै ठीक केरा सा**

(मती 8:14-17; मरकुस 1:29-34)

38 यीशु सभा घौरा ना एणै ना बाद शमोनै रै घौरा बै नौठे। तौखे शमोनै





मौछी ढौकणु आलै होर यीशु (5:2)

री शौशू बीमार ती। सैभै लोका यीशु हागगै विनती केरदै लागै कि एसा बै ठीक केरा। <sup>39</sup>यीशु तेसरै माँजै हागगै खडै होइया जौरा बै डोंडा सी होर स ठीक हुई। स खड़ी होइया प्रभु यीशु ता तिन्हरै सेंघी बै रोटी त्यार केरदी लागी। <sup>40</sup>जैबै धुपा ओऊइदा लागा तैबै ते तेई याँ रै सैभी बिमार माणहु बै प्रभु यीशु हागगै आणदै लागै होर ते यीशु रै छुँगणै सेंघै ठीक होआ ती। <sup>41</sup>जेतरै लोका बै चेट्ट फसू ती ता चेट्ट बी तिन्हा ना ऐण्डा बोलदै-बोलदै निकआ ती, “तू परमेश्वरा रा बेटा सा।” किबैकि चेट्ट ज़ाणा ती कि यीशु परमेश्वरै भेजू दा मसीह सा।

**यीशु अराधनालय ना प्रचार केरा सा**

(मरकुस 1:35-39)

<sup>42</sup>दुजै ध्याडी यीशु झीशा एकी सुनसान जैगा बै प्रार्थना केरदै जाँदै लागै ता लोकै री बोहू बड़ी भीड़ तिनहाबै तोपदी तिन्हा हागगै पुजी होर यीशु बै रोकदी लागी। <sup>43</sup>पर यीशुए बोलू, “परमेश्वरै रै राज्य ना लोका कैण्डै एजी सका सी, मूँ एसा गैला र प्रचार केरना किबैकि परमेश्वरै हाँऊ एई कोमै री तेंइयै

भेजू सा।” <sup>44</sup>यीशु यहूदी रै सभा घौरा ना ज़ाइया प्रचार केरदै रोहै।

**यीशु पहले आपणै चेलै बै बणा सी**

(मती 4:18-22; मरकुस 1:16-20)

**5** <sup>1</sup>एक रोज परमेश्वरा रा वचन शुणनै री तेंइयै जैबै लोके री भीड़ कडा हुई ता यीशु गन्नेसरतै री झीलै रै बौढा ना खडै हुऐ ती। <sup>2</sup>यीशुए झीलै रै बौढा ना दूई किस्ती लागी दी हेरी होर मौछी ढौकणु आऐ आपणी किशित छौड़िया आपणै ज़ा बै धोंदै लागै दै ती। <sup>3</sup>तिन्हा मौझै एक किस्ती शमौनै री ती होर यीशु तेसा किशित ना चैदिया लोका बै उपदेश देंदै लागै। <sup>4</sup>उपदेश देऐ ना बाद यीशुए शमौना बै बोलू, “आपणी किस्ती डुघै पाणी बै चला होर मौछी ढौकणै री तेंइयै ज़ा शेट।” <sup>5</sup>तैबै शमौनै यीशु बै बोलू, “ओ गुरु जी आसै सारी रात मेहनत् केरी पर किछ भी नी ढौकी पर तुसै बोला सी ता हाँऊ ज़ा शेटणू।” <sup>6</sup>जैबै तिन्है ज़ा शेटू ता तिन्है एतरी बोहू मौछी ढौकी कि तिन्है ज़ा चिरिदै लागै। <sup>7</sup>तैबै तिन्है दुजी किस्ती रै सेंघी भी मज़ती केरनै री तेंइयै शारै केरिया शाधै होर तिन्है दुऐ किस्ती एतरी भौरी कि ते डूबदी लागी। <sup>8</sup>एई चमत्कार हेरिया शमौन पतरस यीशु री ज़ोंघा पेंधै पौऊ होर बोलू, “गुरु जी मूँ हागगै ना दूर ज़ाआत, किबैकि हाँऊ पापी माणहु सा।” <sup>9</sup>किबैकि एतरी मौछी ढौकणै री वजह ना तेईबै होर तेइरै सेंघी बै बड़ी हैरानी हुई। <sup>10</sup>जबदी रै बेटै याकूब होर यूहन्ना भी जो शमौनै रै सेंघी ती तिन्हा बै बी बड़ी हैरानी हुई। तैबै यीशुए शमौना बै बोलू, “डौरदा मत औज़ा ना बाद त मूँ



### धँगा रा मरीज़ (5:19)

हाग्गै माणहु ढौंकिया आणनै। <sup>11</sup>तैबे तिन्है किशित बोद्धा बै आणी होर ते सब किछ छौड़िया यीशु पिछै चेलै।

### यीशु एकी कोढ़ी माणहू बै ठीक केरा सी

(मती 8:1-4; मरकुस 1:40-45)


<sup>12</sup>यीशु गलील ज़िल्लै रै एकी शहरा ना ती। तौखै एक ऐण्डा माणहु ती ज़ौसरै पूरी देही ना कोढ़ हुआ ती। जैबै तेइयै यीशु हेरू तैबै तेइयै टुँबड़ै पौड़िया यीशु हाग्गै विनती केरी, “ओ प्रभु जी अगर तुसै चाहलै ता मुँबै ठीक केरी सका सी।” <sup>13</sup>तैबे यीशुए स आपणै हौथा सँघे छुँगू होर बोलू, “हाँऊ चाहा सा कि तू ठीक हो।” तुरन्त तेइरा कोढ़ खत्म होर स ठीक हुआ।” <sup>14</sup>तैबै यीशुए तेइबै हुकम धिना, “एसा गल तू कौसीबै हेरेई दसदा। पर ज़ाइया यहूदी पुजारी बै रियहा होर कोढ़ा ना ठीक हुऐदें लोका बै मूसै जे बौई चढ़ाणै बै बोलू सा तेसाबै चढ़ा ताकि लोक ज़ाणलै कि तू ठीक हुआ सा।” <sup>15</sup>पर यीशु रै बारै ना केरीदी ऐ गल औगी साही फैलदी रौही होर लोकै री भीड़ यीशु री शिक्षा शुणनै री तेंइयै होर तिनरी बीमारी ना ठीक हौणै री तेंइयै कैदी हौदी रौही। <sup>16</sup>पर यीशु तिन्हा ना

दूर एकाँत ज़गहा ना ज़ाइया प्रार्थना केरा ती।

### यीशु धँगे रै मरीज़ा बै ठीक केरा सी

(मती 9:1-8; मरकुस 2:1-12)

<sup>17</sup>एक रोज़ जैबै यीशु उपदेश देंदै लागै ती, तैबै तौखै फरीसी पंथै रै किछ लोका होर यहूदी नियम सिखाणु आए किछ लोक बी तौखै बेटे दै ती ज़ो कि गलील होर यहूदिया ज़िल्लै रै हरेक गाँ ना होर यरूशलेमा ना आए ती। बीमारी ना लोका बै ठीक केरनै तेंइयै प्रभु री शक्ति यीशु सँघे ती। <sup>18</sup>तेई बौकतै किछ लोकै एक धँगा रा मरीज़ माँज्रै पँधे आणू। तिन्है लोकै मरीज़ा बै घौरा भीतरै नेहणै होर यीशु सामनै रखणै री बड़ी कोशिश केरी। <sup>19</sup>पर लोकै री बड़ी भीड़ै री वजह सँघे ते मरीज़ा बै भीतरै नी नेई सकै ता तिन्है घौरै रै छापरा पँधे चैदिया किछ पौट पेचै होर स मरीज़ यीशु सामनै उतारू। <sup>20</sup>यीशुए तिन्हरा वशाह हेरिया तेई मरीज़ा बै बोलू, “ए ई बेटैया तैरै पाप माफ हुऐ।” <sup>21</sup>तैबै तौखै बेटे दै नियम सिखाणु आए होर फरीसी लोक आपू ना वहस केरदें लागै, “ऐ कुण सा ज़ो परमेश्वरै री निन्दा केरा सा? परमेश्वरै रै सिवाए कोई बी पापा बै माफ नी केरी सकदा। <sup>22</sup>यीशुए तिन्हरै मनै रै वचार ज़ाणिया तिन्हा बै बोलू, “तुसै आपणै मना ना किबै वहस केरदें लागै सी?” <sup>23</sup>सान की सा, “ऐण्डा बोलणा कि तैरै पाप माफ हुऐ या ऐण्डा बोलणा सान सा उठ होर औँढदा लाग।” <sup>24</sup>पर तुसै ज़ाणि लेआ कि माहणू रै बेटे बै यानिकी मुँबै एसा धौरती पँधे पापा बै माफ करनै रा भी हक सा।” तेता



यीशु होर चुँगी लेणू आला मती (5:27)

ना बाद यीशुए धँगे रै मरीज़ा बै बोलू, “हाँऊ तौभे बोला सा उठ होर आपणै माँज़े चैकिया घौरा बै जा।” 25 तैबे स मरीज़ा एकदम उठू होर जुणी माँज़े पँधे स सुता ती तेड़ माँज़े चैकिया परमेश्वरै री जय-जयकार केरदें-केरदें आपणै घौरा बै नौठा। 26 तौखे बेठे दै लोका बड़ै हैरान हुरे होर परमेश्वरै री जय-जयकार केरदें लागे होर बोलदें लागे, “औज़ आसै नोखी गैला हेरी।”

27 एता ना बाद यीशु शैहरा ना बाहरै नौठे होर एक लेवी नाँ रा माणहु चुँगी लेणै री चोउकी हागँ बेठा दा हेरू होर तेड़बै बोलू, “मूँ पिछे एज होर मेरा चेला बैण।” 28 तैबे स सबकिछ छौड़िया उठू होर यीशु पिछे चैलू।

29 बाद ना लेवियै यीशु री तेंड़यै एक बड़ी धाम रखी। सैभे चुँगी लेणू आए होर होरी लोकै री एक बोहू बड़ी भीड़ यीशु सँधे रोटी खाँदी बेठी ती। 30 फरीसी होर धर्मगुरु यीशु रै चेलै ना पुछदें लागे, “तुसे चुँगी लेणू आए सँधे होर पापा लोका सँधे किबै खा पीया सी?” 31 यीशुए तिन्हा बै जवाब धिना, “ठीक माणहु बै वेयदें री ज़रूरत नी होंदी पर बीमार माणहु बै वैयदें री ज़रूरत होआ सा।”

32 यीशुए बोलू, “ तैणढाए हाँऊ धर्मी री तेंड़यै नी बल्कि पापी री तेंड़यै आऊ सा ताकि ते आपणै पापा बै छौड़लै।”

### व्रतें रै बारे ना प्रश्न

(मती 9:14-17; मरकुस 2:18-22)

33 तिन्है यहूदी नेतै यीशु बै बोलू, “यूहन्नै रै चेलै ता बार व्रत रखा सी होर फरीसी लोकै होर रै चेलै बी कई बार व्रत रखा सी, पर तेरें चेलै ता खाँदें-पीदें रौहा सी।” 34 तैबे यीशुए तिन्हा बै बोलू, “जैबे तक लाड़ा सँधे सा कि तुसे बराती ना व्रत कराई सका सी?” 35 पर तिन्हा ध्याड़ै एणा जैबे लाड़ा बराती ना लग केरिना तैबे तिन्हा व्रत केरना।

36 यीशुए तिन्हा बै एक होर उदाहरण बी दसू “कोई बी माणहु नौउएँ कपड़ै चिरिया पराणै कपड़ै ना नी ज़ोड़दा। अगर तैणढा केरला ता नोऊँआ कपड़ा चिरिना हो स पराणै कपड़ै सँधे मेल नी खाँदा।” 37 तैणढाए ना कोई माणहु नौउआ दाखरस चोमड़ै री पराणी थैली ना भौरदा। अगर ऐणढा केरलै ता नौउएँ दाखरसा पराणी थैली भोनणी होर दाखरस ता थैली दुए नष्ट होणी। 38 पर नौउआ दाखरस चोबड़ै री नोऊँई थैली ना भौरना पौड़ा सा। 39 होर जुणियै पराणा दाखरस पीऊ सा स नौउआ दाखरस नी पीणा चाँहदा। किबैकि स ऐणढा बोला सा, “पराणा ऐ दाखरस शोभला सा।”

### यीशु रामे रै ध्याड़ै रै बी प्रभु सी

(मती 12:1-8; मरकुस 2:23-28)

**6** 1 एक बार रामे रै ध्याड़ै ना यीशु नाजै रै छेतै आघे जाँदें लागे ती। तैबे तिन्हरै चेलै सीला चोड़िया होर

हौथै लाइया मौई-मौइया खाँदै लागै ती।<sup>2</sup> तैबै किछ फरीसी लोकें यीशु बै बोल्लू, “तुसै एई कोमा बै किबै केरा सी जो रामै रै ध्याइँ ना केरना ठीक नी आँथी।”<sup>3</sup> यीशुए तिन्हा बै जवाब धिना, “जैबै दाऊद होर तेइरै सेंघी भूखै ती ता दाऊदै की केरू?” कि तुसै तेइरै बारें ना पौढू? 4 स परमेश्वरै रै घौरा बै नौठा होर परमेश्वरा बै चढ़ाईदी रोटी खाई होर आपणै सेंघी बै भी धिनी जुणीबै कि सिर्फ पुजारी केहली खाई सका ती।<sup>5</sup> यीशुए तिन्हाबै ऐ बी बोल्लू, “माणु रा बेटा रामै रै ध्याइँ रा भी प्रभु सा।”

**यीशु शुकेँ दै हौथा आरे बै ठीक केरा सा**

(मती 12:9-14; मरकुस 3:1-6)

<sup>6</sup> एक होरी रामै रै ध्याइँ ना यीशु सभा घौरा ना जाइया उपदेश दैदै लागै ती। तौखै एक शुकेँ दै हौथा आ माणु ती।<sup>7</sup> यहूदी पँडत होर पुजारी यीशु पेंधे दोष लागै रा मौका तोपदै लागै ती कि यीशु रामै रै ध्याइँ ना शुकेँ दै हौथा आए बै ठीक केरा सा कि नी।<sup>8</sup> यीशु तिन्हरै मनै रै वचारा बै ज़ाणा ती। यीशुए शुकेँ दै हौथा आए माणु बै बोल्लू, “उठ मुँझै खड़ा हो। स उठू होर मुँझै खड़ा हुआ।”<sup>9</sup> यीशुए तिन्हा लोका बै बोल्लू, “हाऊ तुसा ना पुछा सा कि रामै रै ध्याइँ ना भला केरना ठीक सा कि बुरा केरना?” ज़िंदगी बचाणी या नाश केरनी? <sup>10</sup> यीशुए तिन्हा सैभी धिरै भाऊ होर तेई माणु बै बोल्लू, “आपणा हौथ आगै केर। तेई माणुए आपणा हौथ आगै केरू होर स भी बिलकुल ठीक हुआ।”<sup>11</sup> धर्मगुरु होर फरीसी ऐ हेरिया

झिकुए होर आपू ना वहस केरदै लागै कि आसा यीशु रै खिलाफ की केरना।

**यीशु आपणै बारा चेलै बै चुना सी**

(मती 10:1-4; मरकुस 3:13-19)

<sup>12</sup> तिन्हा ध्याइँ ना यीशु ढौगा पेंधे प्रार्थना केरदै नौठे होर पूरी रात परमेश्वरा सेंधे प्रार्थना केरनै ना बिताई।<sup>13</sup> जैबै दोत हुई ता यीशुए आपणै चेलै आपू हागै शोधे होर तिन्हा ना आपणै बारा चलै चुनै होर तिन्हरै नाँ ए सी;<sup>14</sup> शमौन ज़ौस रा नाँ यीशुए पतरस रैखू, पतरसा रा भाई अन्द्रियास, याकूब होर यूहन्ना, फिलिप्पुस, बरतुलमै।<sup>15</sup> मती, थोमा हलफई रा बेटा याकूब होर शमौन जिलौती;<sup>16</sup> याकूबा रा बेटा यहूदा होर यहूदा इस्करियोती जुणियै यीशु ढौकणै द्याऊ।

**यीशु शिक्षा देआ सा  
होर बीमारा बै ठीक केरा सा**

(मती 4:23-25)

<sup>17</sup> तैबै यीशु ढौगा पेंधे ना आपणै चेलै सेंधे भ्याऊँ आए, होर तैइरै चेलै री एक बड़ी भीड़, सारै यहूदी प्रान्त, यरूशलेम शैहर होर सूर होर सैदा शैहरै रै समुद्री बौँदै रै लोकें री एक बड़ी भीड़ तौखै हाज़र ती।<sup>18</sup> ते यीशु री शिक्षा शुणदै होर आपणी बीमारी ना ठीक हौणै री तैँइए आए ती। यीशुए चेटू फैसदै लोक बी ठीक केरै।<sup>19</sup> सारै लोक यीशु बै छूँगणै री कोशिश केरदै लागै ती किवैकि स आपणी शक्ति सेंधे सैभी बै ठीक केरा ती।

**यीशु लोका बै आशीर्वाद देआ सा**

(मती 5:1-12)

20 तैबे यीशुए आपणै चेलै धिराबै हेरिया बोलू,

“धन्य सी तूसै जै गरीब सी, किबैकि परमेश्वर तुसारा राजा सा।”  
होर तूसै तेइरी प्रजा सी।

21 “धन्य सी तूसै, जे ऐबै भूखे सी। किबैकि तुसा तृप्त होणा,  
“धन्य सी तूसै जे ऐबै रोआ सी, किबैकि तुसा हौसणा।”

22 “धन्य सी तूसै जैबे माण्डु रै बेटै री वजह ना यानि की मेरी वजह ना लोका तुसा सैंधे वैर रखलै, तुसाबै बुरै बोलिया खोललै होर, तुसरी निन्दा करलै, होर तुसारा बुरा चाहलै।”

23 जैबे तुसा सैंधे ऐण्डा होला ता तूसै खुश होर मग्न होईत्, किबैकि तुसरी तैंइयै स्वर्गा ना बड़ा इनाम रखू सा। याद रैखा कि तुसा सैंधे बैर रैखणू आऐ रै बजुर्ग बी भविष्यवक्ता सैंधे ऐण्डा केरा ती।

**एणू आए दुःखै रै बारै ना भविष्यवाणी**

24 पर तूसै जे सेठ सी तूसरै दुःखै रै ध्याइँ ऐणै। किबैकि तुसाबै आपणा पूरा सुख चैन मिलदा लाग़ा सा।” 25 तूसै जे ऐबै रौजै-पुजै दै सी, तूसरै दुःखै रै ध्याइँ एणा। किबैकि तुसा भुखिणा। औज जे तूसै हौसा सी तूसरै रोणै रै ध्याइँ एणा। किबैकि तुसा शोग मनाणा होर रोणा। 26 केतरी दुःखै री गल सा जैबे सारै माण्डु तुसाबै भला बोललै, किबैकि

तिन्हरै बुजुर्गै भी झूठै भविष्यवक्ता बै भला बोला ती।

**बैईरी सैंधे भी झुरी रखा**

(मती 5:38-48; 7:12)

27 पर हाँऊ तुसा शुणनू आए बै बोला सा, “आपणै बैईरी सैंधे झुरी रखा जो तुसा सैंधे बैर रखा सी तिन्हरा भला केरा।” 28 जूणा तुसाबै श्राप देआ सी तिन्हा बै आशीष देआ होर जूणा तुसरी बेइजती केरा सी तिन्हरी तैंइयै प्रार्थना केरा। 29 जुण तेरै एकी गलोटै ना थप्पड़ बाहला ता आपणा दूजा गलोटै बी तेई धिराबै फेर, जुण तेरा कोट छड़ाहला ता तेईबै आपणा कुरता भी नेणै दै।

30 कौसी बी मुँगणू आए बै नाँह मता केरदै, अगर तुसा ना कोई तुसरी चीज नेआ सा ता तेसा वापस मता मुँगदै।

31 जैण्डा वर्ताव तूसै होरी ना चाहा सी तूसै भी तिन्हा सैंधे तैंडा ऐ वर्ताव केरा।

32 अगर तूसै आपु सैंधे झुरी रखणू आए सैंधे झुरी रखा सी ता तुसरी सराहना कुणी केरनी, किबैकि पापी लोका बी आपू सैंधे झुरी रैखणू आऐ सैंधे झुरी रैखा सी। 33 अगर तूसै आपु सैंधे भला केरनु आए रा भला केरा सी ता तुसाबै तेतै री कि सराहना मिलणी किबैकि पापी माण्डु बी ऐण्डा केरा सी। 34 अगर तूसै तिना लोका बै उधार देआ सी जुणी ना वापस मिलणै री आशा रखा सी ता तुसाबै तेतै री तैंइयै कि प्रशंसा मिलणी? किबैकि पापी माण्डु बी एकी दुजै बै उधार देआ सी ताकी तिनाबै तेतरै ढैबुऐ वापस मिललै। 35 बल्कि आपणै बैईरी सैंधे झुरी रखा होर तिन्हा भला केरा। उद्धार देइया वापस पाणै री इच्छा मता

रखदें तैबे तुसाबे बड़ा इनाम मिलणा होर  
तुसा परम प्रधान परमेश्वरै री सन्तान  
बणना, किबैकि परमेश्वर पापी होर धर्मी  
दुही पेंधे दया केरा सा। <sup>36</sup>जैण्डा तुसरा  
बापू(परमेश्वर) दयालू सा, तुसै बी दयालू  
बैणा।

### दोष मता लांदे

(मती 7:1-5)

<sup>37</sup>कौसी पेंधे दोष मता लादें। तैबे  
तुसा पेंधे बी दोष नी लागणा। अगर  
तुसै होरी बै माफ केरलै ता तुसाबे बी  
माफी मिलणी। <sup>38</sup>होरी बै देआत्। तैबे  
तुसाबे भी मिलणा। पूरा नापी-नापिया,  
दबाई-दबाइया होर हिलाई-हिलाइया  
तुसाबे देईणा। जौस नापा सेंधे तुसै  
नापाले तेई नापा सेंधे तुसाबे बी नापिणा।

<sup>39</sup>यीशुए तिन्हाबे एक उदाहरण बी  
दसू, “काणा काणैबे बौत नी रिहाई  
सकदा किबैकि ऐण्डा केरनै सेंधे तिन्हा  
दुही खाँचै बै पौइना।” <sup>40</sup>चेला आपणै  
गुरु ना बड़ा नी होंदा। पर पूरी रीतिरे  
तालीम लेरे ना बाद स चेला गुरु रै  
समान होआ सा। <sup>41</sup>“तू आपणै भाई री  
औछी रै आहलै साही होछी गलती बै  
किबै हेरा सा जैबै कि त ना आपणी  
औछी रै लक्ड़ा साही बैड़ी गलती नी  
हेरिदी।” <sup>42</sup>जैबै त ना आपणी औछी  
रै लक्ड़ा साही बैड़ी गलती नी हेरिदी  
ता तू आपणै भाई बै कैण्डे बोली सका  
सा कि भाई रूक, हाँऊ तेरी औछी रै  
आहलै बै खोलणू? एई ढोंगिया, पहलै  
तू आपणी औछी रै लक्ड़ा बै ता खोल,  
तैबै तू आपणै भाई री औछी रै आहलै  
बै शोभली तरहा हेरिया खोली सका सा।

### जैण्डा बूटा तैँढा फौल

(मती 7:16-20; 12:33-35)

<sup>43</sup>कौसी भी शोभलै बूटै ना माडै फ़ौ  
नी लागदें होर ना माडै बूटै ना शोभलै  
फौल लागी सकदें। <sup>44</sup>किबैकि हरेक  
बूटा आपणै फ़ौआ सेंधे पछियाणिया  
सा किबैकि कोई बी माणहु झौकड़ा ना  
अँज़ीर नी चोड़ी सकदें होर ना ज़िदी ना  
अँगूर चोड़ी सकदें। <sup>45</sup>भला माणहु आपणै  
मनै रै भलै भण्डारा ना भली गैला खोला  
सा होर बुरा माणहु आपणै मनै रै बुरै  
भण्डारा ना बुरी गैला खोला सा। किबैकि  
ज़ेकिछ मना ना भौरूआदा सा सौहै मुँहा  
ना निकला सा।

### एक पक्की म्नियाद बणाणी

(मती 7:24-27)

<sup>46</sup>“जैबै तुसै मेरी गैला नी मँनदें,  
ता तुसै मुँबै प्रभु-प्रभु बोला सी तेथा  
रा की फायदा? <sup>47</sup>जुण मूँ हागगै एज़ा  
सा होर मेरी गैला बै शुणिया तिन्हा बै  
मँना सा हाँऊ तुसाबै दस सा कि स  
माणहु कुणी साही सा; <sup>48</sup>स तेई माणहु  
साही सा ज़ुणियै डुधै कोतिया मनियाद  
पाइया घौर बणाऊ। बाद ना जैबै औढा  
आऊ ता तेई घौराबै किछ फर्क नी पौऊ  
किबैकि तेइरी म्नियाद पक्की ती। <sup>49</sup>पर  
जुण मेरी गैला बै शुणिया नी मँनदा स  
तेई माणहु साही सा ज़ुणियै आपणा घौर  
म्नियादी बगैर काचची ज़ैगा पेंधे बणाऊ।  
जैबै औढा आऊ तैबै स घौर ढौऊ होर  
बुरी तरहा चुटू।

## सेनै रे मुखिया रा वशाह

(मती 8:5-13)

**7** <sup>1</sup>जैबै यीशुए लोका सेंधे ऐ सारी गैल्ला केरी ता ते कफरनहूमा शैहरा बै आऐ। <sup>2</sup>तौखे रोमी सेनै रे मुखिया रा एक प्यारा नोकर बिमार ती होर स मोरनु आला ती। <sup>3</sup>जैबै सेनै रे मुखियै यीशु रे बारै ना शुणू ता तेइयै कई यहूदी बुजुर्ग यीशु हागगै विनती केरदै भेजै ताकि यीशु एजिया तेइरै नोकरा बै ठीक केरलै। <sup>4</sup>जैबै ते यीशु हागगै पुजै ता तिन्ने सच्यै मना सेंधे यीशु हागगै विनती केरी “कि स एजिया तेई माणहु री मजत केरला। तिन्ने बोलू ऐ मुखिया तुसरी मजती पाणै रे लायक सा। <sup>5</sup>किबैकि स आसरे लोका सेंधे झुरी केरा सा होर तेइयै आसरी तेंइयै धर्म-सभा घोर बणाणै री तेंइए ढैबुए धिने सी। <sup>6</sup>तैबे यीशु तिन्हा सेंधे नौठे। यीशु आज्जी घौरा ना थोड़ी दूर ती कि सेनै रे मुखियै आपणै सेंधी यीशु हागगै एण्डे बोलणै री तेंइयै भेजै कि, “ओ प्रभु जी, तुसै आपू बै एतरा कष्ट मता देंदै किबैकि हाँऊ एस लायक नी आँथी कि तुसै मेरै घौरा बै एलै।” <sup>7</sup>तैण्डाए हाँऊ तुसा सामनै एणै रे लायक आपू बै नी समझदा, तुसै मेरै नोकरा बै ठीक होणै री तेंइयै सिर्फ वचन बोललै ता तेई ठीक होणा। <sup>8</sup>एथा पेंधे मुँबे वशाह सा किबैकि हाँबी कौसी अधिकारी रे अधीन कोम केरनूआ माणहु सा होर मेरै अधीन भी किछ सपाही सी, जैबै हाँऊ एकी बै एणै बै बोला सा ता स एजा सा होर दुजै बै जाणै बै बोला सा ता स जा सा होर जैबै हाँऊ आपणै नोकरा बै बोला सा एण्डा

कोम केर ता स तेई कोम केरा सा। <sup>9</sup>तिन्हा यहूदी बजुर्ग रे द्वारा मुखियै री इना गैल्ला शुणिया यीशुए आपू पिछे एन्दी लागी दी लोकै री भीड़ा धिराबै हेरिया बोलू, “हाँऊ तुसाबै बोला सा कि एण्डा बशाह केरनू आला में इसाइला ना भी नी हेरू।” <sup>10</sup>तैबै भेजै दै तिन्है लोकै तेई मुखियै रे घौरा जाइया हेरू ता स नोकर ठीक हुआ ती।

## यीशु विधवै रे बेटे बै ज़िन्दा केरा सा

<sup>11</sup>तैबै ना बाद तुरन्त यीशु नाइन नाँ रे गाँ बै नौठे। तिन्हरे चलै होर लोकै री बोहू बड़ी भीड़ यीशु सेंधे ती। <sup>12</sup>जैबै यीशु गाँ बाहरै पुजै ता लोकै तिसै आधे जुआन माहणू रा एक मुर्दा नेणा लाऊ दा ती। स एकी विधवा रा केल्हा बेटा ती होर गाँ रे लोकै री बोहू बड़ी भीड़ तेसा विधवा सेंधे ती। <sup>13</sup>तेसा विधवा हेरिया प्रभु बै तेसा पेंधे दया आई होर तेसा विधवा बेटड़ी बै बोलू, “रौंदी मता।” <sup>14</sup>तेथा ना बाद यीशु आधे नौठे होर तिन्है स धड़ छुँगू ता ते धड़ चेकणू आए रूकै। तैबै यीशुए बोलू, “एई जुआना, हाँऊ तौभै बोला सा खड़ा उठ।” <sup>15</sup>तैबै स मुँआदा माणहु खड़ा उठू होर बोलदा लागा। तैबै यीशुए स तेईरी आमा हागगै धिना। <sup>16</sup>तैबै तौखलै सैभि लोका बै बड़ी डोर पौई। ते परमेश्वरै री जयकार केरिया बोलदै लागे, “आसरे बिचा ना एक महान् भविष्यवक्ता पैदा हुआ सा, होर परमेश्वर आपणै लोकै री मजती री तेंइयै आऊ सा।” <sup>17</sup>यीशु रे बारै ना ऐ गल सारै यहूदिया होर और-पौरलै सैभी एरियै ना फैली।

## यहून्ना बपतिस्मै देणू आए रा प्रश्न

(मती 11:2-19)

18 इन्हा सैभी गल्लै रै बारै ना यहून्नै रै चलै यहून्ना बै सबकिछ दैसू। 19 तैबे यहून्नै आपणै दूई चलै शधै होर प्रभु हागगै ऐ पुछणै री तेंइयै भेजै, “एणू आए मसीह तुसै सी कि आसै कौसी होरी रा इंतजार केराऊँ?” 20 तिन्है माहणुऐ यीशु हागगै एजिया बोलू, “आसै यहून्नै बपतिस्मै देणू आए ऐ पुछणै री तेंइयै भेजै सी कि एणू आए मसीह तुसै सी या आसा कौसी होरी रा इंतजार केरना?” 21 ठीक तेही बौकतै यीशुऐ बोहू सारै लोका बीमारी ना, दुःखा ना, होर चेटू ना ठीक केरै होर काणै बै हरनै री शक्ति धिनी; 22 तैबै यीशुऐ तिन्हा बै बोलू, “जेकिछ तुसै हेरू होर शुणू तेई ज़ाइया यहून्ना बै दैसा कि काणै हेरा सी, लँगडै ओढा सी होर कोढ़ी ठीक केरिया सी, टाऊणै शुणा सी होर मुदँ ज़िंदै केरिया सी होर कँगाला बै परमेश्वरै री शोभली गैला दसिया सी। 23 “धन्य सी ते ज़ुणा मूँ पैधै वशाह केरना नी छौड़दैं।” 24 जबै यहून्नै रै चलै वापस नौठै ता यीशु यहून्नै रै बारै ना लोका बै बोलदैं लागै, “तुसै सुनसान ज़ैगा बै कैण्डै माहणू बै हेरदैं नौठै ती? कि तुसै बागरियै हिलणु आई झलामा साही पतलै माहणू बै हेरदैं नौठै ती?” 25 नी ता तुसै होरी कैण्डै माहणू बै हेरदैं तौखै नौठै दै ती। कि तुसै मेंहगै झिकडै लाउएदैं माणहु हेरदैं नौठै दै ती? शुणा, मेंहगै झिकडै लाणू आए होर सुख चैना सैंधै रौहणू आए ता महला ना मिला सी सुनसान ज़ैगा ना नी। 26 नी

ता तुसै होरी कैण्डै माहणू बै हेरदैं नौठै ती? तुसै कि कौसी भविष्यवक्ता बै हेरदैं नौठै ती? हां, पर हाँऊ तुसा बै बोला सा, “स भविष्यवक्ता ना भी बड़ा सा।” 27 यहून्ना सौहै भविष्यवक्ता सा ज़ौस रै बारै ना शास्त्रा ना लिखू सा: शुणा, मूँ त ना आगै-आगै आपणा दूत भेजणा होर तेई तेरी तेंइयै बौत त्यार केरनी। 28 हाँऊ तुसाबै बोला सा ज़ुण बेटड़ी ना पैदा हुऐ सी तिन्हा मुँझै यहून्ना ना बड़ा कोई नी आँथी पर ज़ुण परमेश्वरै रै राज्य ना सैभी ना ओछा सा स यहून्ना ना बड़ा सा। 29 आम लोकै होर चुंगी लेणू आए ऐ शुणिया यहून्ना ना बपतिस्मा लेइया ऐ मैनु कि परमेश्वरा रा रस्ता सच्चा सा। 30 पर फरीसी होर धर्मविधि सिखाणू आए लोकै यहून्ना ना बपतिस्मा नी लेऊ होर ऐण्डै तरहै परमेश्वरै री इच्छा रा नाँह केरू। 31 “एसा जुगा रै लोका बै हाँऊ कुणी साही दसनु कि ते कैण्डै सी?” 32 ते बज़ारा ना बेटै दै तिन्हा शोहरू साही सी ज़ुणा आपणै सैंधी सैंधै शिकायत केरा सी कि आसै तुसरी तेंइयै बँउसरी बज़ाई पर तुसै नी नौचै, आसै तुसरी तेंइयै दुःखै री घीता लाई पर तुसै नी रूपै। 33 यहून्ना बपतिस्मै देणू आए कदी बी रोटी नी खाई होर ना दाखरस पीऊ, पर तुसै बोला सी तेई ना चेटू सा। 34 पर ज़ैबै माणहु रा बेटा खाँदा-पिंदा आऊ ता तुसै बोला सी कि हेरा ऐ ता खांची होर पियक्कड सा। होर ऐ ता चुंगी लेणू आए होर पापी रा सैंधी सा। 35 पर ज़ुणा परमेश्वरै रै जाना पिछै चैला सी तिन्हरी ज़िंदगीऐ लाइया जान सच्चा ठहरा सा।



## यीशु पापण बेटड़ी रै पापा बै माफ़ केरा सी

<sup>36</sup> एक रोज़ कौसी फरीसी यीशु हागगै विनती केरी कि स तेई सँघे रोटी खाला, ता यीशु तेई सँघे तेइरे घौराबै नौठे होर रोटी खाणै री तैइयै बेटै। <sup>37</sup> तेई गां ना एक एण्ठी बेटड़ी ती जो पापे री ज़िंदगी ज़िंदी लागी दी ती। ज़ैबै तेसा बै ऐ पता चलू कि यीशु फरीसी रै घौरा ना रोटी खाँदै लागै सी, ता स बेटड़ी सँगमरमरै रै भांडै ना इत्र लेइया आई, <sup>38</sup> स बेटड़ी यीशु री ज़ोंघा हागगै खड़ी होइया रोंदी लागी। तेसै आपणै औछुयै लाइया यीशु री ज़ोंघा सिनी केरी होर आपणै चोढ़े लाइया टुशदी लागी, तेसै यीशु री ज़ोंघा ना मांकी धिनी होर इत्र पाऊ। <sup>39</sup> एसा बै हेरिया स फरीसी आपणै मना ना सोचदा लाग़ा, “अगर ऐ भविष्यवक्ता होंदा ता जाणदा कि जुणा बेटड़ी एईबै छुंगदी लागी सा ऐ कण्ठी सा होर कैण्ठी पापै री ज़िंदगी ज़िंदी लागी सा।” <sup>40</sup> यीशुए तेई फरीसी बै बोलू, “एई शमौना हाँऊ तौभै किछ बोलणा चाहा सा।” फरीसिए बोलू, गुरु जी बोलात्। <sup>41</sup> यीशुए बोलू, “कौसी सेठे रै दूई कर्जदार ती। एक पौज शौऊ चाँदी रै सिक्के रा होर दूजा पज़ाह चाँदी रै सिक्के रा कर्जदार ती।” <sup>42</sup> ज़ैबै ते कर्जा नी देई सकै ता तेई सेठे तिन्हा दुही रा कर्जा माफ़ केरू। ऐबै तिन्हा दुई ना सेठा सँघे कुणी जादा झुरी केरनी? <sup>43</sup> शमौनै बोलू, मेरै खयाल ता जुणी रा बोहू कर्जा माफ़ हुआ। यीशुए तेइबै बोलू, “तैं ठीक बोलू।” <sup>44</sup> तथा ना बाद यीशुए तेसा बेटड़ी धिराबै फिरिया शमौना बै बोलू, “एसा बेटड़िए ज़े केरू

कि तू हेरा सा?” हाँऊ तेरै घौरा आऊ तैं मुंबे ज़ोंघा धोणै री तैइयै पाणी तक नी धिना, पर एसै बेटड़िये आपणै औछू सँघे मेरी ज़ोंघा सिनी केरी होर आपणै चोढ़े सँघे टुशी। <sup>45</sup> तैं मुंबे माँकी नी धिनी पर ज़ैबै ना लेइया हाँऊ आऊ सा एसै बेटड़िये मेरी ज़ोंघा ना मांकी देणी नी छौडी। <sup>46</sup> तैं मेरे चोड़ै ना तेल नी मौऊ, पर एसै बेटड़िये मेरी ज़ोंघा पैंधे इत्र पाऊ। <sup>47</sup> ऐबै हाँऊ तौभै बोला सा, “एसा बेटड़ी रै पाप ज़े बोहु ती ते माफ़ हुऐ, किबैकि एसै बोहु झुरी केरी, पर जुणी रा थोड़ा माफ़ हुआ तेई झुरी बी थोड़ी केरनी।” <sup>48</sup> तथा ना बाद यीशुए तेसा बेटड़ी बै बोलू, “तेरे पाप माफ़ हुऐ।” <sup>49</sup> तैबै ते लोका जुणा यीशु सँघे रोटी खाँदै बेटै दै ती आपणै-आपणै मना ना सोचदै लागै, “ऐ कुण सा जो पापा बै बी माफ़ केरा सा?” <sup>50</sup> पर यीशुए तेसा बेटड़ी बै बोलू, “तैं वशाह केरू तैबै तू बची, परमेशवरै री शाँति पाइया घौरा बै ज़ा।”

## यीशु री सेवा केरनू आई बेटड़ी

**8** <sup>1</sup> एता ना बाद यीशु शहरा-शहरा ना होर गां-गां ना परमरेशवरै रै राज्य रा प्रचार केरदै लागै होर ते बारा चेलै बी यीशु सँघे ती। <sup>2</sup> किच्छ बेटड़ी भी ती ज़े चेटू ना होर बीमारी ना ठीक केरी दी ती ते यीशु सँघे ती होर ते ए सी: मगदला गाँ री मरियम ज़ौसा ना यीशुए सौत चेटू खोलै दै ती, <sup>3</sup> राजा हेरोदेसै रै मुन्शी खुजै री लाड़ी योअन्ना, सुसन्ना होर बोहू सारी बेटड़ी ती। ते आपणी कमाई ना यीशु होर तिन्नैरे चले री सेवा केरा ती।



बेजै बाहणू आला (8:5)



शोभली फसल (8:8)

### बेजै बाहणू आणे रा उदाहरण

(मती 13:1-9; मरकुस 4:1-9)

<sup>4</sup> जैबे शहरा-शहरा ना एजिया लोकै री बोहु भीड़ यीशु हागगै कैठा हुई ता यीशुए तिन्हाबै एक कैथ दैसी। <sup>5</sup> “एक बेजै बाँहणु आ बेजै बाँहदा लाग़ा। बाँहदी घरे किच्छ बेज़ा बौतै रै बौद्धा ना पौऊ होर लोके री ज़ाँघा हेठै जखडुआ होर स चिडुए चुगू।” <sup>6</sup> किच्छ बेज़ा रडखडी ज़मीना पेंधे पौऊ, स बेज़ा निकता पर पांणी नी मिलणै री बज़ह सेंधे ते बुटै शुके। <sup>7</sup> किच्छ बेज़ा कोन्डै रै झौकडा मुंडै पौऊ होर झौकड बढै होर तिन्है ते बुटै दवाए। <sup>8</sup> किच्छ बेज़ा शोभली ज़मीना ना पौऊ। स बेज़ा निकता होर

शौऊ गुणा फ़ौल आणू। तेथा न बाद यीशुए जोरा सेंधे बोलू, “जुणी हागगै शुणनै रै कोन सी ते, ठीक ढेंधे शुणा होर तेथा रा पालन केरा।”

### कैथा रा मतलब

(मती 13:10-17; मरकुस 4:10-12)

<sup>9</sup> चेलै यीशु ना एसा कैथा रा मतलब पुछू। <sup>10</sup> तैबे यीशुए तिन्हा बै जवाब धिना, “तुसाबै परमेशवरै रै राज्य रै भेदें री सोमझ धिनी दी सा पर होरी बै ए कैथा ना दैसीया सा; ताकि ते हेरिया बी नी हेरलै होर शुणीया बी नी सोमझलै।

<sup>11</sup> एसा कैथा रा मतलब ऐ सा बेज़ा परमेशवरा रा वचन सा ।

<sup>12</sup> किछ लोका बौतै रै बौद्धा ना पोए दै बेजै साही सी। ऐ लोका परमेशवरा रा वचन ता शुणा सी पर शैतान एज़ीया तिनरै मना ना तेइ वचना बै नेआ सा ताकि तिन्है वचना पांधे बशाह केरिया मुक्ति नी पाई लोडी।

<sup>13</sup> किछ लोका रडखडी ज़मीना पेंधे पोए दै बेजै साही सी, ते परमेशवरा रा वचन ता शुणा सी होर वचना बै खुशी सेंधे ग्रहण बी केरा सी पर वचन तिनरै मनै री गहराई तक नी पुजडै री वजहा सेंधे ते थोडी देर ता बशाह केरा सी पर जैबे मुश्कला एजा सी ता ते तेइ वचना पेंधे बशाह नी रखदै।



यीशु औढे बै शान्त केरा सा (8:24)

14 किछ लोका तेई झौकड़ा मुँडै पौरे दे बैजे साही सी, ते लोका वचन ता शुणा सी होर ग्रहण भी केरा सी पर आगे चैलदैं-चैलदैं ते चिंता ना, धैन-दौलता ना होर जिन्दगी री मौज-मस्ती ना फसा सी, होर तेतै री बजहा सँधे ते परमेशवरा बै खुश केरना रा कौम नी केरदैं।

15 पर किछ लोका शोभली जमीना साही सी ते सचै होर भलै मनै वचना बै शुणिया ग्रहण केरा सी होर ते शौ गुणा फौल आणनू आए बुटै साही परमेशवरा बै खुश केरना रा कौम केरदैं रौहा सी।

### दियै रा उदाहरण

(मरकुस 4:21-25)

16 कोई भी माणहु दियै पकेईया भाँण्डे लाइया नी खौटदा, होर ना ता तेईबै मांजे थालै रखदा, पर दियै बै पकेईया उथड़ी जैगा पँधै रेखा सी ताकि भीतरै एणु आरे बै पयाशा होला। 17 किबैकि किच्छ भी छिपु दा नी आँथी जुण

पयाशैना नी आंणीना, होर ना कोई गुप्त गला सी जे प्रगट नी होंगी। 18 एबै होशियार रौहात् कि तुसै कौस रीतियै मेरी गैला शुणा सी? किबैकि जुणी हाग्गै सा तेइबै होर भी देणा, होर जुणी हाग्गै नी आँथी तेइना स बी वापस मुंगिणा जुणीबै स आपणा बुझा सा।

### यीशु री आमा होर भाई

(मती 12:46-50; मरकुस 3:31-35)

19 एक रोज यीशु री आमा होर भाई तिन्हा बै मिलदैं आए। पर भीडे री वजहा सँधे तै तिन्हा हाग्गै नैई पुजी सकै। 20 तैबै कौसीयै तेइबै बोलू, “तूसरै आमा होर भाई बाहरै खेइँ सी: ते तूसा सँधे मिलणा चाहा सी।” 21 तैबै तेइयै जबाब धिन्हा, “मेरी आमा होर भाई ता ऐ सी जे परमेशवरा रा वचन शुणा सी होर तिन्हा पँधै चैला सी”

### यीशु औढ -काठा बै शाँत केरा सी

(मती 8:23-27; मरकुस 4:35-41)

22 एक रोज यीशु आपणै चेलै सँधे एकी किशित ना चैढे होर यीशुए चेलै बै बोलू, “एजा आसा झीला पारा बै जांणा।” तैबै तिन्है किशित खोली होर ते जांदै लागै। 23 जैबै ते किशित चलांदे लागै ती तैबै यीशु सुतै दै ती। झीला ना औढ-काठा आऊ होर किशित पांणी सँधे भौरीदी लागी होर तिन्हरी जिन्दगी खतरै ना पौई। 24 तैबै तिन्है भेटी एजीया यीशु बजौयै (जगायै) होर बोलू, “गुरुजी-गुरुजी आसा बै बचात् आसै नाश होंदें लागै दै सी।” तैबै यीशुए औढ-काठा बै बोलू शाँत हो होर स शाँत हुआ। 25 तैबै यीशुए तिन्हा बै बोलू, “तूसै बशाह किबै नी

केरू?" ते डोरै होर हैरान होइया आपु ना बोलदै लागै, "ऐ कुण सा जे बागर होर पांणी बै बी आज्ञा(हुकुम) देआ सा होर ते ऐइरी मैना सी।"

**यीशु चेटु फैसूदै माणहु बै ठीक केरा सी**

(मती 8:28-34; मरकुस 5:1-20)


26 तैबै ते गिरासेनियै रै तेइ शैहरा ना पुजै जुण गलील झीलै रै पूर्व दिशा ना ती। 27 जैबै यीशु बौदा पैंधे किस्ती ना उतरै ता तिन्हा बै तेई शैहरा रा एक माणहु मिलू जुणिबै चेटु फैसैदे ती। स बौहू रोजा ना झीकडै(कपडै) नीती लांदा होर ना घौरा ना नीती रौहदा, स शमशान घाटा ना रौहा ती। 28 जैबै तेइयै यीशु हेरू ता स क्रीजा मारदा लागा होर तेइरै सामनै लोमै पौड़िया जोरा सेंधे बोलू, "हे परमप्रधान परमेश्वरै रै बेटै यीशु, मेरा होर तेरा की संबंध सा। हांउ तुसा हागगै विनती केरा सा मुँवै कष्ट मता दँदै।" 29 किबैकि यीशु तेसा बुरी आत्मा बै तेई माणहु ना फेटे जाणै री आज्ञा दँदै लागै ती किबैकि स बुरी आत्मा तेई माणहु बै घेड़ी-घड़ियै आपणै बैशा ना केरा ती। लोका तेइबै शाँगीयै होर बेड़ियै लाइया बोना ती। पर स तिन्हा शाँगी होर बेड़ी बै चोड़ा ती होर स चेटु तेइबै एकांत जैगहा ना भगा ती। 30 यीशुए तेइना पुछू, "तेरा नाँ की सा?" तेइयै बोलू "सेना" किबैकि तेइबै बोहु सारी बुरी आत्मा फैसी दी ती। 31 तैबै चेटुए यीशु बै बोलू, "आसाबै नरकै रै कुण्डा बै जाणै री आज्ञा मता दँदै।" 32 तौखे ढौगा ना सुअरा रा एक छुण्ड चौरदा लागा दा ती। चेटुए यीशु हागगै विनती केरी कि आसाबै इन्हा सुअरा बै फसणै री आज्ञा दैआत्। यीशुए

ते चेटू सुअरा बै जाणै धिनै। 33 तैबै स चेटू तेई माणहु ना नीकलीया तिन्हा सुअरा बै फैसू होर स पूरा छुण्ड ढौगै भयांउ झीला बै पौउ होर स खत्म हुआ। 34 सुअरा चारनू आए ऐ सब हेरिया भैगै होर गाँ ना होर औरी-पौरियै रै भागा ना जाइया होरी बै बी दैसू। 35 लोका ऐ सब हेरदै आए होर तिन्है स माणहु झिकडै लाया यीशु री जौंघा हागगै सचेत बठा दा हेरू होर ते डोरै। 36 हेरनू आए सैभी लोकै तिन्हा बै दैसू कि ऐ माणहु कण्डे तरहै ठीक हुआ। 37 तैबै गरसेणी रै औरा-पौरलै सैभी लोकै यीशु हागगै तौखना फेटे जाणै री तँइयै विनती केरी। किबैकि तिन्हा बै बड़ी डोर पौई। यीशु झीला ना पार जाणै री तँइयै किश्ति ना बठै। 38 जुणी माणहु ना यीशुए चेटू खोलू ती स यीशु हागगै विनती केरदा लागा, "मुंबै आपू सेंधे एणै दै।" पर यीशुए तेइबै विदा केरिया बोलू; 39 "तू आपणै घौराबै जा होर लोका बै दैस कि परमेश्वरै तेरी तँइयै कँण्डा अदभुत कोम केरूदा सा।" स माणहु गाँ ना जाइया सैभी लोका बै दैसदा लागा कि यीशुए मेरी तँइयै काण्डे बड़ै-बड़ै कोम केरै।

**यीशु याईरै री मुँईदी बेटी होर एक बीमार बेटड़ी बै ठीक केरा सा**

(मती 9:18-26; मरकुस 5:21-43)

40 यीशु जैबै वापस आए ता लोकै तिन्हरा स्वागत केरू होर खुशी-खुशी तिन्हा सेंधे मिलै, किबैकि ते बड़ी बेसब्री सेंधे तिन्हरा इंतजार केरदै लागै दै ती। 41 तैबै याईर नाँ रा एक माणहु यीशु हागगै आऊ जो कि धर्म सभा घौरा



यीशु याइरै री बेटी बै ज़िन्दा केरा  
सा (8:54)

रा मुखिया ती स यीशु री ज़ाँघा पेंधे पौऊ होर विनती केरदा लागा कि मेरे घौराबे चोला। 42 किबैकि मेरी ऐके बेटी सा जो बारा बौषे री सा होर स मौरनू आई सा। ज़ैबे यीशु जांदै लागै दे ती तैबे बौहु सारै लोका तिन्हा सेंधै ती। 43 तौखेँ एक बेटड़ी ती जुणीबे बारा बौषा ना लोहु बेंहणै री बीमारी ती, होर तेसै आपणी सारी कमाई लाजी ना खर्च केरी ती। तैबे बी स ठीक नी हुई। 44 तेसै पीछे ना एजीया यीशुरा कुरता छुंगू होर तेसरा लोहु बेंहणा एकदम बंद हुआ। 45 तैबे यीशुए बोल्, “हाँऊ कुणीयै छुंगू?” ज़ैबे सब लोका शुणीया मुकरदै लागै, तैबे पतरसे होर तेइरै सेंधीयै बोल्, “ओ स्वामी, बोहु भीड़ै रै कारण लोका तुसावै छुंगदै लागै सी।” 46 पर यीशुए बोल्, “कौसीयै हांड छुंगू सा, किबैकि मुंबे पता चलू होर मुं ना सामर्थ निकती।” 47 ज़ैबे तेसै बेटड़ीए हेरू की हाँऊ छुपी नी सकदी स डौरा होर कोमदै-कौमदै यीशु री ज़ाँघा पेंधे पौई। तैबे तेसै सैभी लोका सामनै देसू, तेसै कुणी बज़हा सेंधे ते छुंगे होर स काण्डे बीमारी ना एकदम ठीक हुई। 48 यीशुए तेसाबै बोल्, “बेटी तेरै बशाहै

तू ठीक केरी, शोभली तैरहै घौराबै जा।” 49 ज़ैबे यीशु एण्डा बोलदै लागै ती तैबे कौसीयै सभा घौरा रै मुखयै रै ओखा ना एजीया बोल्, “तेरी बेटी मुँईदी सा, ऐबे गुरु बै कष्ट मता देंदै।” 50 पर ज़ैबे यीशुए ऐ शुणू ता तिन्हाबै ज़बाब धिना, “बिल्कुल मत डौरदा, बशाह रख ता तेसा ठीक होंगा।” 51 ज़ैबे ते तेई घौरा बै पुजै ता यीशुए पतरस, यूहन्ना, याकूब होर तेसा शोहरी रै आमा-बापू छौडिया होर कोई आपु सेंधे भीतरे नी एणै धिनै। 52 सैबे लोका तेसरी तेंइयै रौंदै लागै ती, पर यीशुए तिन्हा बै बोल्, “रौंदै मता; स मूँइदी नी आँथी, पर सौंदी लागी सा।” 53 ते जाणा ती की ऐ मुँइदी सा यीशु रा मज़ाक उड़ंदै लागै। 54 पर यीशुए तेसरा होथ ढौंकिया बोल्, “हे बेटी उठा।” 55 तैबे स ज़िन्दी हुई, होर स एकदम खैड़ी हुई, तैबे यीशुए तिन्हा बै बोल् ऐसा बै किच्छ खाणै बै दैआत। 56 तेसरै आमा-बापू हैरान हुए, पर यीशुए तिन्हा बै आदेश धिना जे किच्छ ओखै हुआ सा कोसीबै हेरेइत दैसदै।

**यीशु आपणै बारा चेलै बै भेज़ा सी**

(मती 10:5-15; मरकुस 6:7-13)

**9** एक रोज़ यीशुए आपणै बारा चेलै शाधै होर तिन्हा बै सब चेटू होर हर किस्मै री बिमारी बै दूर केरनै री शक्ति होर हक धिना । 2 तैबे ना बाद यीशुए ते परमेश्वरै रै बारे ना प्रचार केरदै होर बीमारा बै ठीक केरदै भेजै । 3 तिन्हाबे भेजदी घेरै यीशुए तिन्हा बै बोल्, “बौतै री तेंइए किछ मतेइत् नेंदै, ना शोठा, ना रोटी, ना झोआ ना ढैबुए होर ना दुई-दुई कुरतै। 4 जुणी बी घौरा बै तुसै जानै,

जाँ ढौई तुसै तेई गाँ ना प्रचार करलै ता तेही घौरा ना रौहीत्। <sup>5</sup>जुँणी गाँ ना लोका तुसाबै ग्रहण नी करलै ता, तेई गाँ न निकल्दी घैरै आपणी जाँघे रै धुड़ै बै ठुड़केइत् ताकि सौ धुडा तिन्हाबै चितारुणी देला कि परमेश्वरा तिन्हाबै सजा देणी। <sup>6</sup>तैबै तिन्है चेलै गाँ-गाँ ना जाइया परमेश्वरै रै राज्य रै बारै ना दसू होर कई बीमार लोका तिन्हरी बिमारी ना ठीक करै।

### राजै हेरोदेसै री परेशानी

(मती 4:1-12; मरकुस 6:14-29)

<sup>7</sup>गलील जिल्लै रै हेरोदेस राजै जैबै यीशु रै इन्हा सैभी कोमे रै बारै ना शुणू ता स डौरू, किबै कि किछ लौकै बोलू कि बपतिस्मै देणू आला यहुन्ना मुँएँदै ना जिनदा हुआ सा। <sup>8</sup>किछ होरी लोकै बोलू भविष्यवक्ता एलिय्याह हेरूआ सा, किछ होरी लोकै बोलू, कि पराणै भविष्यवक्ता ना कोई जिनदा हुआ सा। <sup>9</sup>पर हेरोदेस राजै बोलू, यहुन्ने री ता में मुँडी द्याई ती काटणै, ऐबै ऐ कुण सा, जुणी रै बारै ना हाँऊ ऐण्डी गैल्ला शुणदा लाग़ा सा। होर हेरोदेस तेई बै हेरना चाहा ती।

### यीशुए पौंज हज़ार माणहु न रोटी ख्याई

(मती 14:13-21; मरकुस

6:30-44; यहुन्ना 6:1-14

<sup>10</sup>तैबै ते बारा चेलै वापस आए होर जे किछ तिन्है केरू ती, स यीशु बै दैसू होर ते यीशुए लग केरिया बैतसैदा शहरा बै नेऐ। <sup>11</sup>पर ऐ ज़ाणिया लोकै री भीड़ यीशु पिछै हुई होर यीशु खुशी-खुशी तिन्हा सँघे मिलै, होर तिन्हा बै परमेश्वरै

रै राज्य रै बारै ना दसदै लागै होर जो ठीक होणा चाहा ती ते ठीक करै। <sup>12</sup>जैबै ध्याड़ा ओऊड़दा लाग़ा ता ते बारा चेलै आयै होर यीशु बै बोलू, “गुरु जी, लोकै री भीड़ा बै बिदा केरात् ताकि ए औरैलै-पौरैलै गाँ ना जाइया आपणै खाणै होर रौहणै रा इंतजाम करलै, किबैकि आसै ओखै सुनसान ज़ैगा न सी।” <sup>13</sup>तैबै यीशुए तिन्हा बै बोलू, “तुसै इन्हरै खाणै रा इंतजाम केरा। चेलै बोलू, “आसा हागगै पौंज रोटी होर दूई मौँछी केल्ही सी।” अगर आसै जाइया इन्हा सैभि बै रोटी लेइया आणलै ता होई सका सा, पर ए लोका ता लगभग पौंज हज़ार मर्द सी। <sup>14</sup>तैबै यीशुए आपणै चेलै बै बोलू, “इन्हा बै पजाह-पजाह री गिद्धी ना बशात्। <sup>15</sup>तिन्है ते सारै माणहु गिद्धी न बशाए। <sup>16</sup>तैबै यीशुए ते पौंज रोटी होर दुई मौँछी मुँगी होर सर्गा धिरावै हेरीया धन्यवाद केरू होर रोटी चोड़ी-चोड़िया चेलै बै दैदै लागै होर चेलै लोका बै गिद्धी ना बाँडदै लागै। <sup>17</sup>तैबै सभै लोका रोटी खाइया रौंजै होर चेलै बची दी रोटी री बारा टोकरी भौरिया चैकी।

### पतरस यीशु बै मसीह मना सा

(मती 16:13-20; मरकुस 8:27-30)

<sup>18</sup>जैबै यीशु एकान्त ज़ैगा ना प्रार्थना केरदै लागै दै ती होर तिन्हरै चेलै भी सँघे ती ता यीशुए तिन्हा ना पुछू, “मुँबै लोका की बोला सी?” <sup>19</sup>तिन्है जवाब घिना, “यहुन्ना बपतिस्मा देणू आला होर कोई बोला सी ‘एलिय्याह, होर किछ बोला सी कोई पराणै भविष्यवक्ता ना जिनदा हुआ सा।’” <sup>20</sup>यीशुए तिन्हा बै बोलू, “पर तुसै मुँबै की बोला सी?”

पतरसै जवाब धिना, “तुसै परमेश्वरै रै मसीह सी।” 21 तैबै यीशुए तिन्हा बै बोलू, “ध्यान डाहीत् एसा गैला कौसी बै हेरेइत दसदै।”

**यीशु आपणै मौरनै होर ज़िण्डै होणै रै  
बारै ना भविष्यवाणी केरा सा**

(मती 16:21-23; मरकुस 8:31-33)

22 तैबै यीशुए बोलू, “माणहु रै बेटै री तैइयै यानिकी मेरी तैइयै ऐ ज़रूरी सा कि हाँऊ दुःख च़ेकनू होर बजुर्ग, महापुजारी, होर धर्मविधि सिखाणू आल्ले मँबै नीच समझिया मारलै होर हाँऊ त्रीजै ध्याड़ी ज़िंदा होनू।”

**यीशु पिछ्छे आँढणै रा मतलब**

(मती 16:24-28; मरकुस 8:34-9:1)

23 तैबै यीशुए सैभी बै बोलू, “अगर कोई मेरा चेला बैणना चाहा सा स आपणा नाँह केरला होर हर रोज़ आपणा क्रूस च़ैकिया आपणै दुःख सौहणै री तैइयै त्यार रौहला।” 24 किबैकि जुण आपणी जाःन बचाणा चाहला तेई स गँवाणी, पर जुण मेरी तैइयै आपणी जान गवाला ता तेई स बचाणी। ” 25 एसा गैला रा की फायदा कि माणहु सारी दुनिया बै प्राप्त केरला होर आपणी जाःन गँवाला ?” 26 जुण माणहु मूँ ना होर मेरी गैला ना शर्मिया सा, ता माणहु रा बेटा यानिकी हाँऊ ज़ैबै बी आपणी होर आपणै बापू री होर पवित्र स्वर्गदुतै री महिमा ना ऐनु ता मूँ बी तेई माणहु ना शर्मिणा। 27 हाँऊ तुसाबै सच बोला सा, जे औखै खडै सी, तिन्हा मौँझै किछ्छ एण्डे सी जो परमेश्वरै रै राज्य हैरनै ना पहले नी मौरना।’

**यीशु रा दिव्य रूप**

(मती 17:1-8; मरकुस 9:2-8)

28 यीशु री इन्हा गल्लै रै औठ रोज़ा बाद यीशु, पतरस याकूब होर यहुन्ना सँधे प्रार्थना केरदै एकी ढौगा पँधे नौँठे। 29 ज़ैब यीशु प्रार्थना केरदै लागै ती ता तिनरा रूप बदलुआ होर झिकडै शेतै होइया च़मकदै लागै। 30 होर च़ानक मूसा होर एलिय्याह दुई माणहु तौखै तिन्हा सँधे गैला केरदै लागै ती। 31 ते दूए आपणि पूरी शक्ति सँधे हेरुए होर यीशु रै मौरनै रै बारै ना च़र्चा केरदै लागै दै ती, जे यरूशलेम शैहरा ना होणु आई ती। 32 तेई बौकतै पतरस होर तेइरै सँधी नीजा ना ती पर ज़ैबै ते पुरी तरहा विउदै ता तिन्है यीशु री महिमा तिन्हा दुई माणहु सँधे हेरी जो तेई सँधे खडै ती। 33 ज़ैबै मूसा होर एलिय्याह यीशु हागै न ज़ानदै लागै ता पतरसै बोलू, “हे स्वामी, आसरा औखै रौहणा केतरा शोभला सा: आसा वै ज़ाजत दैआ कि आसा औखै त्रा वेदी बणाणी, एक तुसरी तैइयै, एक मूसा बै होर एक एलिय्याह री तैइयै।” स नी ती ज़ाणदा कि स की बोलदा लागा सा। 34 पतरस आज़ी बोलदा लागा ती कि ते एकी बादलै घेरै होर ते डौरदै लागै। 35 तैबे बादाला मुँझै ना ऐ आकाशवाणी हुई, “ऐ मेरा प्यारा बेटा सा, तुसै एईरी शुणा, किबै कि ऐ में चुनुदा सा।” 36 एसा आवाज़ होए न बाद यीशु केल्हा ती, च़ेले चुप रौहै, होर जे किछ्छ तिन्है हेरु ती स तिन्नै तिन्हा धियाडै न कौसी बै नी दैसू।

**यीशु चेटू फैसू दै शोहरू बै ठीक केरा सा**

(मती 17:14-18; मरकुस 9:14-27)

37 दुजै ध्याड़ी जैबै यीशु ढौगा पैंधे ना भ्याऊँ आए ता लोकै री एक बोहू बड़ी भीड़ तिन्हा सेंधे मिली। 38 तब भीड़ा मुँड्रै न एकी माणहुए ज़ोरा सेंधे बोलू, ओ गुरु जी, हाँऊ तुसा हागगै विनती केरा सा, जी बाँण केरिया मरै बेटै पैंधे दया केरा किबै कि स मेरा, केल्हा बेटा सा। 39 तेइबै एक चेटू री आत्मा ढौका सा होर स एकदम क्रींजा मारा सा। स चेटू री आत्मा तेईबै एतरा मरोड़ा सा कि तेई रै मुँहा न शफ भौरिया सा होर स बड़ी मुशकिला सेंधे तेईबै छौड़ा सा। 40 में तुसरे चेलै हागगै विनती केरी ती कि ते तेई चेटू बै खोललै पर ते खोली नी सकै। 41 यीशुए ज़वाब धिना, “हे बशाह नी केरनू आए होर हठी लोको, मूँ कदी तक तुसा सेंधे रौहणा होर तुसरी सौहणी?” आपणै बेटे वे औखै आण।” 42 स शौहरू ऐंदा लागा ती कि चेटूए स मरोड़ होर छाटू पर यीशुए चेटू री आत्मा झिड़की होर स शोहरू ठीक केरिया तेईरै बापू रै हवालै केरु।

**आपणी मोऊती रै बारै ना यीशु  
दबारा भविष्यबाणी केरा सा**

(मती 17:22-23; मरकुस 9:30-32)

43 तैबै सैबै लोका परमेश्वरै री महाशक्ति न हैरान हुऐ। पर जैबै यीशु रै इन्हा कोमा ना सारै लोका हैरान ती ता यीशुए आपणै चेलै बै बोलू: 44 तुसै इन्हा गैला पैंधे ध्यान दैआत, “किबैकि माणहु रा बेटा यानिकी हाँऊ माणहु रै हौथै ढौकिणू आ सा।” 45 पर ए गैला चेलै नी

सोमड़ी किबैकि परमेश्वरै ए गैला तिन्हा ना गुप्त रखी होर चेलै यीशु ना पुछणै बै डौरा ती।

**सैभी ना बड़ा कुण सा ?**

(मती 18:1-5; मरकुस 9:33-37)

46 तैबै चेलै एसा गैला पैंधे बहस केरदै लागै कि सैभी ना बड़ा कुण सा? 47 यीशु तिन्हरी मनै री गल जाणी होर एक शोहरू आपू हागगै खड़ा केरु। 48 तैबै यीशुए आपणै चेलै बै बोलू, जुण एई शौहरू बै मरै नाँ ना ग्रहण केरा सा स मुँबै ग्रहण केरा सा होर जुँण मुँबै ग्रहण केरा सा स जुणियँ हाँऊ भेजू सा तेईबै ग्रहण केरा सा। तुसा मुँड्रै जुण सैभी ना होछा सा स सैभी न बड़ा सा।

**ज़ो बरोधा ना नी, स पक्षा ना सा**

(मरकुस 9:38-40)

49 तैबै युहन्नै यीशु बै बोलू, “स्वामी; आसै एक माणहु तेरै नाँ ना चेटू खोलदा हेरु। आसै तेइबै नाँह केरु किबैकि स आसरी मण्डली रा नी आँथी।” 50 पर यीशुए बोलू, “तेई बै नाँह मता केरदै, किबैकि जुण तुसरा बरोधी नी आँथी स तुसा सेंधे सा।”

**सामरी लोका यीशु रा बरोध केरा सी**

51 जैबै यीशु रै स्वर्गा बै ज़ाणै रा बौक्त नेड़ आऊ ता तिन्है यरुशलैमा बै जाःणै रा पक्का फैसला केरु। 52 यीशुए आपू ना आगै किछ माणहु सामरी रै ग्राँ बै जगहा तयार केरदै भेजै। 53 पर तेई ग्राँ रै लोकै यीशु तौखै रूकणै नी धिनै। 54 एसा गल्ल हेरिया यीशु रै चेलै याकूब होर युहन्नै बोलू, “गुरु जी, कि तुसै



चाहा सी कि आसै हुकुम देइया सर्गा न  
 और शढ़ाइया इन्हा बै फुकलै?" 55 पर  
 यीशुए तिन्हा धिराबै बै फिरिया बोलू,  
 "तुसै नी ज्ञाणदैं कि तुसै कैण्डी आत्मै  
 रै सी, किबैकि माणहु रा बेटा लोके रै  
 प्राणा बै नाश कैरदा नी आऊदा, बल्कि  
 बचाणै री तेंइयै आऊ सा।" 56 तैबै ते  
 कौसी होरी गाँ बै नौठै।

### यीशु रै चेलै बैणने री कीमत

(मती 8:19-22)

57 जबै ते बौतै आधे जाँदै लागै दै  
 ती ता कौसिए यीशु बै बोलू, "तूसै  
 जौखे-जौखे जालै, मूँ तुसा पिछै-पिछै  
 एणा।" 58 यीशुए तेइबै बोलू, "गीदइ होर  
 चिड़-चाकरू री भी रौहणै री जैगा होआ  
 सा, पर माणहु रै बेटै हागगै मुण्डी छुपाणै  
 बै भी जगहा नी आँथी।" 59 यीशुए दुजै  
 माणहु बै बोलू, "मूँ पिछै एज होर मेरा  
 चेला बैण। स राजी हुआ, होर यीशु बै  
 बोलू, "गुरु जी, मुँबै पहलै जाणै दैआत्  
 कि हाँऊ आपणै बापू बै पौथिया एनू।" 60  
 यीशुए तेइबै बोलू, "तिन्हा लोका बै  
 मुरदैं पौथणै दै जुणा परमेश्वरै री नजरी  
 ना मँए सी। पर तू ज़ाइया परमेश्वरै रै  
 राज्य रै बारै ना लोका बै दैसा।" 61 एकी  
 होरी माणहुए यीशु बै बोलू, 'प्रभु जी, मूँ  
 तुसा पिछै एणा होर तुसरै चेलै बैणना  
 पर पहलै मुँबै आपणै परिवारा ना विदा  
 लेणै दैआ।" 62 यीशुए तेइबै बोलू, "जुण  
 माणहु हौआ पँधै हौथ रखिया पिछै हेरा  
 सा स परमेश्वरै रै राज्य रै लायक नी  
 आँथी।"

### यीशु आपणै सत्तर चेलै बै भेजा सी

**10** 1 एता न बाद यीशुए सत्तर होर  
 माणहु चुनै होर जुणी-जुणी जैगा  
 बै यीशु आपु ज़ाणू आए ती तिन्हा जैगा  
 बै ते दुई-दुई केरिया आपु ना आगै-आगै  
 भेजे। 2 यीशुए तिन्हा बै बोलू, "पौकी  
 दी फसल ता बोहू सा पर काटणू आरे  
 मज़दूर थोड़ै सी, एबै छेतै रै मालका  
 हागगै विनती केरा कि स आपणी फसल  
 काटणै री तेंइयै मज़दूर भेजला। 3 एबै  
 ज़ाआत् पर याद रखा, कि हाँऊ तुसाबै  
 भेड़ियै रै बिचा ना भेड़ा साही भेजा सा।  
 4 तुसै ज़ांदी घेरै आपु सँधै ना डैबुए, ना  
 झोआ किछ मतेईत पांदै औखै तक कि  
 बूटै री बी दुई ज़ोड़ी मतेईत पांदै। बौता  
 न ज़ांदी घेरै कौसी बै नमस्तै हेरेईत  
 केरदैं। 5 जुणी बी घौरा बै तुसै ज़ालै ता  
 सैभीना पहलै बोलेइत, एई घौरै रै लोका  
 पँधै परमेश्वरै री शान्ति लोड़ी बैणी  
 रौही। 6 तेई घौरा ना अगर परमेश्वरै री  
 शान्ति पाणै लायक कोई माणहु होला  
 ता शान्ति तेई पँधै ठैहरनी नैई ता स  
 शान्ति तुसा हागगै वापस एणी। 7 होर  
 तेही घौरा ना रौहीत। जे किछ बी तुसा  
 बै देलै तेई खाईत्। किबैकि मज़दूरा बै  
 तेइरी मज़दूरी मिलणी जरूरी सा। 8 जुणी  
 भी शैहरा बै तुसै ज़ालै होर तौखलै लोका  
 तुसरा स्वागत केरलै ता जे किछ बी ते  
 तुसा सामनै खाणै री तेंइयै रखलै ता  
 तुसै तेई खाईत्। 9 तौखे जे बिमार माणहु  
 होलै तिन्हा बै ठीक केरेइत् होर तिन्हाबै  
 बोलेइत्, परमेश्वरा रा राज्य तुसा हागगै  
 पुजू सा। 10 पर जुणी शहरै रै लोका  
 तुसा बै ग्रैहण नी केरलै ता तेई शहरै रै  
 बज़ारा ना ज़ाइया बोलेइत्, 11 'आसरी

जोंघा ना तुसरै शहरा रा जे धूड़ा लाग़ा सा आसै तेइबै ठुड़का सी पर तैबै बी तुसै ज़ाणी लेआ कि परमेश्वरा रा राज्य तुसा सामनै सा।<sup>12</sup> हाँऊ तुसा बै बोला सा कि न्याय रै रोज़ा ना परमेश्वरा सदोम शहरा बै जे सज़ा देणी तेथा ना बी ज़ादा सज़ा परमेश्वरा एई शहरै रै लोका लोका बै देणी।

### बशाह नी केरनु आरे बै च़िताउणी

(मती 11:20-24)

<sup>13</sup> हे, खुराज़ीन होर बैतसैदा न रौहनु आलै लोको तुसाबै भयानक सज़ा मिलणु आई सा किबैकि जे च़मत्कार में तुसा बिचा ना केरै ते च़मत्कार अगर में तूर होर सिदोना ना केरै होंदै ता ते लोका कबकै टाटै लाइया खोटुइया होर आपू पेंधे छार मौइया आपणै पापा बै छौइदै।<sup>14</sup> पर न्याय रै रोज़ा ना परमेश्वर तूर होर सिदोनै रै लोका बै जे सज़ा देणी तेथा ना बी ज़ादा सज़ा परमेश्वरा तुसा बै देणी।<sup>15</sup> हे कफ़रनहूमा ना रौहणू आरे लोको तुसा कि सर्गा ढौई उथड़ै केरिना? तुसा ता नरका ढौई निशटै केरिना।<sup>16</sup> “जुण बी तुसरी गैला बै शुणा सा, स मेरी गैला बै शुणा सा होर जुण बी तुसाबै तुच्छ ज़ाणा सा, स मुंबै तुच्छ ज़ाणा सा, होर जुण मुंबै तुच्छ ज़ाणा सा, स मेरै भेज़णु आरे बै तुच्छ ज़ाणा सा।”

### यीशु रै सत्तर चले वापस एज़ा सी

<sup>17</sup> ते सत्तर माणहु खुशी मनांदे-मनांदै वापस आरे होर बोलदै लागै, “ओ प्रभु जी, ज़ैबै आसै तुसरा नाँ लेआ ती ता

चेटू बी आसरी मैनी।<sup>18</sup> तैबै यीशुए तिन्हा बोलू, “में ता शैतान स्वर्गा ना शौद्धा हेरू।”<sup>19</sup> शुणा, में तुसाबै शैतानै री सारी शक्ति पेंधे हक धिना सा; कि तुसा बिच्चु होर कीड़े आपणी जोंघे लाइया दबाणै होर कौसी चीज़े लाइया तुसरा किछ नुक्सान नी होणा।<sup>20</sup> बुरी आत्मा तुसरै हुक्मा बै मना सी एसा गैला न तुसै खुश मता होंदै, “तुसै एसा गैला ना खुश होआ कि तुसरै नाँ स्वर्गा ना लिखुए सी।”

### यीशु खुश होआ सी

(मती 11:25-27; 13:16-17)

<sup>21</sup> तेई बौक्तै यीशु आत्मा न भौरूईया खुश हुए होर बोलू, “ओ बापू जी स्वर्ग होर धौरती रै प्रभु; हाँऊ तुसरा धन्यवाद केरा सा, कि तुसै ऐ गैल्ला समझदार होर जानी माहणू ना छुपाईया रैखी, होर शोहरू पेंधे प्रगट केरी, किबैकि तुसा बै ऐ शोभला लाग़ा।”<sup>22</sup> मेरै बापुए इन्हा सारी गैल्ला रा अधिकार मुंबै धिना सा। एसा गैला बै कोई नी ज़ाणदा कि बापु कुण सा, सिर्फ़ बेटा ज़ाणा सा होर एसा गैल्ला बै बी कोई नी ज़ाणदा कि बेटा कुण सा सिर्फ़ बापु ज़ाणा सा। बेटा जुणी पेंधे बापु बै प्रगट केरना चाहला केरी सका सा।<sup>23</sup> ज़ैबै यीशु रै च़ेलै तेई सेंधे ती ता यीशुए च़ेलै धिराबै फिरिया बोलू, “धन्य सी ते ओछी जे इन्हा गैला बै हेरा सी जुणीबै तुसै हेरा सी।<sup>24</sup> किबैकि हाँऊ तुसा बै बोला सा, “बोहू भविष्यवक्तै होर राज़े ए गैल्ला हेरनी चाही, जे तुसै हेरी पर ते हेरी नी सकै, होर शुणनी चाही पर शुणी नी सकै।”

### शोभला पड़ेशी

25 एक रोज पवित्र शास्त्रे र नियम सिखाणू आला एक जाणकार माणहु यीशु री जाँच केरने री तेंडयै खडा हुआ होर बोलू, “गुरु जी अमर होंगे री तेंडयै हाँऊ की केरनु?” 26 यीशुए तेई पँडता बै बोलू, “पवित्र शास्त्रा ना की लिखू दा सा ? तुसै तेइवै काँण्डै पौढा सी?” 27 पँडते जवाब धिना, “पवित्र शास्त्रा ना ए लिखू सा तूसै आपणै प्रभु परमेश्वरा बै पूरे मेना सेंधे, आपणै सारै प्राण, आपणी सारी शक्ति होर आपणी सारी बुद्धी सेंधे झुरी केरा होर आपणै पड़ेशी बै आपु साही झुरी केरा। 28 यीशुए तेई पँडता बै बोलू, “तुसै ठीक बोलू, ऐण्डा केरलै ता तुसा सदा जिंदै रोहणा।” 29 पर तेई पँडितै आपणै-आपु बै धर्मी सोचिया यीशु ना पुछू, “मेरा पड़ेशी कुण सा ?” 30 यीशुए ऐ उदाहरण बोलिया तेईबै जवाब धिना, “एक यहूदी माणहु यरूशलेम शैहरा ना यरिहो शैहरा बै ज़ाँन्दा लागा ती। बाँता ना डाकुए तेई पेंधे हमला केरू। तिन्है तेइरै झीकडै खोलै होर तेइबै मारी कुटिया, नंगा केरिया तेइबै अधमुँए छौडिया तौखै ना भैगै। 31 तैबै एक यहूदी पुजारी तेसा बाँतै आऊ। जैबै तेइए स डाकुए मारूदा माणहु हेरू ता स बाँता ना दुजी धिरिरे मुडिया भैगू। 32 थोड़ी देरी बाद यरूशलेम मन्दिरा ना कौम केरनू आ एक लेवी तेसा बाँतै आऊ होर सौ बी तेई हेरिया तेसा बाँता ना आगै बै भैगू। 33 किछ देरी बाद सामरी जिल्लै रा एक माणहु तेसा बाँतै आऊ। जैबै तेइयै डाकुए मारूदा स माणहु हेरू ता तेइबै तेई पेंधे दैया आई। 34 तेई सामरी माणहुए

तेइ मारूदै माणहु हागै जाइया दाखरसा सेंधे तेइरै जख्म धोए होर पट्टी बोनी। तैबै तेई सामरिरे स आपणै घोडै पेंधे बशाईया एकी सराय बै नेऊ होर तेइरी सेवा केरी। 35 दुजे रोज तेई सामरिये सराय रै मालका बै दूई चांदी रै सिक्के धिनै होर बोलू, एइरी सेवा-टहल केरेई जे किछ तेरा होर खर्चा होला हाँऊ तौभे वापस एजिया देनू। 36 तुसरी सोमझै रै मुताबिक डाकुए मारूदै माणहु सेंधे तिन्हा त्राइ ना कुणिए शोभलै पड़ेशी रा फर्ज निभाऊ? 37 पँडते बोलू, “जुणिये तेई पेंधे दैया केरी।” यीशुए तेई पँडता बै बोलू, “तुसै बी जाइया ऐण्डा ऐ केरा।”

### यीशु मार्था होर मरियमै रै घौरा ना

38 यीशु होर तिन्हरै चलै सफर केरदै-केरदै यरूशलेमै रै एकी गाँ बै नाँठे। तेई गाँ री मार्था नाँ री एकी बेटडिरे आपणै घौराना तिनरा स्वगत केरू। 39 तेसरी एक बँहण बी ती जुणीरा नाँ मरियम ती। स यीशु री ज़ाँघा हागै बेशिया तिन्हरै वचन शुणदी लागी। 40 पर मार्था खाणा बणादी लागी रोही। स यीशु हागै एजिया बोलदी लागी, “ओ प्रभु, मेरी बँहणिए सारा कौम मूँ हागै छौडू सा, कि तुसाबै मेरी किछ बी फिकर नी आथी?” एसाबै मेरी मजती केरने री तेंडयै बोलात्। 41 यीशुए मार्था बै बोलू, “मार्था ओ मार्था तू बोहू सारी गल्लै री तेंडयै फिक्रिया सा होर परैशान होआ सा।” 42 पर एक गल सच सा मरियमै ता स शोभला भाग चुनू सा तेतै री तेंडयै तेसाबै जे आशीवाद मिलणा तेइबै कोई बी एसा ना नी छिनी सकदा।”

## यीशु आपणें चेलें बै प्रार्थना केरना सिखा सा

(मती 6:9-13; 7:7-11)

**11** एक रोज़ यीशु कौसी ज़ैगा ना प्रार्थना केरदें लागे ती। ज़ैबे यीशुए प्रार्थना केरी ता तिन्हरै चेलें ना एकीयें यीशु बै बोलू, “प्रभु जी ज़ैण्डे युहन्नै आपणें चेलें बै प्रार्थना केरनी सिखाई तैंडै तुसै बी आसाबै प्रार्थना केरना सिखात्।

<sup>2</sup>यीशुए चेलें बै बोलू, “तुसै प्रार्थना एण्डे तरहै केरीत्, “ओ बापू जी, तुसरा नाँ पवित्र मैनुआ लोड़ी, तुसरा राज्य आऊ लोड़ी।

<sup>3</sup>आसरी ज़रूरती री हर रोज़की रोटी आसा बै दैंदें रौहात्।

<sup>4</sup>होर आसरें पापा बै माफ केरात, किबैकि आसे बी आसरें खिलाफ पाप केरनू आए बै माफ केरा सी। आसा बै परीक्षा ना मता पाँदें।

## प्रार्थनै रें बारै ना यीशु री शिक्षा

(मती 7:7-11)

<sup>5</sup>तैंबै यीशुए चेलें बै बोलू, “मैना कि तुसरा एक सेंधी सा होर तुसै औधी रातियें तेइरै घौरा ज़ाइया बोला सी, ओ सेंधी मुंबे त्रा रोटी उधार दै। <sup>6</sup>किबैकि सफर केरदें-केरदें मेरा एक होर सेंधी मेरें घौराबे आऊ दा सा, होर मूँ हागगै तेइबे देणें बै किछ बी नी आँथी। <sup>7</sup>होर स सेंधी भीतरा ना बोलला, “मुँबे परेशान मत केरदा, ऐबे दरवाजा बन्द सा होर मेरें शोहरू मूँ सेंधै साथरै ना सी। ऐबे हाँऊ

उठिया तौभै किछ बी नी देई सकदा। <sup>8</sup>हाँऊ तुसाबै बोला सा, “तेइरा सेंधी होणें रै कारण तेई उठिया शायद तुसाबै नीती देंणा, पर तुसरें शर्म छौड़िया मुंगणें री वजह ना तेई ज़रूर उठिया तुसरी ज़रूरतें रै मुताबिक तुसाबै देंणा।” <sup>9</sup>हाँऊ तुसाबै बोला सा, “ परमेश्वरा ना मुँगदें रौहात् तेई तुसाबै देणा, आशा लाइया तोपलें ता तुसाबै मिलणा, खटखटालें ता परमेश्वरा तुसरी तेंइयें दुआर खोलणा।” <sup>10</sup>किबैकि परमेश्वरा ना जुण मुँगदा रौहा सा तेइबै मिला सा जुण आशा लाइया तोपदा रौहा सा तेइबै मिला सा जुण खटखटाँदा रौहा सा परमेश्वर तेइरी तेंइयें दुआर खोला सा। <sup>11</sup>तुसा मोंझै एण्डा कुण बापू सा, कि ज़ैबे तेइरा बेटा रोटी मुँगला ता पाथर देला, मोंछी मुँगला ता कीड़ा देला ? <sup>12</sup>होर आण्डे मुँगला ता तेइबै बिच्यू देला? <sup>13</sup>ज़ैबे तुसै बुरै होइया बी आपणें शोहरू बै शोभती चीजा देणा ज़ाणा सी ता तुसरा स्वर्गा रा बापू आपणें मुँगणु आए बै पवित्र आत्मा किबें नी देणी?

## यीशु री शिक्षा

(मती 12:22-30; मरकुस 3:20-27)

<sup>14</sup>एक बार यीशुए एकी माणहु ना नँडा चेटू खोलू जुणियें स गुंगा बणाउ ती। ज़ैबे तेई माणहु ना स नँडा चेटू निकता ता स माणहु दूणिदा लागा होर कई लोका एसा गैला ना बडै हैरान हुऐ। <sup>15</sup>पर तिन्हा ना किछ लोकें बोलू, “ऐ ता बालज़बूल नाँ रै चेटू रै प्रधानै री मज़ती सेंधे चेटू खोला सा।” <sup>16</sup>होरियें यीशु री जाँच केरनै री तेंइयें तेइना एक चिन्ह मुँगू जुण एसा गैला बै साबित केरला कि यीशु स्वर्गा ना अर्थात परमेश्वरा

ना आऊ सा। <sup>17</sup>पर यीशुए तिन्हारै मनै री गल ज़ाणिया तिन्हा लोका बै बोलू, “जुणी राज्य ना फूट पौड़ा सा स राज्य नष्ट होआ सा होर जुणी घौरा ना फूट पौड़ा सा स घौर बी नष्ट होआ सा।” <sup>18</sup>तैण्ढाए अगर शैतान आपणा विरोध केरला ता तेइरा राज्य कैण्ढे बैणी रौहणा? किबैकि तुसै मेरै बारै ना बोला सी कि हाँऊ शैतानै री मज़ती सेंघे चेटू खोला सा। <sup>19</sup>अगर हाँऊ शैतानै री मज़ती सेंघे चेटू खोला सा, ता तुसरै चेतै कौसरी मज़ती सेंघे चेटू बै खोला सी? <sup>20</sup>लेकिन हाँऊ ता परमेश्वरै री मज़ती सेंघे चेटू बै खोला सा। एता लाईया हाँऊ रिहा सा कि परमेश्वरा रा राज्य तुसा सामनै आऊ सा। <sup>21</sup>ज़ैबै ताकतवर माणहु पुरी रीतीयै हथियार बोनिया आपणै घौरै रा पौहरा केरा सा ता तेइरी सारी जायज़ाद बची रौहा सा। <sup>22</sup>पर ज़ैबै तेई माणहु ना ज़ादा ताकतवर माणहु तेई सेंघे लड़ाई केरिया जीता सा तैबै स माणहु तिन्हा हथियारा बै चटेरी सका सा जुणी पेंधे तेई माणहु बै बोहू बशाह ती होर तेइरी जायज़ादा बै लूटिया बाँडी सका सा। <sup>23</sup>जुण मूँ सेंघे नी आँथी स मेरा विरोधी सा होर जुण लोका बै कैड्डा केरनै री तैँइयै मेरी मज़त नी केरदा स तिनाबै बजुँआ सा।

### अधरै सुधारा ना मुसीबत

(मती 12:43-45)

<sup>24</sup>“ज़ैबै बुरी आत्मा माणहु ना निकाला सा ता स सुनसान ज़ैगा ना बशाँ तोपा सा; पर ज़ैबै तेसा बै बशाँ नी मिलदा ता स बोला सा, “मूँ तेई माणहु हागँगे वापस जाणा जुणी आन्दरै हाँऊ रौहै केरा ती।

<sup>25</sup>एण्ढे बोलिईया स बुरी आत्मा वापस एजा सा होर तेसा बुरी आत्मा बै स माणहु साफ-सुथरा होर सज़ाऊ दा खाली घौरा साही मिला सा। <sup>26</sup>तैबै स बुरी आत्मा ज़ाइया आपू ना बी बुरी सौत बुरी आत्मा बै आपू सेंघे आणा सा, होर ते सब बुरी आत्मा तेई माणहु आन्दरै रौहदी लागा सी। ऐबै तेई माणहु री दशा पहिलै ना बी ज़ादा बुरी होआ सा।

### धन्य कुण सा

<sup>27</sup>ज़ैबै यीशु इन्हा गैला बै केरदा लागा दा ती ता भीड़ा ज़ाँदरना कौसी बेटड़ियै ज़ोरा सेंघे बोलू, “धन्य सा स बेटडी जुणियै तुसाबै जन्म धिना होर धाचे सी।” <sup>28</sup>तैबै यीशुए बोलू, “पर धन्य ता ते सी जुणा परमेश्वरा रा वचन शुणा सी होर तेइरा पालन केरा सी।”

### लोकै यीशुबै एक चमत्कार केरनै बै बोलू

(मती 12:38-42)

<sup>29</sup>ज़ैबै बड़ी भीड़ कैड्डी हॉदी लागी ती ता यीशु बोलदा लागा, “एई जुगै रै तुसै लोका बुरै सी। तुसै मूँ ना ऐ चाहा सी कि हाँऊ आपणै आपू बै साबित केरनै री तैँइयै चमत्कार केरनू। पर हाँऊ जे चमत्कार तुसरी तैँइयै केरनू, स ता ऐ सा जे भविष्यवक्ता योनै री ज़िन्दगी ना हुआ ती। <sup>30</sup>जे योनै री ज़िन्दगी ना हुआ, स महानगर नीनवै रै लोकै री तैँइयै ऐसा गैला बै साबित केरा सा की योना बै भेजणु आ परमेश्वर सा। <sup>31</sup>दक्षिणै री राणी शेबा बोहू दूरा ना सुलेमान राजै रा ज्ञान शुणनै री तैँइयै आई ती। पर ऐबै जे हाँऊ औखै सा सा, सुलेमाना ना बी बड़ा सा। एई जुगै रै

तुसै लोका मेरी गैला शुणनै रा नाँह केरा सी। न्याय रै रोज़ा ना राणी शेबा तौखलै लोका सँघे खडे होइया तुसा पँधे दोष लाणा। <sup>32</sup>नीनवे शहरै रै लोकै योना रा प्रचार शुणिया आपणै पाप छौडै। पर ऐबे जे हाँऊ औखे सा, योना ना बी बड़ा सा। तैबे बी तुसै लोकै मेरी गैला शुणिया बी आपणै पाप नी छौडै । न्याय रै रोज़ा ना नीनवै शहरै रै लोका एई जुगै रै तुसा लोका सँघे खडे होइया तुसै दोषी ठराणै ।

### शरीरा रा दीआ

(मती 5:15; 6:22-23)

<sup>33</sup>कोई बी माणहु दीयै पकाइया गुप्त ज़ैगा ना नी रखदा होर ना भाँडे लाइया खौटदा। बल्कि तेइबै उथड़ी ज़ैगा पँधे रखा सी ताकि जुणा भीतरै एलै तिन्हरी तैइयै प्याशा होला। <sup>34</sup>तेरी औछी तौभै प्याशै देणु आइ दीयै साही सी। अगर तेरी औछी साफ सी ता तेरी सारी देह प्याशी होणी। अगर तेरी औछी बुरी सी ता तेरी सारी देही ना निहारा होंगा। <sup>35</sup>होशियार रौहा जे प्याशा तुसा भीतरै सा स कोईछै निहारा नी लोड़ी हुआ। <sup>36</sup>अगर तुसरी देही भीतरै प्याशा भौरूआ सा होर देही रै कौसी भी हिस्सै ना निहारा नी आँथी ता तुसरी पूरी देह प्याशै लाइया ऐण्ठी चमकणी ज़ैण्ठी दीयै लाइया स ज़ैगा चमका सा ज़ौखै स पकेइया रखू सा।

### यीशु धर्मगुरु री आलोचना केरा सी

(मती 2:1-36; मरकुस 12:38-40)

<sup>37</sup>ज़ैबे यीशुए ए गल्ला पूरी बोली, तैबे कौसी फरीसी माणहुए तेई हागगै विनती

केरी कि यीशु मेरी हागगै एज़िया रोटी खाला ता यीशु तेइरै घौरा ज़ाइया तेइ सँघे रोटी खाँणै री तैइयै बेठा। <sup>38</sup>तेइ यहूदी पँडता बै ए हेरिया हैरानी हूई कि स फरीसी रिवाज़े रै मुताबिक बगैर हौथ धोइया रोटी खाँदा बेठा। <sup>39</sup>तैबे प्रभुए तेई बै बोलू, “ओ पँडतो, तुसै कटोरै होर थाई बै बाहरा-बाहरा ना ता माँजा सी, पर तुसरै भीतरै लालच होर बुराई भौरूईदी सा।” <sup>40</sup>ओ मूर्ख लोको! परमेश्वरा बै बाहरली चीज़ा पँधे बी चिंता सा ता भीतरली चीज़ा पँधे बी चिंता सा। <sup>41</sup>तुसरै मना आँधलै विचारै रै मुताबिक गरीबा बै दान देआ तैबे तुसा बै लागणा कि परमेश्वरा तुसै स्वीकार केरनै। <sup>42</sup>ओ फरीसी लोको, तुसा बै भयानक शिक्षा मिलणी। तुसै पुदीनै, सुदाब होर सब भांति रै साग पाता रा, अर्थात आपणी ओछी- ओछी कमाई रा बी दसवाँ हिस्सा देआ सी, पर तुसै न्यायै सँघे व्यवहार केरना होर परमेश्वरै री झुरी रै बारै ना बिसरा सी। दसवाँ हिस्सा देणा सही सा पर जे गैला एथा ना बी ज़रूरी सी तिन्हा बै बी तुसै मता छौडदै। <sup>43</sup>ओ फरीसीयो तुसा बै भयानक शिक्षा मिलणी। तुसै सभा घौरा ना ज़ाइया उथड़ी-उथड़ी जैगहा पँधे बेशणै री इच्छा रैखा सी होर ए बी चाहा सी की लोका बज़ारा ना तुसरा आदर केरलै। <sup>44</sup>तुसा बै भयानक शिक्षा मिलणी। किबैकि तुसै तिन्हा पौथुइदी कब्रा साही सी ज़ुणी पँधे निशाण नी आथी। लोका तिन्हा पँधे चैला सी पर ते तिन्हा कब्रै रै बारै ना नी ज़ाणदै।

<sup>45</sup>तैबे नियम सिखाणु आए एकी माणहुए यीशु बै उतर धिना, “ओ गुरु जी ऐण्ठी गल्ला केरिया तुसै आसरी

बी निंदा केरदै लागै सी।” 46 यीशुए तिन्हा बै बोलू, “ नियम सिखाणु आए लोको, तुसा बै बी भयानक शिक्षा मिलणी। किबैकि तुसरै धर्म री मांग जे मुशकिल सा तैसा बै तुसै लोका पेंधे लादा सी, होर तेई बोझै बै हल्का केरनें री तेंडयै तुसै थोड़ी जेई मजत बी नी केरदै। 47 तुसाबै भयानक शिक्षा मिलणी। किबैकि तुसै तिन्हा भविष्यवाणी केरनू आए री तेंडयै कब्रा बणा सी, जुणा तुसरै बजुर्म मारै दै ती। 48 ऐण्ढा केरिया तुसै रिहा सी कि तुसै आपणें दादू-बा रै कोमा ना शामिल सी किबैकि तिन्है ते मारै होर तुसै तिन्हरी तेंडयै कब्रा बणा सी। 49 परमेश्वरै आपणी बुद्धी सेंधे तुसरी तेंडयै ऐ बोलू सा, कि मूँ तिन्हा हागगै गुरु होर चेलै भेजणें। तिन्हा किछ ते मारनै होर कौसी पेंधे जुल्म केरना। 50 दुनियै रै शुरुआती दौरा ना लेइया जेतरे बी भविश्यवक्तै रै खून हुए सी, तिन्हरी तेंडयै एई जुगै रै लोका ना लेखा लेइणा। 51 हाबिलै रै खूना ना लेइया जकर्याह रै खूना तक जेतरे बी खून वेदी होर मन्दिरै रै बिचा ना हुए सी, इन्हा सैभी री तेंडयै एई जुगै रै लोका ना लेखा लेणा सा । 52 लानत सा तुसा धर्मविधि जाणनू आए पेंधे किबैकि तुसै लोका परमेश्वरा बै जाणनै ना रोकै। आपू ता तुसै परमेश्वरै रै बारै ना नी जाणू होर तिन्हा बै बी रोका सी जो जाणना चाहा सी। 53 जेबै यीशुए आपणी गैला पूरी केरी, ता यहूदी पंडत होर धर्मगुरु तेई ना झिकुयै। तिन्है तेई बौक्तै यीशु ना बोहू सारै सवाल पुछै। 54 ते यीशु रै मुँहै री गैला, तिन्हरै खिलाफ इस्तैमाल

केरिया यीशु बै फसाणै री कोशिश केरदै लागै दै ती।

### पाखण्डै रै खिलाफ चिताउणी

(मती 10:26-27)

**12** 1 तैबै तौखे लोकै री एतरी भीड कट्टा हुई कि लोका एकी होरी पेंधे पौडदै लागै। यीशुए पहलै आपणें चेलै धिरै हेरू होर बोलू, “यहूदी पंडता साही पाखण्डी मता बैणदै। तिन्हरा बुरा असर खमीरा साही होरी ना फैला सा। 2 ऐबै सारी गैला बै प्रगट केरनै रा बौक्त एँदा लागा सा, होर जे गैला गुप्त सी ते लोका सामनै दैसिणी। 3 जे गैला तुसै निहारै ना केरी सी ते प्याशै ना दैसिणी, होर जे गैला तुसै बन्द दुआरा पिछै केरी सी, ते छापरा पेंधे खडै होइया दैसिणी, ताकि सारै लोका शुणलै।

### कुणि न डौरना

(मती 10:28-31)

4 प्यारै सेंघियो, तिन्हा ना मता डौरदै जो देही बै ज़ख्म देआ सी। ते सिर्फ तुसरी देही बै नष्ट केरी सका सी होर तेथा न बाद किछ नी केरी सकदै। 5 पर हाँऊ तुसा बै बोला सा परमेश्वरा ना डौरा, जौस हागगै लोका बै मारनै होर तिन्हा बै नरका ना पाणै री शक्ति सा। 6 कि दुई ढबुए ना पौंज चिडू नी बिकदै ? तैबै बी परमेश्वर तिन्हा ना एकी बै बी नी बिसरदा। 7 तुसरै चोडै रै शराल बी गिणुयै दै सी। तुसै मता डौरदै किबैकि तुसै परमेश्वरै री तेंडयै तिन्हा चिडू ना जादा कीमती सी।

## यीशु बै स्वीकार या अस्वीकार केरना

(मती 10:32-33; 10:19-20; 12:32)

8 जुणा मुँबे एसा धौरती पैंधे म्हणू रे बिचा ना मना सी हाँऊ तुसा बै बोला सा पेमेश्वरै रे स्वर्गदूता सामने मुँबी ते मनणै। 9 पर जो म्हणू रे सामने एसा धौरती पैंधे मेरा नाँह केरा सी परमेश्वरै रे स्वर्गदूता सामने मुँबी तिनरा नाँह केरना। 10 अगर कोई म्हणू रे बेटै रे खिलाफ बोलला ता तेइरै अपराध माफ केरिनै पर जुणा पवित्र-आत्मै री निन्दा केरलै ता तिनरै अपराध माफ नी केरिनै। 11 जैबै तुसाबै लोक सभा घौरा ना शासक होर अधिकारी सामने तुसा पैंधे मुकदमा चलाणै री तँइयै आणलै ता चिन्ता हेरीत् केरदै कि आसा आपणै बचणै री तँइयै की जवाब देणा। 12 किबैकि जैबै तुसै तौखै खडै होलै ता, तेई बौकतै पवित्र-आत्मा तुसाबै दसणा कि तुसा की जवाब देणा।

## मूर्ख सेठा रा उदाहरण

13 भीड़ै रे बिचा ना एकी म्हणुए यीशु बै बोलू, “ओ गुरुजी मरै भाई बै बापू री जायज़ाद मूँ सँधे बाँडणै री तँइयै बोला।” 14 यीशुए तेइबै बोलू, “ओ सँधी इन्हा गैला रा फैसला केरनै री तँइयै हाँऊ कुणियै चुनू सा?” 15 यीशुए भी लोका बै बोलू, “होशियार रौहा तेसा चीज़ा रा लालच मता केरदै जो तुसा हागगै नी आँथी। हर किस्मै रे लोभ लालचा ना आपू बै बचाइया डाहत्। किबैकि कौसी री ज़िन्दगी तेई हागगै बोहू जायज़ाद होणै सँधे नी बाँणदी।” 16 यीशुए तिन्हा बै एक उदाहरण दसू, “एकी सेठ म्हणू

री ज़मीना ना बड़ी भारी फसल हुई।” 17 तैबै स सेठ म्हणू वचार केरदा लगा कि ऐबै मूँ की केरना किबैकि मूँ हागगै ऐतरी ज़ैगा नी आँथी कि हाँऊ एसा सारी फसला बै रखनू। 18 तेई सेठ म्हणुए आपणै मना ना बोलू, “मूँ ऐण्डा केरना, मूँ आपणी सारी कोठड़ी चोड़नी होर एथा ना बड़ी कोठड़ी बणाणी होर मूँ आपणा सारा नाज़ होर ढबुयै तेथा ना रखणै।” 19 तैबै मूँ आपणै प्राणा बै बोलणा, “हे प्राण ऐबै त हागगै सबकिछ सा जो बोहू बौर्षा ढौई होणा। ऐबै चैना सँधे खा पी होर मोऊज़ केर।” 20 पर परमेश्वरै तेई सेठा बै बोलू, “एई मूर्खा औज़ राती मूँ तैरै प्राण लेणै तैबै ज़ेकिछ तँ कडा केरू सा स कौसरा होणा ?” 21 स म्हणू बी ऐण्डा सा जो आपणी तँइयै धन-दौलत कडा केरा सा पर परमेश्वरै री नज़री ना स सेठ नी आँथी।

## परमेश्वरा पैंधे बशाह रखा

(मती 6:25-34)

22 तेथा ना बाद यीशुए आपणै चेलै धिराबै फिरिया बोलू “हाँऊ तुसाबै बोला सा आपणै प्राणै री तँइयै फिक्र मता केरदै कि आसा की खाणा, न आपणी देही री तँइयै कि आसा की लाणा।” 23 किबैकि प्राण रोटी ना होर देह झिकड़ै ना जादा कीमती सा। 24 काऊडै पैंधे ध्यान दैयात् ते न बाँहदै न काटदै होर न तिन्हा हागगै कोई भण्डार घौर हाँदा किबैकि परमेश्वर तिन्हाबै धाचा सा। तुसै ता परमेश्वरै री तँइयै इन्हा चिड़ू ना जादा कीमती सी। 25 कि तुसै फिक्र केरिया आपणी उम्मा रा एक पल



बी बढ़ाई सका सी ? <sup>26</sup> जैबे तुसै फिक्र केरिया एई ओछा जेई कोम नी केरी सकदै ता होरी गल्लै री तेंइयै किबै फिक्रिया सी ? <sup>27</sup> बोणैके फूला बै हेरा ते केण्टे बढ़ा सी। ते न मेहनत केरदै न आपणी तेंइयै झिकड़ै बुणदै। पर हाँऊ तुसा बै बोला सा सुलैमान राजै बी आपणी ऐशो आरामै री ज़िन्दगी ना इन्हा फूला ना कौसी एकी साही शोभलै झिकड़ै नी लायै। <sup>28</sup> अगर परमेश्वर मैदानै रै गाह बै सजाई सका सा जे औज़ ता सा पर काल औगी ना फुकिणी ओ कम बशाह केरनु आयै लोको तेई परमेश्वरा तुसाबै लागै रै झिकड़ै किबै नी देणै। <sup>29</sup> शक मता केरदै होर एसा गल्लै री फिक्र मता केरदै कि आसा की खाणा होर की पीणा। <sup>30</sup> जुणा परमेश्वरा बै नी ज़ाणदै ते लोका इन्हा चीज़ै रै बरै ना सोचदै रौहा सी पर तुसरा परमेश्वर बापू ज़ाणा सा कि तुसा बै इन्हा चीज़ै री जरूरत सा। <sup>31</sup> चिन्ता केरनै रै बदलै तुसै परमेश्वरा बै आपणी ज़िदगी पूरी रीतिऐ चलाणै दैआत। तैबै धार्मिकता सैंधै ए सारी चीज़ा बी तुसाबै मिलणी।

### स्वर्गा री तेंइयै धन

(मती 6:19-21)

<sup>32</sup> “हे औछै छुण्डा मत डौरदा किबैकि परमेश्वर बापु जो स्वर्गा ना सा स तौभै राज्य देणा चाह सा।” <sup>33</sup> आपणी जायज़ाद बेचिया गरीबा बै दान केरात् होर आपणी तेंइयै ऐण्टै बटुऐ बणात् जे कैदी बी पराणै नी होंदै। स्वर्गा ना धन कट्टा केरा ता तुसरा धन तौखे बैची रौहणा। तेइबै ना ता कोई चोर -चोरी सकदा होर ना ता तुँइबै कीड़ा बगाड़ी

सकदा। <sup>34</sup> जौखै तुसरा धन होला, तौखै तुसरा मन बी लागी रौहणा।

### ज़ागदै रौहा

<sup>35</sup> परमेश्वरै रै कौमै री तेंइयै हमेशा दीयै पकेइया त्यार रौहत। <sup>36</sup> तुसै तिन्हा नोकरा साही बणा जो ब्याह ना एणु आलै मालका रा इँतज़ार केरदै लागैदै होआ सी, ताकि जैबे स एज़िया दरवाज़ा खटखटाला ता ते उठिया दरवाज़ा खोललै। <sup>37</sup> जुणी नोकरा बै मालक ज़ागदा हेरा सा स धन्य सा। “हाँऊ तुसाबै सच बोला सा तेई मालका त्यार होइया आपु नोकरै रै झिकड़ै लागै होर ते नोकर रोटी खाँणै री तेंइयै बशाँणै।” <sup>38</sup> स मालक औधा राती या दोती हाँणै ना पहलै कैबै बी एला ता तेई तिन्हा नौकरा ना खुश होणा जो ज़ागदै होर त्यार रौहा सी। <sup>39</sup> पर तुसै एसा गला पैंधै ध्यान दैआत् अगर घौर का मालक ज़ाणदा कि चोर कुणी बौक्तै एणा ता स ज़ागदा रौहँदा होर आपणै घौरा ना चोरी नी ती हाँणै देंणी। <sup>40</sup> तुसै हर बौक्तै त्यार रौहा किबैकि माणु रा बेटा यानिकी मूँ तेई बौक्तै एणा जौस बौक्तै रै बारै ना तुसै सोचदै बी नी। <sup>41</sup> तैबै पतरसै बोलू, “प्रभु जी, ऐ उदाहरण सिर्फ आसरी तेंइयै सा कि सैभी री तेंइयै सा ?” <sup>42</sup> यीशुऐ बोलू, “हाँऊ हरेक समझदार होर विश्वासयोग्य नोकरै रै बारै ना बोलदा लागदा सा जुणी बै तिन्हरै मालकै आपणै घौरकी हेर-शुण केरनै री होर आपणै परिवारै री सेवा केरनै री ज़िम्मेवारी धिनी सा।” <sup>43</sup> जैबै तिन्हरा मालक ऐज़िया ऐ हेरा सा कि तेइरै नोकरै आपणी जिम्मेवारी शोभली तरहा निभाई सा ता स मालक तिन्हा

नौकरा बै ईनाम देआ सा। <sup>44</sup> हाँऊ तुसाबै भरोसा दिला सा कि मालका आपणै तिन्हा नोकरा बै आपणी सारी संपति री निगरानी रा अधिकार देणा। <sup>45</sup> अगर स नोकर सोचला कि मैरै मालका बोहु रोज़ा बाद वापस एणा, होर दुजै नोकरा बै कष्ट देआ सा, खाणै होर शराब पीणै ना मस्त रौहा सा, <sup>46</sup> ता तेई नोकरा रा मालक एण्डै बोक्तै एला जुणी बोक्ता बै स नोकर ज़ाणदा बी नी। तैबै तेइ मालका झिड़का देइया स नोकर फेटै खोलणा। <sup>47</sup> किबैकि तेइयै आपणी ज़िम्मेवारी शोभली ढंगै नी निभाई होर तेइबै कड़ी सज़ा देणी। <sup>48</sup> पर तै लोका जुणा नी ज़ाणदैं कि ते गलत केरदैं लागै सी तिन्हाबै थोड़ी सज़ा हौणी। किबैकि जुणी बै बोहु ज़िम्मेवारी धिनी सा तिन्हा बोहु हिसाब पौऊ देणा होर जुणीबै थोड़ी ज़िम्मेवारी धिनी सा तिन्हा थोड़ा हिसाब देणा पौऊ।

### यीशु रै एणै रै चिन्ह

(मती 10:34-36)

<sup>49</sup> हाँऊ धौरती पैंधे औगी लाँदा आऊ सा होर चाहा सा कि ऐ ऐभै लागी लोड़ी। <sup>50</sup> मूँ ता हाज़ी दुःख सौहणा पौड़ना ज़ां ढौई स पूरा नी होला तैबै तक मूँ कैण्ठी व्यथा ना रौहणा। <sup>51</sup> तुसै की सोमझा सी हाँऊ धौरती पैंधे मेल करांदा आऊ सा ? नैई हाँऊ तुसा बै बोला सा हाँऊ अलग करांदा आऊ सा। <sup>52</sup> किबैकि ऐबै ना बाद एकी घौरा ना पौंज ज़ाणा आपू ना वरोध रखणा त्राइ दुइ रै होर दुई त्राइ रै। <sup>53</sup> बापू बेटे ना होर बेटे बापू सैंधे वरोध रखणा, आमा बेटा आपू ना

वरोध रखणा, शौशू नूशा आपू ना एकी होरी सैंधे वरोध रखणा।

### बोक्तै रै लछण

(मती 16:2-3)

<sup>54</sup> यीशुए लोका बै बोलू, ज़ैबै तुसै पश्चिमा धिरे ना बाद बै एन्दै हेरा सी ता तुसै फट केरदैं बोला सी गाश एणा होर तैण्ढाए होआ सा। <sup>55</sup> होर ज़ैबै दक्षिणा धिरे ना बागर चैला सा तैबै तुसै बोला सी कि गर्मी होणू आई सा होर तैण्ढाए होआ सा। <sup>56</sup> हे कपटियो, तुसै बागर होर बादआ हेरिया सर्दी गर्मी रा भेद ता केरी सका सी पर एई जुगा ना परमेश्वर जे केरदा लागा सा तेथै रै बारै ना भेद केरना किबै नी ज़ाणदैं ?

### आपणै मुद्दई सैंधे समझौता

(मती 5:25-26)

<sup>57</sup> तुसै आपुए किबै नी फैसला केरदैं कि सही की सा? <sup>58</sup> आपणै मुद्दई सैंधे बौता ना जाँदी घेरै समौझता केरा। कोइंछै ऐण्ढा नी लोड़ी हुआ कि फैसला केरनुआ तौभै खिंचिया नेला होर तौभै सपाही हागगै देला होर सपाही तौभै बन्दी घौरा ना पालै। <sup>59</sup> हाँऊ तौभै बोला सा, जाँ ढौई तू पाई-पाई नी चुकाला तां ढौई त तौखैना नी छुटणा।

### पाप केरने छौड़ा

**13** <sup>1</sup> तेई बोक्तै किछ लोका तौखै आए होर ते यीशु सैंधे तिन्हा गलीली लोकै रै बारै ना चर्चा केरदैं लागै जौसरा खून राज्यपाल पिलातुसै यरुशलेम मन्दिरा ना बलि केरदी घेरै केरने द्याऊ ती। <sup>2</sup> इन्हा गैल्ला शुणिया

यीशुए बोलू, “तुसै की सोमझा सी कि ए गलीली होरा सब गलीली लोका ना ज़ादा पापी ती तैबै ते मारै?” <sup>3</sup> एण्ढा बिल्कुल बी नी आँथी, अगर तुसै आपणै पापा बै नी छोड़लै ता तुसा सैभी बी एण्ढै मोरना। <sup>4</sup> तिन्हा ठारा माण्हू रै बारै ना तुसै की सोमझा सी जुणी पेंधै शीलोह रा गुम्मत शौदू होर ते पौथुइया मुँए; तुसै की सोचा सी कि ते यरूशलेमा ना रौहणू आलै होरी लोका ना ज़ादा पापी ती? <sup>5</sup> हाँऊ तुसाबै बोला सा, एण्ढा नी आँथी, “अगर तुसै आपणै पापा बै नी छोड़लै ता ना तुसा बी एण्ढै मोरना।

### अँज़ीरै रै बुटै रा उदाहरण

<sup>6</sup> यीशुए तिन्हा बै एक उदाहरण दैसू: “एकी माण्हुए आपणै अँगरै रै बगीचै ना एक अँज़ीरा रा बुटा लाऊ ती। बगीचै रा मालक तेई बुटै हागगै फ़ौल तोपदा आऊ। ज़ैबै तेई मालका बै तेई बुटै ना कोई फ़ौल नी मिलू ता स बड़ा नराश हुआ। <sup>7</sup> तैबै तेई मालकै आपणै बगीचै रै पौहरैदारा बै बोलू, “शुण हाँऊ त्राई साला ना एई बुटै ना फ़ौल तोपदा लागा सा पर एक बी नी मिलदैं।” एई बुटै बगीचै री ज़ैगा बेकारा ना रोकिया रखी सा एबै तू एई बुटै बै काट ताकि ऐ आगै बै ज़ैगा नी रोकला। <sup>8</sup> तैबै तेई पौहरैदारे आपणै मालका बै बोलू, “एस साल एई बुटै बै रौहणै दैआत्। ताकि हाँऊ एई बुटै ना शोभली तैरहै कोतिया खाद पानू। <sup>9</sup> आगै बै एथा ना फ़ौल लागलै ता ठीक सा नैई लागलै ता तुसै एई बुटै बै काटी सका सी।

### यीशु रामै रै ध्याइँ ना कुबड़ी बेटड़ी बै ठीक केरा सा

<sup>10</sup> यीशु रामै रै ध्याइँ ना अराधना घौरा ना उपदेश दैदैं लागै दै ती। <sup>11</sup> तौखे एक एण्ढी बेटड़ी ती जो ठारा वौर्षा ना चेटू री वज़हा ना कुबड़ी हुई ती होर स कौसी बी डैण्गै खड़ी नी ती होई सकदी। <sup>12</sup> यीशुए स बेटड़ी आपू हागगै शाधी होर तेसाबै बोलू, “ओ बेटड़ियै, हेर तू आपणी सारी बमारी होर कमज़ोरी ना अज़ाद हुई।” <sup>13</sup> तेथा ना बाद यीशुए तेसा बेटड़ी पेंधै हौथ रखै होर स बेटड़ी एकदम सीधी हुई होर परमेशवरै री जय जयकार केरदी लागी। <sup>14</sup> एसा गल्ल हेरिया कि यीशुए ऐ बेटड़ी रामै रै ध्याइँ ना ठीक केरी, अराधना घौरा रा मुखिया झिकुआ होर लोका बै बोलदा लागा, “आसा हागगै कोमा केरने री तैँइयै छौह ध्याइँ सी तिन्हा ध्याइँ ना एज़िया ठीक होई सका सी पर रामै रै ध्याइँ ना नी।” <sup>15</sup> यीशुए जवाब धिना, “ओ कपटियो; तुसै बी ता रामै रै ध्याइँ ना कोम केरा सी कि तुसै रामै रै ध्याइँ ना आपणै बौल्द या गदहै बै छौँडिया पाणी प्याणै बै नी नैदैं” <sup>16</sup> तैबै ऐ सही नी आँथी कि ऐ बेटड़ी जो अब्राहमै रै खानदानै री सा होर ठारा वौर्षा ना चेटू रै कब्ज़े ना ती रामै रै ध्याइँ ना ठीक हुई? <sup>17</sup> एसा गल्ल शुणिया यीशु रै सारै वरोधी शर्मिदा हुऐ होर सारै लोकै री भीड़ यीशु रै नोखे कोम हेरिया खुशी मनाँदी लागी।

## राई रै दाणै रा उदाहरण

(मती 13:31-32, मरकुस 4:30-32)

18 तथा ना बाद यीशुए तिन्हा ना पुछू, “परमेश्वरा रा राज्य कुणी साही सा? होर हाँऊ एथै री बराबरी किजी सेंधै केरनू? 19 “परमेश्वरा रा राज्य तेई राई रै दाणै बराबर सा जो कौसी माणहुए नेइया आपणै छेता ना बाहू होर स बड़ा होइया बुटा बैणू होर चिड़ुए तेथै री शांणी पैंधै कोल्ह बणाऊ।”

## मलेइँ रा उदाहरण

(मती 13:33)

20 यीशुए भी बोलू, “परमेश्वरा रा राज्य कुणी साही सा? 21 परमेश्वरा रा राज्य तेई मलेइँ साही सा जो एकी बेटड़िऐ त्राई मुठी गेहूँ रै पिठै ना मलाऊ होर सारा पिठा मलेइँआ।”

## साँगड़ा दुआर

(मती 7:13-14,21-23)

22 यीशु शहर-शहर होर गाँ-गाँ ना उपदेश देन्दै-देन्दै यरूशलेम शैहरा धिरा बै ज्ञान्दै लागै दै ती। 23 तैबै एकी माणहुए यीशु ना पुछू “ओ गुरु जी, मुक्ति पाणु आऐ कि थोड़ै सी?” 24 यीशुए तिन्हा बै बोलू, “साँगड़ा दुआरै आघै जाणै री कोशिश केरा। हाँऊ तुसा बै बोला सा बोहू सी, जो एई दुआरै आघै ज़ाणा चाहा सी पर नी ज़ाई सकदै। 25 एक रोज़ परमेश्वर जो घौरके मालका साही सा तेई उठिया दुआर बन्द केरना होर तुसा बाहरै खेड़ै होइया दुआर खड़काइया विनता केरनी, “ओ प्रभु जी आसरी तेंडैयै

दुआर खोलात् तैबै तेई भीतरै ना जवाब देणा तुसै कौखलै सी हाँऊ तुसा बै नी ज़ाणदा?” 26 तैबै तुसा बोलणा, ‘आसै तुसा सेंधै खाऊ-पीऊ होर तुसै आसै बज़ारा ना उपदेश धिनै।’ 27 पर तेई तुसा बै बोलणा, ‘हाँऊ तुसा बै नी ज़ाणदा कि तुसै कौखलै सी।’ ओ बुरै कोम केरनू आऐ लोको तुसै मूँ हागगै ना दूर होआ। 28 जैबै तुसै अब्राहम, इसहाक, याकूब, होर सैभी भविष्यवक्ता बै परमेश्वरै रै राज्य ना बेठै दै हेरलै होर आपू बै तौखैना बाहरै खोलुएदँ हेरलै ता तुसा तौखै रौणा होर तुसा बै बोहू कष्ट होणा। 29 सारी दुनियै रै लोका हर ज़ैगा ना कद्दा होइया परमेश्वरै रै राज्य री धामा ना शामिल होणा। 30 होर शुणा, जुणी रा लोका आदर नी केरदै स परमेश्वरा ऐण्ढा बणाणा कि लोका तेइरा आदर केरलै होर ऐबै जे लोके री नज़री ना आदरणीय सी तिन्हरा परमेश्वरा निरादर केरना।

## हेरोदेस राज़ै री दुश्मनी

31 तेई बोक्ते किछ यहूदी पँडतै एज़िया यीशु बै बोलू, “तू औखैना ज़ा किबै कि हेरोदेस राज़ा तौभै मारना चाहा सा।” 32 यीशुए तिन्हा बै बोलू, हेरोद जे गीदड़ा ना क्रूर सा तेइबै ज़ाइया बोला, औज़ काल मूँ बिमार माणहू बै ठीक केरदै रौहणा होर तिन्हरै चेट्टू खोलदँ रौहणा पर हाँऊ जुणी कोमै री तेंडैयँ आऊ सा छेकै मूँ स कोम पूरा केरना। 33 पर इन्हा रोज़ा ना मेरा कोम केरदै रौहणा ज़रूरी सा किबैकि ऐण्ढा नैई होई सकदा कि कोई भविष्यवक्ता यरूशलेम शैहरा ना बाहरै मारिला।”

## यीशु रा यरूशलेमे री तेंडयै दुःखी होणा

(मती 23:37-39)

34 “हे यरूशलेम! हे यरूशलेम! तू ऐण्डा शहर सा जो भविष्यवक्ता बै मारा सा होर तिन्हा लोका बै पाथरै मारा सा जुणा परमेश्वरै त हागगै भजै।” में कैई बार सोचू जैण्डे मुर्गी आपणै बचचै बै सम्भाला सा तैण्डे मूँ बी तरै शोहरू कडा करनै ती पर तें हाँऊ ऐण्डा करनै नी धिना। 35 होर हेरा ऐबै तुसरा घौर तुसरी तेंडयै खाली छौड़िया सा होर हाँऊ तुसा बै बोला सा, जैबै तक तुसे ऐण्डा नी बोललै कि धन्य सा स जो प्रभु रै नाँ पेंधै एजा सा तैबै तक तुसा हाँऊ कैदी बी नी हेरना।

## यीशु यहूदी पँडतै रै मुख्य रै घौरा ना

**14** 1 यीशु रामै रै ध्याडै ना एकी यहूदी पँडतै रै मुखियै रै घौरा बै रोटी खाँदै नौठै होर ते लोका यीशु बै फसाणै री त्यारी ना बेटे दै ती। 2 तौखै यीशु रै सामनै एक ऐण्डा माणहू ती जुणीरै हौथ जोंघा म्हाए दै ती। 3 तेई हेरिया यीशुए धर्मविधि ज्ञाणनू आरे होर यहूदी पँडता बै बोलू, “रामै रै ध्याडै ना भला केरना सही सा कि नैई?” 4 पर ते सारै चुपचाप बेटे । तैबै यीशुए स माणहू आपणै हौथा सेंधे छुँगिया ठीक केरू होर ज्ञाणै धिना। 5 तैबै यीशुए तिन्हा बै बोलू, “तुसा मुँडै ऐण्डा कुण सा कि जुणिरा बौन्द या गदहा कुँए ना पौइला होर स रामै रै ध्याडै ना तेई बै छेकै बाहरै नी खोलला?” 6 ते इन्हा गैला रा

किछ बी जवाब नी देई सके। 7 यीशुए जैबै हेरू कि पाहुँणै एजिया बेशणै बै कैण्डी शोभली-शोभली जैगा भाला सी ता तिन्हा बै एक उदाहरण दैसू। 8 जैबै तुसा बै कोई ब्याह-शादी ना शाधलै ता तुसे जाइया शोभली-शोभली जैगा पेंधे हेरेइत् बेशदै। कोइछे ऐण्डा नी लोड़ी हुआ कि तेई माणहुरे तुसा ना बी बडै माणहु बै छोँदा धिना दा होला। 9 जुणिए तुसा दुही बै छोँदा धिना सा तैबै तेई एजिया तुसा बै बोलणा इनरी तेंडयै जैगहा छोड़ा। तैबै तुसा शर्मिंदे होइया निशटी जैगहा पेंधे बेशणा पौड। 10 जैबै तुसा बै कोई शाधलै ता तुसे जाइया निशटी जैगा पेंधे बेशेइत्। तैबै जुणिए तुसे शाधै सी तेई एजिया तुसे शोभली जैगा पेंधे बशाणै। तैबै जे तुसा सेंधे बेशणु आरे सी तिन्हा सामनै तुसरा आदर होणा। 11 किबैकि जो कोई आपू बै बैडा बुझा सा तेई ओछे गिणिना होर जो आपू बै ओछा बुझा सा तेई बैडे गिणिना । 12 तेथा ना बाद यीशुए आपू बै शाधणू आरे बै बोलू, “जैबे तू ध्याड़ी या राती कौसी बी बौक्तै भोज रखला ता तू आपणै आपणै रिशतैदार, आपणै भाई, सेंधी होर सेठ माणहू बै हेरेइ शाधदा कोइछे ऐण्डा नी लोड़ी हुआ कि ते बी तौभै शाधिया तेरा बदला चुकालै ।” 13 पर जैबै तू भोज रखला ता तू ऐण्डे माणहू बै शाधेई जो गरीब, टुण्डै, लँगडै होर काणै होलै। 14 तैबै त धन्य होंणा, किबैकि तिन्हा हागगै तौभै बदला देंगे री तेंडयै किच्छ नी होंणा, तैबै धर्मी माणहु रै जिन्दा होणै सेंधे परमेश्वरा तौभै एसा गैला रा इनाम देंगा।

## बड़ी धामा रा उदाहरण

(मती 22:1-10)

15 यीशु सेंधे रोटी खाणु आणे मुंझै ना एकी माणहुए इना गैला शुणिया यीशु बै बोलू, “धन्य सा स माणहू जुण परमेश्वरै रे राज्य ना रोटी खाला।” 16 यीशुए तेई माणहू बै बोलू, “एकी माणहुए एक बड़ी धाम धिनी होर तेइयै बोहू लोका तेसा धामा बै शाधै। 17 जैबै धाम त्यार हुई तैबै तेई माणहुए आपणा नोकर छोंदैं लाउदैं लोका बै शाधदा भेजू कि एजा ऐबै धाम त्यार हुई सा। 18 पर ते सारै आनाकानी केरदैं होर माफी मुंगदैं लागै, पहिलै माणहुए बोलू में एक छेत लेऊ सा मेरा तेई छेता भादैं जाणा जरूरी सा, हाँऊ त हागगै विनती केरा सा कि तू मुंबै माफ केर। 19 तैबै दुजै माणहुए बोलू में पोंज जोड़ी बौल्द लेऐदैं सी होर मूं तिन्हा बै हेरदैं जाणा; हाँऊ त हागगै विनती केरा सा कि तू मुंबै माफ केर। 20 एकी होरी माणहुए बोलू में ब्याह केरू सा हाँऊ नी एजी सकदा। 21 तैबै तेई नोकरै एजीया आपणै मालका बै ए सारी गैला दैसी। तैबै तेई घोरै रे मालकै तेई नोकरा बै झिक्का सेंधे बोलू तू बजारै री गल्ली-गल्ली ना जाइया लंगडै, टुण्डै, काणै हो सैभी कंगाला बै औखै आण। 22 नोकरै एजिया भी बोलू ओ मालका जैण्डा तुसै बोलू दा ती में तेंण्डाए केरू पर आजी बी जैगहा खाली सा। 23 तैबै तेई मालकै नोकरा बै बोलू, तू सडका ना होर बौता ना लोका बै जबरदस्ती कडा केरिया आण ताकि मेरा घोर भौरिला।

24 किबैकि हाँऊ तुसा बै बोला सा तिन्हा शाधै दैं माणहू मुंझै ना कोई बी माणहू मेरी एसा धामा रा स्वाद नी लेई सकदा।

## चेले बैणनै री कीमत

(मती 10:37,38)

25 जैबै यीशु सेंधे लोकै री बड़ी भीड ओढदी लागी दी ती तैबै यीशुए पिछै भाइया बोलू, 26 जुण माणहू आपणै आमा-बापू, भाई-बैहण होर लाडी-बाल बचचै होर आपणी ज्ञानी सेंधे जादा झुरी रैखा सी ते माणहू मेरै चेलै नी होई सकदैं। 27 जुण माणहू आपणै क्रूस चेंकिया मूँ पिछै नी ओंढी सकदा स बी मेरा चेला नी होई सकदा। 28 तुसा मुंझै ऐण्डा माणहू कुण सा जो कि घोर बणाणै ना पहलै तेई घौरा रा खर्चा नी जोडला कि हाँऊ एथा बै पूरा केरी सका सा कि नी? 29 कोइछे ऐण्डा नी हुआ लोड़ी कि तेइरै सारै ढबुए मनियादी बै केलही खर्च होलै होर सैभी लोका तेइरा मजाक बणालै, 30 कि ऐ माणहू घोर बणादा ता लगा ती पर नी बणाई सकू। 31 ऐण्डा राजा कुण सा जो कि लड़ाई केरनै ना पहिलै बेशिया वचार नी केरला कि जुण राजा बीह हज़ार फोऊजी पाइया मूँ सेंधे लड़नै री तेंडियै एन्दा लाग़ा सा कि हाँऊ दस हज़ार फोऊजी लाइया तेइरा मुकाबला केरी सका सा ? 32 नैई ता तेई राजे दुरा नाए आपणै दूत भेजणै होर तेई राजे सेंधे मेल-मिलाप केरना। 33 जैबै तक तुसै आपणा सैब किछ नी छोडलै तैबै तक तुसै मेरै चेलै नी बणी सकदैं।



राहुइदी भेइ मिला सा (15:6)

### स्वादा नैहिंदा लूण

(मती 5:13, मरकुस 9:50)

<sup>34</sup> स्वादै री तेंइयै ता लूण शोभला सा, अगर तेई लुणा रा स्वाद खराब होला ता स किज़ी चिज़ा सेंधें लूणा केरिना। <sup>35</sup> स लूण माटे ना खादी री ज़ैगा ना बी कोम नी एन्दा होर लोका तेइबै बाहरै शेता सी। ज़ौसरे शुणनै रै कोन सी तिन्है शुणिया सोमझेइत्।

### राहुइदी भेइ रा उदाहरण

(मती 18:12-14)

**15** <sup>1</sup> सारै चुंगी लेणु आरे होर पापी माण्हू यीशु हागगै तिन्हरी गैला शुणदै एज़ा ती। <sup>2</sup> तैबै किछ यहुदी पँडत होर धर्मविधि जाणनु आरे आपु ना कुडकुड़ाइया बोलदै लागै, ऐ ता पापी माण्हू सेंधें मिला सा होर तिन्हा सेंधें बेशिया खा-पीया सा। <sup>3</sup> तैबै यीशुऐ तिन्हा बै ऐ उदाहरण दैसु। <sup>4</sup> तुसा मौंझै कुण फुआल एण्ढा सा जुणी हागगै शौउ भेइ सी होर तिन्हा मौंझै ना एक भेइ राहइली, ता स तिन्हा नदीनुऐ भेइ बै बोणा ना छौंड़िया तेसा राहुइदी भेइ बै तैबै तक नी तोपला ज़ैबै तक स तेइबै

नी मिलदी। <sup>5</sup> ज़ैबै तेई फुआला बै स भेइ मिला सा ता स फुआल बड़ै खुश होइया तेसा भेइ बै आपणै कोन्हा पेंधें च़ेका सा। <sup>6</sup> होर घौरा एज़िया आपणै सैभि सेंधी होर पड़ेशी बै कड्डा केरिया बोला सा मूँ सेंधें खुशी मनात् किबैकि मेरी एक भेइ राहुइदी ती होर ऐबै स मुँबै मिली। <sup>7</sup> हाँऊ तुसा बै बोला सा, ज़ैबै एक पापी माण्हू आपणै पाप छौंड़िया परमेश्वरा धिरा बै एज़ा सा ता स्वर्गा ना तेई पापी माण्हू री तेंइयै एतरी खुशी मनाइया सा ज़ेतरी कि नदीनुऐ धर्मी माण्हू री तेंइयै नीं मनाँइदी।

### राहुऐदै सिक्कै रा उदाहरण

<sup>8</sup> तुसा मौंझै कुण एण्ढी बेटड़ी सा ज़ौस हागगै दस सिक्कै सी होर तेथा ना एक सिक्का राहिला होर स बेटड़ी लाम्प पकेइया होर घौरा बै झाडी-बुहारिया तेई सिक्कै बै ताँ तक नी तोपली ज़ाँ तक कि स नी मिलला। <sup>9</sup> हेरा ज़ैबै तेसा बेटड़ी बै स सिक्का मिला सा ता स आपणी सेंघणी होर पड़ेशी बै कड्डा केरिया बोला सा, मूँ सेंधें खुशी मनात् किबैकि मेरा एक सिक्का राहुआदा ती होर ऐबै स मुँबै मिलू। <sup>10</sup> हाँऊ तुसा बै बोला सा ठीक एण्ढै तैरहै पाप छौंड़नु आरे एकी पापी माण्हू री तेंइयै परमेश्वरै रै स्वर्ग दूता सामनै खुशी मनाँइणी।

### बिगड़ै दै बेटै रा उदाहरण

<sup>11</sup> तेथा ना बाद यीशुऐ तिन्हा लोका बै एक होर उदाहरण दैसू, एकी माण्हू रै दुई बेटै ती। <sup>12</sup> तिन्हा मौंझै ना ओछे बेटै आपणै बापू बै बोलू, “ओ बापू जी जायज़ादा ना ज़े मेरा हिस्सा बैणा सा



सुअर चारदा शोहरू (15:15)

तेई तुसै मुंबे दैआत्।” तैबे तेइ बापूए आपणै दुही बेटे बै आपणी ज़ायज़ाद बॉडिया धिनी। <sup>13</sup> किछ रोज़ा बाद ओछै बेटे आपणी सारी ज़ायज़ाद बेची होर घौर छौडिया सारे डैबुए कड़ा केरिया दूर देशा बै नौठा। तौखे तेइयै आपणै सारे डैबुए मोउज़ मस्ती होर बुरै-बुरै कोमा ना खर्च करै। <sup>14</sup> ज़ैबे तेइरै सारे डैबुए खत्म हुए ता तेई देशा ना रूड पौई होर स भूखे मौरदा लागा। <sup>15</sup> तैबे स शोहरू तेई देशै रे एकी सेठा हागगै कोम मुँगदा नौठा होर तेई सेठे स शोहरू आपणै छेता बै सुअर चारदा भेजू। <sup>16</sup> होर स चाहा ती कि जुणा फली बै स सुअरा बै खाणै बै देआ ती तिन्हा खाईया आपणा पेट भौरला होर तेइबै कोई किच्छ नी ती देंदा। <sup>17</sup> जैबे स शोहरू आपणी होशी न आऊ, तैबे स सोचदा लागा कि मेरै बापु रे घौरा ना केतरै मज़दूर सी जुणी बै कि ज़रूरती ना ज़ादा खाणै बै मिला सा होर हाँऊ औखे भूखे मौरदा लागा सा, <sup>18</sup> एबे मूँ उठिया आपणै बापू रे घौरा बै जाणा होर तिन्हा बै बोलणा, बापू जी मैं परमेश्वर होर तुसरै खिलाफ पाप करू सा । <sup>19</sup> एबे हाँऊ तुसरा बेटा बोलणै रे लायक नी रौह। मुँबे तुसै आपणै घौरा

ना नोकरा साही रखा। <sup>20</sup> तैबे स उठिया आपणै बापू रे घौरा बै चौलू। आजी स आपणै घौरा ना थोडी दूर ती कि तेइरै बापुए स हेरू होर बापू बै तेई पैंधे दैया आई। तैबे स बापू ठोर मारिया आपणै बेटे रे गौरे मिलू होर तेई बै माँकी धिनी। <sup>21</sup> तैबे तेई बेटे बापू बै बोलू, “ओ बापू जी एबे हाँऊ तुसरा बेटा बोलणै रे लायक नी रौह किबैकि मैं परमेश्वर होर तुसरै खिलाफ पाप करू सा।” <sup>22</sup> पर तेई बापुए आपणै नोकरा बै बोलू, “शोभलै ना शोभलै झिकड़ै आणा होर एई रे लाआत। एइरै हौथा ना खानदानी मुँदड़ी होर ज़ोंघा ना शोभलै बूट लाआत। <sup>23</sup> होर धाचुएदें मोटे ज़ेही बौकरे बै आणा होर काटा ताकि आसै सब मिलिया खालै होर खुशी मनालै। <sup>24</sup> किबैकि मेरा ऐ बेटा मुँआ ती होर एबे ज़िन्दा हुआ सा। ऐ राहुआ दा ती पर एबे मिलू सा। तैबे ते सबे खुशी मनादें लागै। <sup>25</sup> तेइरा बड़ा बेटा छेता ना ती। ज़ैबे स घौरा बै आऊ ता तेइए घौरा हागगै पुजिया बड़ी घीता-बाता शुणी। <sup>26</sup> तैबे बड़ै बेटे एकी नोकरा ना पुछू, ‘ऐ की होंदा लागा सा?’ <sup>27</sup> नोकरे एजिया बोलू, ‘तुसरा भाई सहि-सलामत घौरा बै वापस आऊ सा होर बापु जी ऐ तेइरै एणै री खुशी ना मोटा ज़ेही बौकरा काटणै द्याऊ दा सा होर आसै सबे खुशी





शोहरू रै एणै री खुशी ना बापू धाम देआ सा (15:27)

मनाँदै लागै दै सी। <sup>28</sup> एसा गल शुणिया बड़ा भाई झिकुआ होर स भीतरा बै नी नौठा। तैबै तेइरै बापुए स बाहरै एजिया समझाऊ। <sup>29</sup> तेइयै आपणै बापू बै जवाब धिना, “हेरा हाँऊ एतरी वौषा ना तुसरी सेवा केरदा लाग़ा सा होर तुसरी हरेक आज़ा बै मनदा लाग़ा दा सा पर तैबै बी तुसै मेरी तैँइयै एक मैम्नू तक नी धिना कि हाँऊ आपणै सेंधी सेंधै खुशी मनाँदा।” <sup>30</sup> पर ज़ैबै तुसरा ऐ ओछ़ा बेटा आपणी सारी धन-दौलता बै बुरै-बुरै कोमा ना खैत्म केरिया आऊ ता तुसै ईई री तैँइयै सैभि ना बड़ा बौकरा काटू होर लोका ना धाम ख्याई। <sup>31</sup> तैबै बापुए तेइबै बोलू, “ओ मेरै प्यारै बेटैआ तु ता हमेशा मूँ सेंधै रौहा सा होर ज़े किछ़ मेरा सा सौ सबकिछ़ तेराए ता सा। <sup>32</sup> पर आसा ईई रोज़ा ना खुशी मनाणी किबै कि तेरा ऐ भाई ज़े मूँआ दा ती ऐबै ज़िन्दा हुआ सा। होर जुण कि राहुआदा ती ऐबै मिलू दा सा।

### चलाक मुन्शी

**16** <sup>1</sup> यीशु आपणै चेलै बै एक कैथ दसा सी। एकी सेठा हागगै एक

मुन्शी ती होर लोकै सेठा सामनै तेई मुन्शी पैँधै दोष लाऊ कि तुसरा मुन्शी तुसरै देबुए बै आपणी मर्जीए खर्च केरदा लाग़ा सा। <sup>2</sup> तैबै तेइ सेठै आपणा मुन्शी शाधु होर तेइबै बोलु, हाँऊ तेरै बारै ना ऐ की लाग़ा सा शुणदा ? तू आपणै मुन्शी होंणै रा हिसाब दै किबैकि तू आगै बै मुन्शी नी रौही सकदा। <sup>3</sup> तैबै स मुन्शी सोच़दा लाग़ा, ऐबै हाँऊ की केरनू? किबैकि मेरै मालका हाँऊ मुन्शी रै कोमा ना खोलणा लाऊ सा होर मूँ ना एतरी ताकत नी आँथी कि हाँऊ गददै कोती सकनू। होर भीख मुँगणै ना ता मुँबै शर्म लाग़ा सा। <sup>4</sup> मूँ हागगै एक तरकीब सा अगर तेतै रै मुताबिक हाँऊ कोम केरनू ता मेरै बोहू सारै सेंधी होंणै। औखना खोलणै ना बाद तिन्हा मेरी मज़त केरनी। <sup>5</sup> तैबै तेइ मुन्शीए आपणै मालकै रै कर्जदार एक-एक केरिया शाधै। मुन्शीए पहलै कर्जदारा ना पुछ़, त पैँधै मेरै मालका रा केतरा कर्जा सा? <sup>6</sup> कर्जदारै उतर धिना, शौऊ मूण तेल, तैबै मुन्शीए तेईबै बोलू तू बेशिया आपणै खातै ना पज़ाह लिख। <sup>7</sup> तैबै मुन्शीए दुजै कर्जदारा ना पुछ़, ‘त पैँधै केतरा कर्जा सा ?’ तेई कर्जदारै बोलू, मूँ पैँधै शौऊ मूण गेहूँ रा कर्जा सा। तैबै मुन्शीए तेइबै बोलू, तू आपणै खातै ना औशी मूण लिख। <sup>8</sup> तैबै मालकै तेई लूचै मुन्शी री बड़ी सराहणा केरी किबैकि तेइयै बड़ी चलाकी सेंधै कोम केरू। किबैकि एसा दुनियै रै लोका आपणै बौकतै रै लोका मोंझै आपणै रीति व्यवहारा ना धर्मी लोका ना ज़ादा चलाक सी। <sup>9</sup> तैबै यीशुए बोलू, “हाँऊ तुसा बै बोला सा कि दुनियै री धन दौलता ना आपणी तैँइयै सेंधी

बणात्। तैबै तिन्हा अन्नत जीवना ना तुसरा स्वागत केरना”। <sup>10</sup> जुण थोडै जेही ना बशाह रै काबिल सा स बोहू ना बी बशाह रै काबिल सा होर जुणी पैधै थोडै जेही ना बी बशाह नी केरी सकदै तेई पैधै बोहू ना बी बशाह केरना मुश्किल सा। <sup>11</sup> अगर तुसै दुनियावी धन-दौलता ना विश्वास योग्य नी आँथी ता तुसा बै सैच्चा धन कुणी देणा ? <sup>12</sup> अगर तुसै दुजै री धन-दौलता ना बशाह केरनै लायक नी रौहदै ता जे धन-दौलत तुसरी आपणी सा स तुसा बै कुणी देणी ? <sup>13</sup> कोई बी नोकर दुई मालकै री सेवा नी केरी सकदा किबैकि ऐण्डा करनै सँधै तेई एकी सँधै ता मिलिया रौहणा पर दुजै सँधै नैई। <sup>14</sup> यहूदी धर्मी पँडत जो धन-दौलतै रै लालची ती ते यीशु री शिक्षा शुणीया तिन्हरा मज़ाक उड़दैं लागै। <sup>15</sup> यीशुऐ तिन्हा बै बोलू, “तुसै ता माण्हू रै सामनै आपणै-आपू बै धर्मी सोमझा सी पर परमेश्वर तुसरै मना बै ज़ाणा सा। ऐ दुनिया जुणी गैला रा आदर केरा सा स परमेश्वरै री नज़री ना नफरतै रै लायक सा। <sup>16</sup> ज़ैबै तक बपतिस्मै देणू आए येहन्नै प्रभु रा वचन नी दसू ती तैबै तक लोका मूसै री धर्म विधि होर भविष्यावाणी केरनू आए बै मना ती, पर ऐबै परमेश्वरै रै राज्य रै जानै री गैला रा प्रचार होंदा लागा सा होर सैबै लोका एई राज्य पाणै री तेंडै ऐँदै लागै सी। <sup>17</sup> एथा रा मतलब ऐ नी आँथी कि धर्मविधि रा कोई मतलब नी रौहू। धर्मविधि ता स्वर्ग होर धौरती ना बी बोहू पक्की सा। <sup>18</sup> ज़ैण्डा कि, “कोई बी माण्हू अगर आपणी लाड़ी बै तलाक देआ सा होर कौसी होरी बेटड़ी सँधै ब्याह

केरा सा ता स पाप केरा सा होर जुण तलाक देउईदी बेटड़ी सँधै ब्याह केरा सा स बी पाप केरा सा।

### सेठ माण्हू होर गरीब लाज़र

<sup>19</sup> यीशुऐ एक होर उदाहरण दैसू, एक सेठ माण्हू ती। स मेंहगै-मेंहगै झिकडै ला ती होर हर रोज़ सुख चैन होर ठाटा ना रौहा ती। <sup>20</sup> लाज़र नाँ रा एक कँगाल माण्हू जो कि ज़ख्मा सँधै भौरूआदा ती तेइबै कोई माण्हू तेई सेठ माण्हू री डेही पैधै छौड़ा ती <sup>21</sup> लाज़र तेई सेठ माण्हू रै दुआरा हागगै बेशा ती। तौखै स सेठ माण्हूऐ शेटू दै जुठै बै खा ती होर कुतै एज़िया तेइरै ज़ख्मा बै लैमका ती। <sup>22</sup> किछ़ रोज़ा बाद स कँगाल माण्हू मुँआ होर स्वर्गदूतै तेइरी आत्मा नेइया स्वर्गा ना अब्राहमै रै फाड़ै ना पजाई। तैबै किछ़ रोज़ा बाद स सेठ माण्हू बी मुँआ होर स पौथू। तेइरी आत्मा नरका ना पौई। <sup>23</sup> नरका ना तड़फदी घेरै तेई ना बोहू दूर आब्राहमै रै फाड़ै ना लाज़र हेरूआ । <sup>24</sup> तैबै तेइयै हाक पाइय बोलू, “ओ बापू अब्राहम मूँ पैधै दया केरिया लाज़रा बै भेज ताकि ऐ आपणी गुठी पाणी ना शौगिया मेरी ज़ीभा बै ठण्डा केरला किबैकि हाँऊ औखै औगी ना तड़फदा लागा सा।” <sup>25</sup> पर आब्राहमै बोलू, “ओ मेरै बेटै याद रख तँ आपणी ज़िन्दगी ना सारी शोभली चीज़ा पाई सी ज़ैबैकि लाज़रै बुरी चीज़ा, होर ऐबै ऐ औखै मज़े ना सा होर तू तौखै दुःख झेलदा लागा सा। <sup>26</sup> एतराए नी आँथी, तेरै होर आसरे बिचा ना एक बड़ी खाई सा। तौखै ना कोई औराबै नी एज़ी सकदा होर ना कोई औखै न पौरै बै एज़ी सकदा। <sup>27</sup> तैबै तेई

सेठ माणहुए बोलू, ता हे बापू हाँऊ तौ हागगै विनती केरा सा कि लाज़रा बै मेरै घौरा भेज़। <sup>28</sup> किबैकि मेरै पाँज भाई सी हाँऊ चाहा सा कि लाज़र तिन्हा हागगै जाइया तिन्हा बै एई नरकै रै बारै ना समझाला ताकि मौरनै ना बाद ते एई नरका बै नी लोड़ी आऐ। <sup>29</sup> पर आब्राहमै बोलू, तिन्हा हागगै मूसा होर गुरु सी तिन्हा बै तिन्हरी शुणनै दै। <sup>30</sup> तैबे सेठे बोलू, नैई बापू अब्राहमा, अगर कोई मूँएदें ना तिन्हा हागगै ज़ाला ता तिन्हा परमेश्वरा धिराबै फिरना। <sup>31</sup> अब्राहमै तेइबै बोलू, अगर ते मूसा होर गुरु री नी शुणदें ता कोई मूँएदें माणहू ना तिन्हा हागगै ज़ाला ता तिन्हा तेइरी बी नी शुणनी।

### यीशु ठोकर होर माफी रै बारै ना शिक्षा देआ सी

(मती 18:6-7, 21-22, मरकुस 9:42)

**17** <sup>1</sup> एक रोज़ यीशुए आपणै चेलै बै बोलू, लोका ना पाप करणू आई गैला ता बोहू होणी पर तेई माणहू बै कड़ी सज़ा मिलणी जो होरी ना पाप करा सा। <sup>2</sup> जुण माणहु मूँ पैधै बशाह केरनू आऐ ना पाप करा सा तेइरै गौआ ना गरका पाथर बोनिया तेइबै समुंदरा ना शेटलै ता तेइरी तैइयै ऐ सज़ा बी कम सा किबैकि परमेश्वरा तेइबै एथा ना बी कड़ी सज़ा देणी। <sup>3</sup> “खबरदार! अगर तेरा कोई भाई पाप केरा सा होर तेइ पापा बै मना सा ता तू तेइबै माफ केर।” <sup>4</sup> अगर तेरा भाई सौत बार तैरै खिलाफ पाप केरा सा होर सौत बार एज़िया माफी मुँगा सा ता तू तेइबै माफ केर।

### बशाह री शिक्षा

<sup>5</sup> चेलै यीशु बै बोलू, “प्रभु जी आसरै बशाह बै बढ़ात्। <sup>6</sup> प्रभु यीशुए तिन्हा बै बोलू, “अगर तुसा आन्दरै राई रै एकी दाणै बराबर बी बशाह होंदा ता तुसै ऐई तूतै रै बूटै बै बोलदें कि तू ज़लाइँ सेंघै नोई बै जा ता तेई तुसरी शुणनी ती।

### एकी नोकरा रा फर्ज़

<sup>7</sup> तुसा मूँझै ऐन्ढा नोकर कुण सा जो कि छेता ना हौल लाइया होर भेडा बै चारिया एला ता तेइरा मालक बोलला कि एज होर रोटी खाँदा बेश ? <sup>8</sup> कि तेई मालका ऐन्ढा बोलणा कि पहलै मेरी तैइयै रोटी बणा होर जाँ ढौई हाँऊ खानू पिनु नी ताँ ढौई तू मेरी सेवा केर तैबे ना बाद तू बी खाई पीई। <sup>9</sup> आपणा सारा कोम करणै ना बाद बी तैई मालका आपणै नौकरा रा एहसान नी मनणा। <sup>10</sup> एण्टे तैरहै, जैबै तुसै मेरै सारै कोम होर मेरी सारी आज्ञा बै मैनलै ता तुसै एण्टा बोलेइत्, आसै एसा सफारशी लायक नी आँथी, आसै ता नक्कमै सेवक सी होर आपणा फर्ज़ पूरा केरना लाऊ सा।

### यीशु दस कोढ़ी माणू बै ठीक केरा सी

<sup>11</sup> यीशु सामरिया होर गलीलै रै बिचियै आघै यरुशलैमा बै जाँदें लागै दै ती। <sup>12</sup> कौसी गाँ बै जाँदी घेरै यीशु बै दस कोढ़ी मिलै। <sup>13</sup> तिन्है कोढ़ियै दूर खइ होइया जोरा सेंघै बोलू, “ओ गुरु जी! आसा पैधै दया केरात्।” <sup>14</sup> यीशुए तिन्हा बै हेरिया बोलू, “ज़ाआत्, होर जाईया आपणै आपा बै ययरुशलैम मन्दिरै रै

पजीयारै बै रिहात्” होर जाँदै-जाँदै ते ठीक हुऐ।<sup>15</sup> तिन्हा मौँझै जैबै एकियै हेरू कि हाँऊ ठीक हुआ ता स परमेश्वरै री जय-जयकार केरदै वापस आऊ।<sup>16</sup> स एज़िया यीशु री ज़ोंघा पैधै पौड़िया यीशु रा धन्यवाद केरदा लागा; होर स सामरी ती।<sup>17</sup> तेई हेरिया यीशुऐ बोलू, “कि में दसै रै दस कोदी ठीक नी केरै तैबै होरा ते नोऊ कौखै नौँठै।”<sup>18</sup> जे यहूदी नी आँथी एई परदेशी छौँड़िया कोई होर नी निकता जो परमेश्वरा रा धन्यवाद केरदा? <sup>19</sup> तेथा ना बाद यीशुऐ तेई माहणू बै बोलू, “खड़ा उठ होर जा किबैकि तैं परमेश्वरा पैधै बशाह केरू तैबै तू ठीक हुआ।”

### परमेश्वरै रै राज्य रा एणा

(मती 24:23-28,37-41)

<sup>20</sup> एक बार यहूदी पुरोहितै यीशु ना पुछू कि परमेश्वरा रा राज्य कैबै एणा? यीशुऐ तेइबै बोलू, “परमेश्वरा रा राज्य प्रगट रूपा ना नी एँदा कि तुसै तेइबै हेरी सकलै। <sup>21</sup> लोका नी बोलणा हेरा परमेश्वरा रा राज्य औखै सा कि तौखै सा किबै कि हेरा परमेश्वरा रा राज्य तुसा मौँझै सा। <sup>22</sup> तैबै यीशुऐ आपणै चलै बै बोलू, “तिन्हा ध्याइँ एणा जैबै तुसै माण्हू रै बेटै रै ध्याइँ ना एकी ध्याइँ बै हेरना चाहलै पर स ध्याइँ तुसाबै भाणै नी मिलणा। <sup>23</sup> पर लोका तुसा बै बोलणा कि हेरा परमेश्वरा रा राज्य औखै सा कि तौखै सा पर तुसै तिन्हा पिछै हेरेइत् जाँदै। <sup>24</sup> ज़ेण्टे सर्गा ना बिज़ली चमका सा तैण्टे माण्हू रै बेटै बी आपणै रोज़ा ना प्रगट होणा। <sup>25</sup> पर पहिलै ए जरूरी सा कि माण्हू रा बेटा

दुःख चेकला, होर एई जुगै रै लोका तैइबै तुच्छ बुझलै। <sup>26</sup> माण्हू रै बेटै रा ध्याइँ बी एण्डा होणा, ज़ेण्डा की नुहै रै ध्याइँ ना हुआ ती। <sup>27</sup> जुणी ध्याइँ तक नूह आपणै ज़हाजा ना नी बैठा, तैई ध्याइँ तक लोका खा-पीया ती, होर तिन्हा ना ब्याह-शादी होआ ती। तैबै सारी धौरती ना पाणी भौरूआ होर सैभै लोका खैत्म हुऐ। <sup>28</sup> औज़की दुनिया ना बी एण्डाए होणा, ज़ेण्डा कि लूतै रै बौक्ता ना हुआ ती, लोका खाँदै-पीँदै, लेण-देण केरदै, बुटै लाँदै होर घौरा बणाँदै लागै ती। <sup>29</sup> पर जुणी रोज़े लूत सदोम शैहरा ना निकता तेही ध्याइँ ना सर्गा ना औग होर गन्धका रा गाश पौऊ होर सबकिछ खैत्म हुआ। <sup>30</sup> माण्हू रै बेटै रै एणै रै ध्याइँ ना बी एण्डाए होणा। <sup>31</sup> तेई ध्याइँ ना जुण छापरा पैधै होला होर तेइरा समान भीतरै होला ता स आपणै समान नेंदा नी उतरला होर जुण छेता ना सा स वापस नी एला। <sup>32</sup> लुतै री लाड़ी सैधै जे हुआ तेइबै याद रखा। <sup>33</sup> जुण आपणी ज़ानी बै बचाणा चाहा सा ता तेई स गँवाणी होर जुण आपणी ज़ानी बै गँवाणा चाहा सा ता तेई स बचाणी। <sup>34</sup> हाँऊ तुसा बै बोला सा, “तेसा रातियै दूई माण्हू एकी साथरै ना होणा, तिन्हा मौँझै ना एकी माण्हू नेइणा होर दुजा छौँड़ी देणा। <sup>35</sup> अगर दुई बैटड़ी कैठे चक्की पीशदी होली, ता एक नैईणी होर एक छौँड़ी देणी। <sup>36</sup> दुई माण्हू छेता ना कोमा केरदै होणा, तिन्हा मौँझै ना एकी नैईणा होर दुजा छौँड़ी देणा। <sup>37</sup> तैबै प्रभु यीशु रै चलै पुछू, “हे प्रभु, ऐ सैब कौखै होणा ? तैबै प्रभु यीशुऐ तिन्हा बै जवाब धिना, जेण्टे इलणी रै कठा होणै

सैधै पता चला सा कि ऐथ काँईछै लाश पौईदी सा तैण्डे इन्हा चिन्ह-चमत्कारा ना ऐ पता चलणा कि परमेश्वरै रै राज्य रा बौक्त नैइ आऊ दा सा।

### विधवा होर अधर्मी न्यायधीशा रा उदाहरण

**18** <sup>1</sup>एक रोज़ यीशुऐ आपणै चेलै बै एक उदाहरण दैसू, ताकि ते लगातार प्रार्थना केरदैं रोहलै होर नराश नी होलै। <sup>2</sup>यीशुऐ बोलू, “कोसी शैहरा ना एक फैसला करनू आ रोहा ती। स कोसी माणहु री परवाह नी ती केरदा होर स परमेश्वरा ना बी नीती डौरदा।” <sup>3</sup>तैई शैहरा ना एक विधवा बी रोहा ती होर स तेई फैसलै केरनू हागगै घैड़ी-घैड़ीऐ एज़िया बोला ती, “मेरै फैसलै केरिया मेरै बेईरी ना मुँबे बचात्।” <sup>4</sup>किछ रोज़ा ढाँई स फैसलै करनू आला हिलै-भानै केरदा रोहू, पर एक रोज़ तेइयै सोचु कि हाँऊ ना ता परमेश्वरा ना डौरदा होर ना लोकै री परवाह केरदा, <sup>5</sup>पर ऐ विधवा मुँबे घैड़ी-घैड़ीऐ एज़िया तँग केरा सा, मूँ ऐबै पतै लाइया एसरा फैसला केरना ताकी ऐ आगै बै मुँबे तँग नी केरली। <sup>6</sup>तैबै यीशुऐ बोलू, “एई अधर्मी ना किछ सीखात्।” <sup>7</sup>आखिरकार तेइयै बी एक सही फैसला लेऊ। जे रात ध्याइ परमेश्वरा हागगै विनती केरा सी कि परमेश्वरा तिन्हरा सही फैसला नी केरना? कि परमेश्वरा तिन्हरै बारै ना देरी केरनी? <sup>8</sup>हाँऊ तुसा बै बोला सा, “परमेश्वरा तुरन्त तिन्हरा फैसला केरना। तैबै बी माणहु रा बेटा जैबै एला ता कि तेई धौरती पैंधे बशाह पाणा?”

### यहूदी पँडत होर चुँगी लेणु आला

<sup>9</sup>तैबै यीशुऐ तिन्हा बै ऐ उदाहरण दैसू जो आपणै आपा बै बड़ा धर्मी होर दुजै बै तुच्छ सोमझा ती। <sup>10</sup>“एक बार मन्दिरा बै दूई माणहू प्रार्थना केरदैं नौठे। एक चुँगी लेणु आला होर दुजा यहूदी पँडत ती। <sup>11</sup>स यहूदी पँडत दूर खैडै होइया ऐण्ठी प्रार्थना केरदा लागा, “ओ परमेश्वर हाँऊ तेरा धन्यवाद केरा सा कि हाँऊ होरी साही नी आँथी, ना हाँऊ कौसी बै धोखा देंदा, ना हाँऊ व्यभिचारी आँथी होर ना हाँऊ एई चुँगी लेणु आऐ साही आँथी। <sup>12</sup>हाँऊ हप्तै ना दुई बारी व्रत रखा सा होर आपणी सारी कमाई रा दसवाँ हिस्सा दान देआ सा। <sup>13</sup>पर चुँगी लेणु आ स माणहु दूर खैडै होइया, टुँबडी मुँडी केरिया होर छाति पिटी-पिटीया होर दुःखी मनै ऐण्ठी प्रार्थना केरदा लागा, “हे प्रभु, हाँऊ ता पापी माणहु सा मुँबे माफ़ केर।” <sup>14</sup>तैबै यीशुऐ बोलू, “हाँऊ तुसा बै बोला सा, स चुँगी लेणु आ परमेश्वरै री नज़री ना धर्मी ठैहरू।” पर स यहूदी पँडत परमेश्वरै री नज़री ना पापी ठैहरू, किबैकि स आपणै-आपा बै धर्मी सोमझा ती। किबैकि जुण आपणै-आपा बै बड़ा बुझा सा तेई होःछै गिणिना होर जुण आपू बै होछा बुझा सा तेई परमेश्वरै री नज़री ना बडै गिणिना।

### शोहरू बै आर्शीवाद

<sup>15</sup>एक रोज़ किछ आमा-बापू आपणै शोहरू पाइया यीशु हागगै आऐ ताकि यीशु शोहरू पैंधे हौथ रखिया तिन्हा बै आर्शीवाद देलै पर चेलै तिन्हा बै झिडका

ती। 16 पर यीशुए शोहरू आपू हागगै शाधै होर बोल्, “शोहरू बै मूँ हागगै एणै दैआ इन्हा बै मता रोकदै किबैकि परमेश्वरा रा राज्य इन्हराए सा।” 17 यीशुए बोल्, हाँऊ तुसा बै सच बोला सा जैबै तँई तुसै परमेश्वरै रै राज्य बै शोहरू साही ग्रहण नी करलै ता तुसै स्वर्गा बै नी जाइ सकदै।

### सेठ माण्हू

(मती 19:16-30; मरकुस 10:17-31)

18 कौसी धर्मी नेतै यीशु ना पुछ्, “ओ उतम गुरु जी ! हाँऊ अमर होणै री तँइयै की केरनू ?” 19 यीशुए तेइबै बोल्, “तू मुँबे उतम किबै बोला सा किबै कि परमेश्वर छौड़िया होर कोई बी उतम नी आँथी।” 20 यीशुए तेइबै भी बोल्, “तू परमेश्वरै धिनी दी विधि रै विधाना बै ता ज़ाणा सा: व्यभिचार नी केरना, कौसी रा खून नी केरना, चोरी नी केरनी, कौसी रै खिलाफ झूठी गुआही नी देणी, होर आपणै आमा-बापू रा आदर केरना । 21 यहुदी पँडतै बोल्, इन्हा गैला बै ता हाँऊ होछै ना फेटै मैनदा आऊ सा। 22 यीशुए बोल्, “हाज़ी बी त ना एकी गल्लै री कमी सा। तू आपणी सारी ज़ायज़ादा बै बेच होर गरीबा बै बॉड तैबै तौभै स्वर्गा ना धन मिलणा होर तू मूँ पिछै एज़। 23 स धर्मी नेता इन्हा गैला शुणियाँ दुःखी हुआ किबैकि तेई हागगै बड़ी भारी ज़ायज़ादा ती होर सो बड़ा सेठ ती। 24 तेइ सेठा बै दुःखी हेरिया प्रभु यीशुए बोल्, “जुणी माण्हू हागगै बोहू धन-दौलत सा तेइरा परमेश्वरै रै राज्य ना प्रवेश केरना केतरा मुश्किल सा।” 25 आपणी धन-दौलता पँधै भरोसा केरनु

आलै माण्हू रा स्वर्ग राज्य ना प्रवेश केरना केतरा मुश्किल सा जैबै कि ऊँटा रा सिऊणी रै छेदै फेटै निकुणा असान सा। 26 लोकै जैबै ए गैला शूणी ता बोलदै लागै, तैबै कुण मुक्ति पाई सका सा ? 27 यीशुए बोल्, “जुणा कोम माण्हू री तँईए मुश्किल सी ते कोम परमेश्वरै री तँईए सान सी।” 28 तैबै यीशु रै चलै पतरसै बोल्, “हेरात् प्रभु जी आसै ता आपणा घोर-बार होर सैब किछ छौड़िया तुसा पिछै चलदै लागै दै सी।” 29 यीशुए तिन्हा बै बोल्, “तँ सही बोल् पर हाँऊ तुसा बै सच बोला सा ऐणढा कोई नी आँथी जुणिए आपणै घोर-बार,लाड़ी, बाल-बच्यै, भाई-बन्धु होर आमा-बापु परमेश्वरै रै राज्य री तँइयै छौड़ै दै होलै। 30 अगर कोई ऐणढा केरा सा ता स एसा ज़िन्दगी ना कई गुणा ज़ादा आशीष पाआ सा होर एणु आए जुगा ना तिन्हा बै अनंत ज़िंदगी बी मिला सा।

### यीशु त्रिजी बार आपणी मोऊती रै बारै ना भविष्यवाणी केरा सी

(मती 20:17-19; मरकुस 10:32-34)

31 यीशुए आपणै बारा चलै आपू सँधै नेए होर तिन्हा बै बोल्, “हेरा आसै यरुशलैमा बै चौलै सी होर जेतरी गैला माण्हू रै बेटै रै बारै ना भविष्यवक्तै लिखी सी ते सब तौखै पुरी होणी।” 32 तौखै स अधर्मी लोकै रै होथा ना दैइणा। तौखै तिन्हा तेइरा मज़ाक उड़ाणा, तेइरी बेइजती केरनी होर तेई पँधै थूकणा। 33 तिन्हा स कोइँ लाइया मारना होर स मकाणा, पर तेई त्रीजै ध्याड़ी भी ज़िन्दै होणा। 34 पर यीशु जे गैला तिन्हा बै दैसदै लागै ती तिन्है चलै



यीशु होर जक्कई (19:5)

ते नी सोमझी होर ए सारी गैला तिन्हा ना छुपी रौही।

**यीशु एकी काणै माण्हू बै ठीक केरा सी**

(मती 20:29-34; मरकुस 10:46-52)

<sup>35</sup> ज़ैबै यीशु होर तिन्हरै चेलै यरीहो नाँ री ज़ैगा ना पुजै, ता तौखै एक काणा भिखारी बेठा ती होर स भीख मुँगदा लागा दा ती। <sup>36</sup> लोकै रै हल्लै शुणिया तेई भिखारिये लोका ना पुछू, “ओखै ऐ की लागा सा होंदा?” <sup>37</sup> तिन्है लोकै तेई भिखारी बै दैसू कि इसै आघे यीशु नासरी ज़ाँदै लागै सी। <sup>38</sup> तैबै स भिखारी जोरा सेंघे हाका पाईया बोलदा लागा, “ओ यीशु, दाऊदे रै बेटैया मूँ पेंधे दया केर !” <sup>39</sup> जुणा लोका आगै-आगै आँढदै लागै ती ते तेई भिखारी बै ज़िडका देंदै लागै पर स होर बी जोरा सेंघे बोलदा लागा, “ओ यीशु दाऊदे रै बेटैया मूँ पेंधे दया केर। <sup>40</sup> जैबै यीशुए तैई भिखारी री हाक शूणी ता ते रुकै होर आपणै चेलै बै बोलू एई माणहु बै मु सामनै आणा। जैबै तिन्है चेलै स भिखारी यीशु सामनै नेऊ ता यीशुए स भिखारी पुछू, <sup>41</sup> तू की चाहा सा कि हाँऊ तेरी तैईये की केरनु ? तैबै तैई भिखारिये बोलू, “हे प्रभु,

हाँऊ हेरना चाहा सा। <sup>42</sup> तैबै यीशुए तेई भिखारी बै बोलू, “ठीक सा, तू हेरी सका सा किबैकि तेरै बशाहै तू ठीक केरू।” <sup>43</sup> तैबै स भिखारी एकदम ठीक हुआ होर स हेरदा लागा, होर परमेश्वरै री जय जयकार केरदै-केरदै यीशु पिछै चैलदा लागा। जेतैरै बी लोकै ऐ चमत्कार हेरू ते सब परमेश्वरै री जय-जयकार केरदै लागै।

**यीशु होर जक्कई**

**19** <sup>1</sup> यीशु यरीहो गाँ आघे ज़ान्दै लागै ती। <sup>2</sup> तौखे जक्कई नाँ रा एक माणहु ती। स चुँगी लेणु आए रा मुखिया ती होर स बोहू सेठ ती। <sup>3</sup> स यीशु बै हेरना चाहा ती पर बोहू भीड होणै री वज़ह ना स यीशु बै नी ती हेरी सकदा, किबैकि स कदा ना होच्छा ती। <sup>4</sup> तैबै स ठोर मारिया आगै-आगै नौठा होर बाँतै रै कनारै गूलरै रै बुटै ना चैदू किबैकि यीशु बी तेसा बाँतै आघे ज़ाणु आए ती। <sup>5</sup> ज़ैबै यीशु तेसा ज़ैगा ना पुजै, ता झाँऊ भाईया बोलू, ओ जक्कई छैके उतरिया भ्याँऊ एज़ किबैकि औज़ मेरा तेरै घौरा ना रौहणा ज़रूरी सा। <sup>6</sup> जक्कई झट-पट भ्याँऊ आऊ होर खुशी सेंघे तेईए प्रभु यीशु आपणै घौरा बै नेए। <sup>7</sup> लोका बै ऐ गल्ल शोभली नी लागी होर ते आपु ना कुडकुणादे लागै कि यीशु ता एक पापी माण्हू रै घौरा ना पाहूणै बैणीया नौठे। । <sup>8</sup> पर जक्कई खड़ा हुआ होर यीशु बै बोलू मूँ आपणी सारी ज़ायज़ादा रा औंधा हिस्सा गरीबा बै देणा, अगर में कोई ठैगूदा होला ता तेईबै मूँ चार गुणा वापस देणा। <sup>9</sup> यीशुए तेईबै बोलू, औज़ ऐई घौरा ना उद्धार

आऊ सा किबैकि ऐ माणहु बी अब्राहमा रा बेटा सा। <sup>10</sup>माणहु रा बेटा राहुऐदैं माणहु बै तोपदा होर तिन्हारा उद्धार केरने री तेईए आऊ दा सा ।

### दस नोकरा रा उदाहरण

(मती 25:14-30)

<sup>11</sup> लोके री भीड़ यीशु री इन्हा गैला बै शुणदी लागी ती। तैबै यीशुऐ तिन्हा बै एक उदाहरण दैसू किबैकि ते यरूशलेम पुजणु आए ती होर ऐण्ठा बुझा ती कि परमेश्वरा रा राज्य एभै ऐणु आ सा। <sup>12</sup>यीशुऐ बोलू, एक सेठ माणहु दूर दैशा बै राजा बैणदा नौठा। ताकि स राज-पाठ पाईया वापस एला। <sup>13</sup>ज़ाणै ना पहिलै तेई सेठे आपणै दस नोकर शाधै होर तिन्हा बै एक-एक सुनै रै सिक्कै धिनै होर तिन्हा बै बोलू, “ज़ाँ तक हाँऊ नी एनू ताँ तक तुसै एथै लाइया लेण-देण केरदैं रौहीत्। <sup>14</sup>तेई शैहरै रै लोका तेई सैंधै बैर केरा ती होर तेई पिछै किछ चुनुऐदैं लोका एसा खबर लेइया भेजै कि आसै नी चाँहदैं कि ऐ सेठ माणहु आसा पैंधै राज केरला। <sup>15</sup>जैबै सौ सैठ माणहु राज-पाठ लेइया वापस आऊ तैबै तेइयै आपणै ते दस नोकर शाधै जुणीबै तेइयै सुनै रै दस सिक्कै धिनै दै ती किबैकि स ज़ाणना चाहा ती कि तिन्हा सुनै रै सिक्कै सैंधै तिन्है होर केतरै कमौऐ। <sup>16</sup>पहलै नोकरै एज़िया बोलू, “ओ स्वामी में तेई सिक्कै लाइया दस होर सिक्कै कमौऐ सी।” <sup>17</sup>तेई सेठ माणहुऐ तेई नोकरा बै बोलू, “ओ उतम दास तू भरोसै केरनै लायक सा किबैकि तू थोड़ै ज़ेही

ना बशाह लायक बणी रौहू। हाँऊ तौभै दस गाँ रा प्रधान बणा सा।” <sup>18</sup>तैबै दुजै नोकरै एज़िया बोलू, “ओ स्वामी में तिन्हा सिक्कै ना पोंज़ होर सिक्कै कमौऐ सी।” <sup>19</sup>तेई सेठे तेई नोकरा बै बी बोलू, “शाबाश! हाँऊ तौभै पोंज़ गाँ रा प्रधान बणा सा।” <sup>20</sup>पर त्रीजै नोकरै एज़िया बोलू, “ओ स्वामी हेर में तुसरा स सुने रा सिक्का रमाला ना बोनिया सभाईया रैखू सा। <sup>21</sup>किबैकि हाँऊ तुसा ना डौरा ती। तुसै बड़ै कड़क माणहु सी। ज़ौखै नी बाँहदैं तौखै ना तुसै काटा सी होर ज़ौखै तुसै नी रखदैं तौखना तुसै चैका सी। <sup>22</sup>तैबै तेई सेठ माणहुऐ तेई नोकरा बै बोलू, “ एई दुष्ट नोकरा, जैबै तौभै पता ती की हाँऊ कड़क माणहु सा, ज़ौखै हाँऊ नी बाँहदा तौखना काटा सा,” <sup>23</sup>तैबै तैं मेरा सुनै रा सिक्का ब्याज़ा पैंधै किबै नी धिना? तकि मुँभै वापस एज़िया ब्याज़ ता मिलदा। <sup>24</sup>तैबै तेई सेठ माणहुऐ होरा तिन्हा नोकरा बै बोलू, “एई नोकरा ना तेई सुनै रै सिक्कै बै वापस मुँगा होर जुणि हागगै सैभी ना ज़ादा सी तेईबै दैआत्,” <sup>25</sup>होरा तिन्है नोकरै बोलू, “ओ स्वामी तेई हागगै ता दस सुनै रै सिक्कै सी।” <sup>26</sup>तेई सेठे बोलू , “हाँऊ तुसा बै बोला सा जुणी हागगै सा तेई बै होर मिलणा होर जुणी हागगै नी आँथी जे किछ तेई हागगै सा तेइना स बी वापस मुँगिणा।” <sup>27</sup>मेरै तिन्हा बेइरी बै जुणा नी चाँहदैं ती कि हाँऊ राज़ा बैणदा तिन्हा बै मूँ सामनै आणिया मारात्।



## यीशु रा यरुशलमेमा ना प्रवेश

(मती 21: 1-11, मरकुस  
11:1-11, यहुन्ना 12:12-19)

28 इन्हा गैला केरिया यीशु यरुशलमेमा धिराबे नौठे होर ते आपणे चेलै ना आगे-आगे ओढदे लागे ती। 29 जेबे ते जैतून नाँ रे ढौगा पेंधे बैतफगे होर बैतनिय्याह गाँ ना पुजे, ता यीशुए आपणे दुई चेलै भेजे, 30 यीशुए तिन्हा चेलै बै बोलू, पारलै ऐई गाँ बै ज़ाआत् तौखे तुसा बै एक गधी रा बच्चा बोनुआ दा मिलणा, जुणी पेंधे आज्जी तक कोई बी नी बेटा दा, तुसै तेइबे खोलिया औखे आणा। 31 अगर तुसा ना कोई पुछला कि तुसै ऐ किबै लाऊ सा खोलणा ता एण्डा बोलेईत कि प्रभु बै ऐई री जरूरत सा। 32 जेबे तै चेलै तौखे नौठे ता तिन्हा बै स गधी रा बच्चा जैन्डा यीशुए बोलू ती तैण्डा ऐ बोनुँदा मिलू। 33 जेबे तै चेलै तेई गधी रे बच्चै बै खोलदे लागे ती ता तैसा गधी रे मालकै तिन्हा बै बोलू, तुसै ऐई बच्चै बै किबै खोलदे लागे सी? 34 तैबे तिन्है चेलै जवाब धिना कि प्रभु बै ऐईरी जरूरत सा। 35 तिन्है चेलै स गधी रा बच्चा खोलिया प्रभु यीशु हागै आणु। तिन्है आपणे झिकडे खोलिया गधी रे बच्चै पेंधे रखे होर प्रभु यीशु तेथा पेंधे बशाए। 36 जेबे यीशु जादें लागे ती ता ते लोका आपणे झिकडे बाँता ना बछाँदे जा ती। 37 जेबे यीशु जैतून ढौगे भ्याऊँ पुजे ता चेलै री सारी मण्डली जुणिये यीशु रे चमत्कार भाए ती जोरा सेंधे परमेश्वरे री जय-जयकार केरदी लागी,

38 “धन्य सा स राजा जो प्रभु रे नाँ ना एजा सा,  
“स्वर्गा ना शान्ति होर स्वर्गा ना रौहणू आणे परमेश्वरे री महिमा हो।”

39 भिडा ना खड़े किछ फरीसिये यीशु बै बोलू, गुरु जी आपणे चेलै बै चुप बेशणे बै बोला। 40 यीशुए बोलू, अगर ए चुप बेशलै ता बोतै रे इन्हा पात्थरा ज़ोरा सेंधे बोलणा।

## यीशु यरुशलमे री तेंइयें रोआ सी

41 जेबे यीशुए नेइ पुजिया यरुशलमेमा धिरावै हेरू ता ते रौंदे लागे होर बोलदे लागे, 42 “मेरी बड़ी इच्छा ती कि तू औज ज़ाणदा कि तौभै शान्ति कौस ना मिलणी पर तें ऐ गल नी सोमझी।” ऐबे देर हुई सा होर शान्ति री ए गैला त ना छुपी सी। 43 ते ध्याड़े एणू आणे सी जेबे तेरे बैईरी तेरी तेंइयें हर तरफा ना मुसीबता खड़ी केरनी। तिन्हा तू घेरना होर हर पासै ना त पेंधे दबाव पाणा। 44 तिन्हा तू होर त आन्दरै रौहणू आणे तेरे बच्चै सब खैत्म केरनै। तिन्हा तेरी भिती रे एक पाथरा पेंधे दुजा पथर नी रोहणे देणा किबैकि परमेश्वरे जे मुक्ति पाणे रा मौका तौभै धिना ती तें तैता रा नाँह केरू।

## यीशु मन्दिरै रे दुकानदारा बै हटा सी

(मती 21:12-17, मरकुस  
11:15-19, यहुन्ना 2:13-22)

45 तैबे यीशु मन्दिरा बै नौठे होर जुणा लोका तौखे दुकानदारी केरदे लागे ती



यीशु मन्दिरै रे दुकानदारा बै हटा  
सा (19:45)

तिन्हा बै मन्दिरा ना बाहरै खोलदैं लागै।  
46 यीशुए तिन्हा बै बोलू, “पवित्र शास्त्रा  
ना ऐ लिखु सा मेरा घौर प्रार्थना रा  
घौर होणा पर तुसै ता ऐ डाकू रा अड्डा  
बणाऊ सा। 47 यीशु हर रोज़ मन्दिरा ना  
उपदेश दैंदै लागै। मुखिया पुजारी, धर्म  
गुरु, होर कई नेते तिन्हा बै खैत्म करनै  
री स्कीम बणादैं लागै। 48 पर तिन्हा बै  
एण्डा करनै रा मौका नी मिलू किबैकि  
यीशु जे बोला ती लोका तिन्हरी हर  
गैला बै बड़े ध्यानै सँधै शुणा ती।

**यीशु रै हका पैंधे प्रश्न**

मती 21:23-27, मरकुस 11:27-33)

**20** 1 यीशु एक रोज़ मन्दिरा ना  
परमेश्वरै रे बारै ना दसदैं लागै  
ती ता मुखिय पुजारी यहूदी, धर्म-गुरु  
होर बुजुर्ग यहूदी नेते तिन्हा हागै आऐ।  
2 ते यीशु ना पुछदैं लागै। “तू आसा बै  
एसा गल दैस कि तू इन्हा कोम कुणी  
हका सँधै केरा सा, ऐ सब किछ करनै रा  
हक तौभै कुणियै धिना?” 3 यीशुए तिन्हा  
बै जबाव धिना, “हाँऊ बी तुसा ना एक  
स्वाल पुछा सा पहलै मुभै तैई स्वाला  
रा जबाव दसा, 4 यूहन्ना बै बपतिस्मा

देणै रा हक स्वर्गा ना मिलू ती कि  
माणहु ना? 5 यीशु री ऐ गल्ल शुणिया ते  
आपु ना सोच-विचार केरदैं लगै, “अगर  
आसै स्वर्गा ना बोललै ता एई आसा  
बै बोलणा, तैबै तुसै यूहन्ना पैंधे बशाह  
किबै नी केरू? 6 होर अगर आसै बोलू  
कि माणहु री तरफा ना ता लोका आसा  
पैंधे पाथरै बाहणी किबैकि ते यूहन्ना  
बै भविष्यवक्ता मना ती। 7 तैबै तिन्है  
बोलू, “आसै नी ज़ाणदैं कि यूहन्ना बै  
बपतिस्मै देणै रा हक कौखना मिलू।”  
8 यीशुए बी तिन्हा बै बोलू, “ज़ाआत्  
हाँऊ बी तुसा बै नी दसदा कि हाँऊ इन्हा  
कोमा कुणी हका सँधै केरा सा।”

**दुष्ट किसाना रा उदाहरण**

(मती 21:33-46, मरकुस 12:1-12)

9 तैबै यीशु लोका बै एक कैथ दैसदैं  
लागै: एकी माणहुए अँगूरा रा बगीचा  
लाऊ होर स ठेकै पैंधे धिना होर आपु  
खासी साला बै दूरा देशा बै नौठा।  
10 जैबै अँगूरा बै कड्डा करनै रा बौक्त  
आऊ ता तेई माणहुए आपणा एक नोकर  
तिन्हा अँगूरा रा हिस्सा मुँगणै री तेंडयै  
भेजू पर तिन्है ठेकदारै स नोकर मारी  
पिटिया खाली हौथ वापस भेजू। 11 तैबै  
तेई माणहुए आपणा दुजा नोकर भेजू  
पर तिन्है स बी मारी पिटिया खाली  
हौथ वापस भेजू। 12 किछ रोज़ा बाद तेई  
माणहुए आपणा एक होर नोकर भेजू कि  
स ज़ाइया मालका रा हिस्सा आणला  
पर तिन्है स बी घायल केरिया वापस  
भेजू। 13 तैबै स बगीचै रा मालक सोचदा  
लागा कि ऐबै हाँऊ की केरनू? मूँ ऐबै  
आपणा प्यारा बेटा भेजणा शायद ते  
एइरी कद्र केरलै। 14 पर ते ठेकदार तेई

बेटे बै हेरिया ऐण्डा बोलदें लागै, हेरा ऐ ता एई बगीचै रा वारिस सा एजा आसा ऐ मिलिया मकाणा होर ऐ बगीचा म्हारा होणा। <sup>15</sup> तैबै तिन्है स मालका रा शोहरू शगीटिया तैई बगीचै ना बाहरै नेऊ होर मकाऊ। यीशुऐ बोलू, तुसै की सोचा सी, ऐबै तेई बगीचै रै मालका तिन्हा सेंधे की केरना? <sup>16</sup> ऐबै तेई मालका एणा होर ते ठेकेदार मकाणै होर ठेका छुड़ाइया होरी बै देणा। तैबै शुणनु आ ऐ लोके बोलू, “ओ परमेश्वरा” ऐण्डा कैदी नी लोड़ी हुआ। <sup>17</sup> यीशुऐ तिन्हा धराबै भाइया बोलू, “पवित्र शास्त्रा ना ऐ की लिखू सा कि जुणी पाथरा बै राज मिस्त्रिऐ नक्कमा बोलू ती सौहै पाथर ऐबै कुणै रा पाथर बैणू। <sup>18</sup> जुणु एई पाथरा सेंधे भीड़िला तेईरै बुरै हाल होणै होर जुणी पेंधे ऐ पाथर शौदला तेई पिठै साही पिशिणा।

### रोमी सरकारा बै कर देणा

(मती 22:15-22, मरकुस 12:13-17)

<sup>19</sup> महापुजारी होर धर्मविधि ज्ञाणनु आल्लै जैबै ऐ उदाहरण शुणू ता ते यीशु बै ढौकणा चाहा ती, किबैकि तिन्हा बै पता लागा कि जे गैला प्रभु यीशु केरदें लागै सी ते तिन्हैरै बारै ना सी पर ते लोका ना डौरा ती। <sup>20</sup> तैबै ते यीशु बै ढौकणै रा मौका तोपदें लागै, होर तिन्है आपणै जासूस यीशु हागगै भेजै, ताकि ते यीशु बै तेई री गैला ना फ़सालै होर तेइरी शिकायत रोमी सरकारै रै राज्यपाला हागगै केरलै ताकि स प्रभु यीशु बै ढौकिया जेला ना पाला। <sup>21</sup> तिन्है यीशु बै बोलू, “आसै ज्ञाणा सी कि तुसै ठीक-ठीक बोला सी होर सिखा

सी होर कौसी री तरफ़दारी नी केरदें। तुसै सच्चाई सेंधे परमेश्वरै री गैला सीखाआ सी। <sup>22</sup> आसा बै दैसा कि रोमी सरकारा बै कर देणा ठीक सा कि नी किबै कि आसै ता यहूदी सी?” <sup>23</sup> यीशुऐ तिन्हरी चलाकी ज्ञाणी होर तिन्हा ना एक सिक्का मुँगू, <sup>24</sup> होर बोलू, “एई सिक्कै पेंधे कौसरा फोटू होर नाँ सा?” तिन्है बोलू, “एई सिक्कै ना राजा रा फोटू होर नाँ सा।” <sup>25</sup> यीशुऐ तिन्हा बै बोलू, “तैबै ठीक सा, जे राजै रा सा तेई राजै बै दैआत् होर जे परमेश्वरा रा सा तेई परमेश्वरा बै दैआत्।” <sup>26</sup> ते जासूस यीशु बै नी फ़साई सकै बल्कि प्रभु यीशु रै जवाब शुणिया हैरान हुऐ।

### पुनरूत्थान होर ब्याह

(मती 22:23-33, मरकुस 12:18-27)

<sup>27</sup> तैबै किछ सद्की जे बोला सी कि मुँएदें रा जिंदा होणा नी आँथी, तौखे ऐजिया पुछदें लागै। <sup>28</sup> ओ गुरु जी, “मूसै आसा बै ऐ विधि दैसी सा कि अगर कोई माण्हू मोरला होर तेइरी लाड़ी जिंदी सा पर तेइरी कोई लुआद नी होली ता तेइरा भाई तेसा विधवा सेंधे ब्याह केरिया तेसा सेंधे लुआद पैदा केरला होर पहला बच्चा तेइरै भाई रा वारिस होणा। <sup>29</sup> ऐण्डे सौत भाई ती। सैभी ना बैडै भाई रा ब्याह हुआ होर बगैर लुआदी रै मुँआ। <sup>30</sup> तैबै तेइरे होछै भाइयै तेसा विधवा सेंधे ब्याह केरू होर स बी बगैर लुआदी रै मुँआ। <sup>31</sup> एकी ना बाद एक, एकी ना बाद एक ऐण्डे तैरहै तिन्है सौत भाइयै तेसा विधवा सेंधे ब्याह केरू पर ते सैभै बगैर लुआदी रै मुँए। <sup>32</sup> किछ बौक्ता

बाद स विधवा बी मुँई। <sup>33</sup>ऐबै आसा बै एसा गल दैसा कि जैबै ते सारै भी जिन्दै होलै ता स कौसरी लाडी होणी? किबैकि तिन्है सौत भाइयै तेसा सधै ब्याह केरु ती। <sup>34</sup>तैबै यीशुए तिन्हा बै बोलू, “ब्याह शादी ता ऐसा धोरती पेंधलै माणहु री तेंईए सा।” <sup>35</sup>पर तेई बौक्तै जे मूँएँदै ना जिन्दै होलै तिन्हा ना कोई शादी-ब्याह नी होणा होर ना कोई तौखे ब्याह ना देईणा। <sup>36</sup>ना तिन्हा मौरना किबैकि तिन्हा स्वर्गदूता साही होणा। दोबारा जिन्दै होणै सेंधे ते परमेश्वरै रै बेटे सी। <sup>37</sup>मुएँदै जिन्दै होणै री गैला मुसै भविष्यवक्तै रीहाई होर तेईए बोलू, “प्रभु इब्राहीमै रा, इसहाकै रा होर याकूबा रा परमेश्वर सा। <sup>38</sup>परमेश्वर मुँएँदै रा नी पर जिंदै माणहु रा परमेश्वर सा। परमेश्वरा भेटी सब माणहु जिंदै सी। <sup>39</sup>किछ यहूदी धर्म-गुरूए बोलू, “गुरु जी तुसै सही बोलू।” <sup>40</sup>तैथा ना बाद कोई बी माणहुए प्रभु यीशु ना स्वाल पुछणै री हिम्मत नी केरी।

### मसीह कौसरा बेटा सा

(मती 22:41-46, मरकुस 12:35-37)

<sup>41</sup>यीशुए तिन्हा ना पुछू, “मसीह बै दाऊदा रा बेटा किबै बोला सी?” <sup>42</sup>किबैकि भजन संहिता री कताबा ना दाऊदै आपु बोलू, “प्रभुए मेरै प्रभु बै बोलू मेरी दैहिणी धिरे बेश” <sup>43</sup>जैबै तेंई हाँऊ तैरे दुश्मना बै तेरी जौंघा हेठे नी केरनु। <sup>44</sup>अगर दाऊद मसीहा बै प्रभु बोला सा ता मसीह दाऊदै री सन्तान केन्टै होई सका सा? <sup>45</sup>जैबै लोका इन्हा गैला बै शुणदै लागै ती तैबै यीशुए आपणै चेलै बै

बोलू, <sup>46</sup>इन्हा यहूदी धर्म-गुरु ना बचिया रौहित्। किबैकि इन्हा बै लोमे-लोमे झिकडै लाईया बज़ारा ना घुमणा शोभला लागा सा ताकि लोका इन्हा बै म्हाराज केरलै। ते प्रार्थना सभा ना सैभि ना शोभली जगह पेंधे बैशणै री इच्छा रखा सी। <sup>47</sup>ते बडी बैशर्मो सेंधे विधवै रै घौरा बै लूटा सी होर रिहाणै री तेंईयै बडी लोमी-लोमी अर्जा केरा सी। एसा वज़ह ना तिन्हा बै ज़ादा सज़ा मिलणी।

### गरीब विधवा रा दान

(मरकुस 12:41-44)

**21** <sup>1</sup>यीशु सेठ माणहु बै मन्दिरा ना दान देंदै हेरदै लागै दै ती। <sup>2</sup>तेई बौक्तै तौखे एक विधवा बेटडी आई होर तेसै ताँबै रै दूई ढैबुए दान धिनै। <sup>3</sup>तैबै यीशुए बोलू, “हाँऊ तुसा बै सच बोला सा कि एसे गरीब विधवै सैभी ना ज़ादा दान धिना।” <sup>4</sup>किबैकि इन्है सैभिये आपणी बोहू कमाई ना दान धिना पर एसे विधवै आपणी गरीबी ना बी आपणी सारी कमाई धिनी।

### मन्दिरै रै बारै ना भविष्यवाणी

(मती 24:1-2, मरकुस 13:1-2)

<sup>5</sup>जैबै लोका मन्दिरै रै बारै ना गैला केरदै लागै दै ती कि ए मन्दिर केण्टै शोभलै-शोभलै पाथर होर दान केरुईदी चिज़ा सेंधे सज़ाऊदा सा तैबै यीशुए बोलू, <sup>6</sup>“स बौक्त एँदा लागा सा जैबै सब चीज़ा खैत्म होणी होर एई मन्दिरा रा एक बी पाथर दूजै पाथरा पेंधे नी रौहणा।”

### मुसीबत होर दुःख तकलीफ

(मती 24:3-14, मरकुस 13:3-13)

7 चेलै यीशु ना पुछू, “ओ प्रभु जी इन्हा सैभी गैला कैबे होणा? होर तेई बौक्तै री की निशाणी होणी?” 8 यीशुए तिन्हा बै बोलू, “होशियार रौहात् किबैकि बोहू लोका मेरै नाँ ना एणा होर बोलणा कि हाँऊ मसीह सा, सैंधै ऐ बी बोलणा कि बौक्त आऊ सा। पर तुसै तिन्हरी गैला पैंधै बशाह हेरीत् केरदे। 9 तुसै लड़ाई-झगड़ाई री गैला शुणिया घबराँदें हेरीत् किबैकि इन्हा गैला रा होणा जरूरी सा पर तेई बौक्तै एकदम दुनिया खैत्म नी होणी। 10 यीशुए बोलू, “देशा देशा ना होर ज़ाति ज़ाति ना लड़ाई होणी। 11 ज़ैगा ज़ैगा ज़ौज़री होणी, होर रूड पौड़नी होर कैई किस्मै री बिमारी फैलणी, सर्गा ना डराणु आए चिन्ह चमत्कार होणै। 12 पर इन्हा सैभी गैला न पहलै तिन्हा मेरै नाँ री वजह सैंधै तुसा पैंधै जुल्म केरनै होर तुसै ढौकिया जेला ना पाणै होर बड़ै-बड़ै साहबै रै हौथा ना देंगै। 13 तैबै तुसा बै मेरै बारै ना गवाही देणै रा मौका मिलणा। 14 जे दोष ते तुसा पैंधै लालै तिन्हा दोषा ना बचणै री तेंडयैं तुसै फिक्र मता केरदे। 15 किबैकि मूँ तुसा बै ऐण्ठी बुद्धि होर समझ देणी कि कोई बी वरोधी तुसरै गैला बै नी काटी सकदा। 16 तुसरै आमा-बापू, भाई-बैंहण, रिशतैदार होर तुसरै सैंधी तुसै ढौकणै द्याणै होर तुसा मौझै ना किछ मकाणै। 17 मेरी वजहा ना लोका तुसा सैंधै बैर रखणा। 18 पर ते तुसरा किछ नी बिगाड़ी सकदै। 19 इन्हा

सैभी गैला बै सहन केरिया तुसै आपणी ज़ानी बै बचाई सका सी।

### यरुशलेमै रै नाश हौणै री भविष्यवाणी

(मती 24:15-21, मरकुस 13:14-19)

20 जेबे तुसै यरुशलेम शैहरा बै फोऊजियै लाइया धिरू दा हेरलै ता समझेईत् कि एडरा नाश नेड सा। 21 तेई बौक्तै जे तुसै यहुदिया जिलै ना सी ढौगा बै जाईत् होर जे तुसै यरुशलेमा ना सी तौखना भैगेईत् होर जे तुसै गाँ ना बाहरै सी गाँ आन्धै हेरीत् एँदे। 22 किबैकि ते बदला लेणे रै ऐण्ठे ध्याडै सी, जुणि बौक्तै धर्मशास्त्रा ना लिखुईदी सारी गैला पूरी होणी। 23 सुज्दी होर दुध प्याँणू आई बेटड़ी पैंधै तिन्हा ध्याडै ना बड़ी भारी दुःख मुसीबत एणू आई सा किबैकि ते ढौगा बै नी भैगी सकदी। एसा धौरती पैंधै होर यहूदी लोका पैंधै बड़ी मुसीबत एणू आई सा होर इन्हा लोका पैंधै परमेश्वरै री झिक होणी। 24 ते बड़ी बेरहमी सैंधै तलवारियै लाइया मारिनै होर यरुशलेमा ना दुजै देशै रै लोका ज़ीतणा होर स ताँ तक गुलामी ना रखणा ज़ाँ तक होरी ज़ाति रा बौक्त पूरा नी होला।

### माण्हू रै बेटै रा दबारा एणा

(मती 24:29-31, मरकुस 13:24-27)

25 सर्गा ना नोखै-नोखै चिन्ह चमत्कार होणै। ज़ोथ, सूरज होर तारै ना कई किस्मै रै चिन्ह चमत्कार हेरिनै होर धौरती पैंधलै सैभी देशै रै लोका पैंधै मुसीबता एणी होर तिन्हा समुद्रै री छेड़ी ना डौरना। 26 दुनिया ना एणू आई सैभी विपता हेरिया लोका आपणी हिम्मत

हारनी किबैकि तेई बौकतै सर्गे री सारी शक्ति हिलाइणी। <sup>27</sup> तैबै लोका ना माण्हू रा बेटा बड़ी सामर्थ होर महिमा सँधे बादाआ ना एँदे हेरिना। <sup>28</sup> जैबै ए सारी गैला होंदी लागली ता तुसै सिधे खडै होईया सर्गा धिरा बै हेरीत्, किबैकि तेई बौकतै तुसरा उद्धार नेइ सा।

### अँजीरै रै बूटै रा उदहरण

(मती 24:32-35, मरकुस 13:28-31)

<sup>29</sup> यीशुए तिन्हा बै एक उदाहरण दसू, अँजीरै रै बूटै बै होर दुजै इन्हा बूटै बै हेरा। <sup>30</sup> जैबै तिन्हरै नौँऊरे पौचा निकला सी तैबै ता तुसा बै पता चला सा कि गर्मी नेइ सा। <sup>31</sup> ठीक ऐण्ठी तैरहै जे गैला में तुसा बै दसी दी सी तिन्हा बै होन्दै हेरलै ता तुसै बुझीत् कि परमेश्वरा रा राज्य नेइ सा। <sup>32</sup> हाँऊ तुसा बै सच बोला सा जैबै तक ए सारी गैला पुरी नी होली तैबै तक ऐई जुगा रा अंत नी होणा। <sup>33</sup> धौरती आपणी जगह ना हिली सका सा, सर्ग भी आपणी जगह ना हिली सका सा पर जे गैला में दुणी सी ते सदा कायम रौहणी।

### जागदैं होर प्रार्थना केरदैं रौहा

(मती 24:36-44, मरकुस 13:32-37)

<sup>34</sup> आपणा ध्यान रखा, तुसरा ध्यान दुनियै रै खाणै पिणै होर जिन्दगी री मौज मस्ति ना नी लोड़ी भटकु, होर स ध्याड़ा तुसा पँधे चानक फांसी रै फन्दै साही ऐला। <sup>35</sup> जेतरे भी एसा धौरती पँधे सी तिन्हा पँधे तेई ध्याड़ै जरूरी एणा। <sup>36</sup> हमेशा जागदैं होर प्रार्थना केरदैं रौहा।

अगर होई सका सा ता आपणै आपु बै एतरा मज़बूत बणात् कि तुसै इन्हा डराणु आई गैला ना बची सकलै होर माण्हू रै बेटे सामनै खडै होणै लायक बणी सकलै। <sup>37</sup> यीशु ध्याड़ी ता मन्दिरा न उपदेश देआ ती पर सोन्हा जैतून ढौगा पँधे प्रार्थना केरदैं जा ती। <sup>38</sup> हर रोज दोती-दोती बोहु सारै लोका प्रभु यीशु री गैला शुणने री तैँइयै मन्दिरा ना कद्दा होआ ती।

### यीशु बै ढौकणै री स्कीम

(मती 26:1-5, मरकुस 14:1-2, यहुन्ना 11:45-53)

**22** <sup>1</sup> यहूदी रा अखमीरी रोटी रा साजा जुणीबै फसह बोला सी स नेइ ती। <sup>2</sup> तेई बौकतै मुख्य पुजारी होर धर्मगुरु यीशु बै ढौकणै होर मारनै री सलाह केरदैं लागै दै ती पर ते लोका ना डौरा ती।

### यहुदा रा विश्वासघात

(मती 26:14-16, मरकुस 14:10-11)

<sup>3</sup> तैबै यहूदा इस्करियोति जो कि यीशु रा एक चेला ती तेई आन्धे ना शैतानी विचार जागै। <sup>4</sup> यहूदा इस्करियोति मुख्य पुजारी होर पौहरैदारै रै प्रधाना सँधे मिलु होर बोलू हाँऊ तुसा बै दसा सा कि तुसै यीशु बै कैण्ठे ढौकी सका सी। <sup>5</sup> यहूदैं री मज़ती पाइया ते बोहु खुश हुए होर तेइबै इनाम देणै रा वायदा केरू। <sup>6</sup> यहूदैं तिन्हरी गल मैनी होर स मौकै तोपदा लागा कि कैबै भीड़ै रै लोका कम होलै होर प्रभु यीशु बै ढौकणै द्याला।



यीशु रा आखरी भोज (22:19)

### यीशु रा चले सँधे आखरि भोज

(मती 26:17-25, मरकुस

14:12-21, यूहन्ना 13:21-30)

7 तैबे अखमीरी रोटी री साज़े रा ध्याड़ा आऊ, होर तेई ध्याड़े ना एकि छेलू री बाँई जरूरी देणी पौड़ा ती।  
 8 यीशुए पतरस होर यूहन्ना बै बोलू, “आगै जाईया आसरी तैँईए भोज त्यार केरा कि आसे सँधे बेशिया भोज खालै।”  
 9 चलै यीशु ना पुछू, “तुसै आसा बै तेसा जैगा दैसात् जौखै आसे भोज त्यार केरी सका सी।” 10 यीशुए चलै बै बोलू, “जैबे तुसै यरूशलेमा ना पुजलै, ता तौखै तुसा बै पाणी रै भाण्डै लेइया एक माणहु मिलणा। जुणी घौरा बै स जाला तुसै बी तेई पिछे तेही घौरा बै जाईत्।”  
 11 होर तौखै तेई घौरा रै मालका ना पुछीत्, गुरु जी ए तुसाबै बोलू सा, कि पाहुणै रा कमरा कुण सा, जौखै हाँऊ आपणै चले सँधे फसह रै साज़े रा भोज करनू? 12 तेई माणहु तुसै शिद्दीयै झाँऊ चाऊड़ी पँधे बै नेणै तौखै तेई तुसा बै सजा-सजाऊदा कमरा रिहाणा। तौखै तुसै फसह रा भोज त्यार केरेईत्। 13 तैबे चलै तेई शैहरा धिराबै नौठै, होर ज़ेण्डा प्रभु

यीशुए बोलू ती, तिन्हा बै सब किछ तैण्डा मिलू, तैबे तिन्है फसह रा भोज त्यार केरू। 14 जैबे ठीक बाँकत आऊ तैबे प्रभु यीशु आपणै बारा चले सँधे एकी मेज़ा पँधे फसह रा भोज केरदै बठै। 15 होर यीशुए तिन्हाबै बोलू कि मेरी बड़ी इच्छा ती कि दुःख चैकणै न पहलै हाँऊ तुसा सँधे फसह रा ए भोज केरनू। 16 किबैकि हाँऊ तुसाबै बोला सा कि जाँ तक परमेश्वरै रै राज्य न फसह रै साज़े रा मकसद पूरा नी होला, ताँ तक मूँ ए भोज कदी नी खाणा। 17 तैबे यीशुए अँगूरै रै रस्सा रा कटोरा चैकु होर धन्यावाद देईया चलै बै धिना होर बोलू, एई कटोरै बै आपु ना बोण्डा। 18 किबैकि औजा ना बाद, जाँ तक परमेश्वरा रा राज्य नी ऐला ताँ तक मूँ कदी बी ए अँगूरै रा रस्स नी पीणा। 19 तैबे यीशुए रोटी चैकी होर परमेश्वरा रा धन्यवाद देईया रोटी चोड़ी होर चले बै दँदी घेरै बोलू, ए मेरी देह सा जो तुसरी तैँईयै देणी लाई सा, मेरी यादी ना एण्डा केरदै रोईत्। 20 तैबे यीशुए अँगूरै रै रसा रा कटोरा हाँथा ना चैकु होर बोलू, ए कटोरा मेरै खून बहाणै रै वायदे री निशाणी सा, जुण तुसरी तैँईए बहाईणा। 21 पर हेरा, मुबै धोखा दैणु आ बी मूँ सँधे फसह रा भोज केरदा लागा सा। 22 माणहु रै बेटै रा मौरना ता परमेश्वरै री योजना ना पक्का सा, पर जुण माणहु मुबै धोखा दँदा लागा दा सा तेई पँधे भारी क्लेश ऐणा। 23 एसा गैला बै शुणीया चलै आपु ना स्वाल पुछदै लागै, आसा मौँझै ऐण्डा कुण होई सका सा?

### बड़ा कुण सा

24 चेलै आपु ना एसा गैला पिछे बैहस केरदै लागै कि आसा मुँझै बड़ा कुण सा। 25 पर यिशुए चेलै बै बोलू, एसा दुनियै रे राजा होर बड़ै-बड़ै नेता लोका पँधै आपणा अधिकार रखा सी होर बोला सी कि आसै तुसरै सँधी होर तुसाबै बचाणु आये सी। 26 पर तुसै ऐण्डै नी अँथी तुसा मौँझै जुण सैभी ना बड़ा सा स सैभी ना होछा बणला होर जुण प्रधान सा स सेवका साही बणला। 27 किबैकि बड़ा कुण सा, स जुण खाँदा लागा सा या जुण बाँण्डदा लागा दा सा? बड़ा स सा जुण खाँदा लागा दा सा पर हाँऊ तुसा मौँझै सेवका साही सा। 28 तुसै मेरी हर दुःख तकलीपा ना मेरा सँघ धिना। 29 हाँऊ बी तुसा बै एक राज्य देआ सा ज़ेण्डा कि मैरे पिता परमेश्वरै मुँबै धिना सा। 30 कि तुसै मुँ सँधै तेई राज्य न मेरी मेज़ा पैन्दै खा-पिया होर तुसा सिंहासना पँधै बैशिया इस्त्राइलै री बारा जाति रा न्याय केरना।

### पतरसै रे नाँह केरने री भविष्यवाणी

(मती 26:32-35; मरकुस 14:27-31; यहन्ना 13:36-38)

31 यीशुए शमौन-पतरसा बै बोलू, शमौन, हे शमौन, हेर शैतानै तुसै सब परखणै री तैईए छाँटे दै सी, कि जैण्डा गेहूँ ना भूज अलग केरा सी तैण्डै शैताना तूसै अलग केरनै। 32 यीशुए बोलू, हे पतरस, हाँऊ तेरी तैईए प्रार्थना केरी सा कि तेरा बशाह खत्म नी लोड़ी हुआ


होर ज़बै तु वापस एला ता आपणै सँधी भाई बै मज़बूत केरी। 33 पर पतरसै बोलू, “ओ प्रभु जी, हाँऊ तुसा सँधै ज़ेल ज़ाणै होर तुसा सँधै मौरनै री तैँइयै त्यार सा।” 34 यीशुए तेइबै बोलू, “पतरस, हाँऊ तौभै बोला सा, कि जैबै तक तू त्रा बार मेरा नाँह नी केरला की हाँऊ तौभै नी ज़ाणदा, तैबै तक मुर्गे बांग नी देंगी।” 35 तैबै यीशुए चेलै ना पुछू, “जैबै में तुसै बगैर बटुए, बैगा बगैर होर बगैर जूतै भेजे कि तैबै तुसा बै कौसी चीज़े री कमी हुई?” तिन्है बोलू, आसाबै कौसी चीज़े री कमी नी हुई। 36 तैबै यीशुए बोलू पर एबै आपू सँधै झोआ होर बटुए रैखात। होर अगर कोई हागँ तलवार नी आथी ता स आपणै झीकड़ै बेचिया आपणी तैँइयै तलवार लेला। 37 हाँऊ तुसाबै बोला सा, जे लिखू सा कि स अपराधी सँधै गिणुआ तेइरा मुँ ना पूरा होणा जरूरी सा। भविष्यवक्तै मैरे बारै ना जे लिखू दा सा ते सब गैला पूरी होणु आई सी।” 38 चेलै बोलू, “ओ प्रभु जी, हेरा औखै दुई तलवारी सी।” प्रभु यीशुए तिन्हा बै बोलू, काफी सी।

### यीशु ज़ैतून नां रे ढौगा पान्धै प्रार्थना केरा सी


(मती 26:31-35; मरकुस 14:32-42)

39 यीशु तेइ कमरै ना बाहरै निकतै होर पहले साही ज़ैतून नाँ रे ढौगा पाँधै नौँठे। तिन्हरै चेलै बी तिन्हा पिछे नौँठे। 40 तौखै पुजिया यीशुए तिन्हाबै बोलू, प्रार्थना केरदै रोहा, कि तुसै परीक्षा ना नी पोए लोड़ी। 41 ते चेलै ना थोड़ी दूर नौँठे,





यीशु प्रार्थना केरा सा (22:41)



यहूदा इस्करयोति यीशु बै ढौकणें द्या सा (22:48)

होर घुटनै टेकिया प्रार्थना केरदै लागै।  
 42 "हे स्वर्गें रे बापु, अगर तुसै चाहा  
 सी ता ऐइ प्यालै बै मूँ ना दूर केरात,  
 तैबै बी मेरी नी पर तुसरी इच्छा पुरी  
 लोड़ी हुई।" 43 तैबै स्वर्गा ना परमेश्वरा  
 रा एक दूत प्रगट हुआ, होर तेइयै यीशु  
 बै शक्ति धिनी। 44 यीशु बड़ै व्याकुल  
 होइया प्रार्थना केरदै लागै। तिन्हरी आत्मै  
 री बेदना एतरी बैढी की तिन्हरा पसीना  
 धोरती पेंधे लोहु बैणिया चुडदा लाग़ा।  
 45 तैबै ते प्रार्थना ना उठै होर आपणै  
 चलै हागगै आए तिन्है आपणै चलै सुतै  
 दे हेरै किबैकि ते थके दे होर उदास ती।  
 46 यीशुए तिन्हा बै बोलू, "तुसै किबै सोंदै  
 लागै दै सी ? उठा होर प्रार्थना केरा,

काँइछै ऐण्डा नी लोड़ी हुआ कि तुसै  
 परीक्षा ना पौड़लै।" 47 जैबै बोलदै लागै  
 ती, तैबै लोके री एक बड़ी भीड़ तौखै  
 पुजी। तिन्हा बारा चलै ना एक जुणी रा  
 ना यहूदा ती, स भीड़ा ना आगै-आगै  
 ओंढदा लाग़ा ती। यहूदा प्रभु बै माँकी  
 दैणै री तैइयै तिन्हा भेटी आऊ। 48 तैबै  
 यीशुए तेइबै बोलू, "ओ यहूदा तू कि  
 एक माँकी लेइया मुँबै ढौकणें द्या सा?"  
 49 जैबै तेइरै सेंघियै हेरू कि किच्छ होंदा  
 लाग़ा सा ता तिन्है बोलू, " हे प्रभु जी  
 कि आसा इना सेंघे लड़ाई केरनी? आसै  
 आपणी तलवारी सेंघे आणी सी।" 50 तैबै  
 तिन्हा मौँझे ना एकियै आपणी तलवार  
 मुखया पुजारी रे नोकरा पेंधे चलाई होर  
 तेइरा दैहीणा कोन काटू। 51 पर प्रभुए  
 बोलू, "बस ऐबै काफी हुआ।" तैबै प्रभुए  
 तेई माणहु रा कोन छुँगू होर तेइरा कोन  
 ठीक हुआ। 52 तैबै यीशुए मन्दिरै रे  
 पुजारी, धर्मगुरु होर बुजर्ग नेता जुण  
 प्रभु यीशु बै ढौकदै आए ती बोलू, तुसा  
 बै हाँऊ कि कोई डाकू लाग़ा सा, जो  
 तुसै मुँबै तलवारी होर शौंठे पाईया  
 ढौकदै आए सी? 53 तुसै हाँऊ मन्दिरा  
 ना किबै नी ढौकु, तौखै ता हाँऊ रोज़  
 ऐजा ती होर तुसै बी तौखै होआ ती!  
 पर ऐ बौक्त तुसरा सा, बल्कि निहारै रे  
 राज्य रा बौक्त सा। 54 तैबै तिन्है यीशु  
 ढौंकिरे मुखया पुजारी हागगै बै नेरे।  
 पतरस दूर-दूर तिन्हा पिछै ओंढदा लाग़ा  
 ती। 55 होर ते पौहरैदार खौआ ना ओंग  
 पकेईया चारै पासै बेठे होर पतरस बी  
 तिन्हा मौँझे बेठा। 56 ऐकि दासीए ओंगी  
 रे पयाशै ना पतरसा बै हेरिया बोलू, ऐ  
 माणहु बी ता यीशु सेंघे ती। 57 पतरसै

तेसा बैटड़ी बै बोलू, हाँऊ ता प्रभु यीशु बै पछियाणदा बी नी आथी। <sup>58</sup>थोड़ी देरी ना एकि होरि माणहुए पतरसा बै हेरिया बोलू, तु बी ता प्रभु यीशु सेंधे ती! <sup>59</sup>थोड़ी देर बाद होरि माणहुए बोलू, तु बी पक्का यीशु सेंधे ती किबैकि तू बी गलीला रा रौहणु आ सा। <sup>60</sup>पर पतरसै बोलू, “भलै माणहुआ, हाँऊ नी ज़ाणदा कि तू कुणी रै बारै ना बोलदा लागा सा। पतरसै ऐण्डा बोलूए ती कि मुर्गे बाँग धिनी। <sup>61</sup>तैबे यिशुए मुडिया पतरसा धिरै भाऊ, होर पतरसा बै याद आई कि यीशुए बोलू ती, कि औज़ दोती मुर्गे रै बाँग देणै ना पहलै, तौ त्रा घेरै मेरा नाँह केरना कि तू मुँबै नी ज़ाणदा। <sup>62</sup>तैबे पतरस बाहरै नोठा होर जोरै-जोरै रोंदा लागा। <sup>63</sup>जुणी माणहुए यीशु ढाँके ती ते तिन्हारा ठड्डा केरदें लागै होर तिन्हा बै मारदें लागै। <sup>64</sup>तिन्है यीशु री औछी पांधै पट्टी बोनी होर ते मारदें लागै होर तिन्हा ना पुछू, “हे भविष्यवाणी केरनू आलै ऐबे दस कि तैरै कुणियै बाही।” <sup>65</sup>तिन्है बोहु सारी होर भी निंदै री गैला तिन्हारै बारै ना बोली।

### महासभै रै सामनै यीशु

<sup>66</sup>जैबै ध्याड़ा आऊ तैबै यहूदी लोकै रै सभै मुख्य पुज़ारी होर धर्म गुरू कड्डा हुए होर यीशु सभा रै सामनै आपणै। <sup>67</sup>ते यीशु बै बोलदें लागै, “अगर तू मसीह सा, ता आसाबै बोल पर तिन्है उतर धिना, “अगर हाँऊ तुसाबै दैसनू ता तुसा बशाह नी केरना। <sup>68</sup>होर अगर हाँऊ तुसा न पुछनू, ता तुसरै जवाब नी देईणा। <sup>69</sup>पर ऐबै ना बाद माणहु रै बैटे परमेश्वर बापू री दैहिणी धिरै बेशिया


रौहणा। <sup>70</sup>एसा गैला पैंधे तिन्है बोलू, तू की आपणै आपा बै परमेश्वरा रा बेटा बोला सा? यीशुए बोलू, हाँ हाँऊ सा। <sup>71</sup>तैबे तिन्है बोलू, “ऐबे आसा बै गवाही दैणु आए री की जरूरत सा, किबैकि आसै आपु ऐईरै मुँहा ना शुणू।

### पिलातुसै रै सामनै यीशु

(मती 27:1,2,11-14; मरकुस 15:1

-5; यहन्ना 18:28-38)

**23** <sup>1</sup>तैबे सभै रै सारै लोका खेडै हुए होर यीशु पिलातुस राज़ै हागगै नेऊ। <sup>2</sup>ते लोक यीशु पैंधे दोष लादें लागै, कि ऐ माणहु आसरै लोका बै बैहकाँदा लागा सा होर रोमी सरकारा बै कर नी देणै री गैला केरा सा होर आपणै आपा बै मसीह होर राज़ा बोला सा। <sup>3</sup>तैबे पिलातुस राज़ै यीशु ना पुछू, तू की आपणै आपा बै यहूदी रा राज़ा बोला सा? यीशुए बोलू, “तुसै आपै ता बोलदें लागै सी।” <sup>4</sup>एसा गैला पैंधे पिलातुस राज़ै भीड़ा ना खडै लोका बै बोलू, “हाँऊ एई माणहु ना कोई भी दोष नी हेरदा।” <sup>5</sup>राज़ै री गल्ल शुणीया लोका बोलदें लागै, कि गलीला ना लेईया सारै यहूदीया तक ज़ौखै बी ऐ माणहु ज़ा सा तौखै ऐ लोका बै भडकाणै री शिक्षा देआ सा। <sup>6</sup>लोकै री गैला शुणीया पिलातुस राज़ै पुछू, “ कि ऐ माणहु गलीली सा?” <sup>7</sup>जैबै लोकै ओ बोलू, ऐण्डा शुणीए पिलातुस राज़ै यीशु हेरोदेस राज़ै हागगै भेजु किबैकि ऐ लाका हेरोदेस राज़ै हागगै ती जुण तदीकाल यरूशलेमा ना रौहा ती। <sup>8</sup>यीशु बै हेरिया हेरोदेस राज़ा बोहु खुश हुआ किबैकि हेरोदेस बडै रोजा ना यीशु होर तेइरै चमत्कारा बै हेरना चाहा



पिलातुसै यीशु बै क्रूसै री सज़ा  
धिनी (23:24)

ती। <sup>9</sup> हेरोदेस राज़ा यीशु ना बोहु सारी गैला पुछदा रौहू पर यीशुए राज़े बै कोई जवाब नी धिना। <sup>10</sup> तैबे तेई बौकते धर्म गुरु होर पुजारी खडै होइया यीशु पैंधे दोष लादें लागै। <sup>11</sup> तैबे हेरोदेस राज़ा आपणै सपाही सैंधे मिलिया यीशु रा मजाक उड़ाँदा लागा होर यीशु बडै चोगै लाइया वापस पिलातुस राज़े हाग़ै भेजै। <sup>12</sup> हेरोदेस राज़ा होर पिलातुस आपु ना एकी दुजै रै दुश्मन ती तिन्हा ध्याइ ना ते एकी-दुजै रै सैंधी बैणै।

पिलातुस यीशु बै मौउती री सज़ा सुना सा

(मती 27:15-26; मरकुस 15:6

-15; यहुन्ना 18:39—19:16)

<sup>13</sup> तैबे पिलातुसै, धर्म गुरु, यहूदी नेता होर सारै लोका शाधै। <sup>14</sup> पिलातुस राज़े तिन्हा सैंभी बै बोलू, तुसै ऐई माणहु बै लोका बै भडकाणु आ बोला सी, पर में तुसा सामनै एडरी शोभली तरहें जाँच केरी, होर में ऐई ना ऐण्डा कोई दोष नी हेरू। <sup>15</sup> हेरोदेसै राज़े भी ऐई माणहु ना कोई दोष नी हेरू तैबे ता तेईरे ऐ माणहु आसा हाग़ै भेजू, किबैकि ऐई माणहुए ऐण्डा किछ बी नी केरू कि ऐई

बै मौउती री सज़ा मिलली। <sup>16</sup> मुँ ऐ कोडै लाइया मारिया छौड़ी देणा। <sup>17</sup> हर साल जाचै रै ध्याइ ना पिलातुस राज़े बै एक कैदी छौड़ना पौड़ा ती। <sup>18</sup> तैबे सैंभी लोके मिलिया जोरा सैंधे बोलू, ऐइ माणहु बै मार होर आसरी तेईरे बरअब्बा बै छौड़। <sup>19</sup> बरअब्बा लडाई-झगडै होर खून केरनै रै इल्जामा ना कैद ती।

<sup>20</sup> पिलातुस राज़ा यीशु बै छौडणना चाहा ती, होर तेईरे लोका भी समझाए। <sup>21</sup> पर तै जोरै-जोरै बोलदें लागै कि ऐई माणहु बै क्रूसा पैंधे चढ़ा। <sup>22</sup> तैबे पिलातुस राज़े त्रिजी घेरै तिन्हा बै बोलू, ऐई माणहुए की जुल्म केरू सा, कि ऐईबै मौउती री सज़ा मिलली, मुँ ऐ कोडै मारिया छौड़ी देणा। <sup>23</sup> पर लोका होर भी जोरा सैंधे बोलदें लागै कि ऐइ माणहु बै क्रूस दैआ, ऐईबै क्रूसा पैंधे चढ़ा। <sup>24</sup> पिलातुस राज़े आदेश धिना कि जैण्डा ऐ लोक बोला सी, तैण्डायै ऐई माणहु सैंधे केरा। <sup>25</sup> पिलातुस राज़े तिन्हरी इच्छै रै मुताबिक बरअब्बा नाँ रा स डकू छौडू, होर यीशु तिन्हरे हवालै केरै।

यीशु बै क्रूसा पैंधे चढ़ा सी

(मती 27:32-44; मरकुस 15:21-

32; यहुन्ना 19:17-27)

<sup>26</sup> जैबे ते यीशु बै नेंदें लागै ती, ता तिन्है शमौन नाँ रा एक कुरेनी माणहु जुण ग्राँ ना ऐंदा लागा ती डौकु होर तेई पैंधे क्रूस लादिया यीशु पिछै आँढणै बै बोलू। <sup>27</sup> लोके री बडी भीड तिन्हा पिछै आँढडी लागी ती, जुणी ना बोहु सारी बेटडी यीशु री तेईरे रौंटी लागी ती होर दुःख केरदी लागी ती। <sup>28</sup> यीशुए तिन्हा धिराबै बै हेरिया बोलू, ओ यरूशलेमै री



यीशु बै क्रूसा पेंधे चढ़ा सी (23:33)

बेटियो, मेरी तैँईये मता रोंदी। <sup>29</sup> किबैकि एण्डे ध्याडै ऐँदे लागे सी, जैबे लोका बोलणा, धन्य सी ते जुणा बाँडे सी, होर ते कोख जुणीए बच्चें नी जौणें, होर ते माँई जुणीए दुध नी प्याऊ। <sup>30</sup> तैँई बौकतै लोका दौगा बै बोलणा, आसा पेंधे शौढ होर धारा बै बोलणा कि आसा बै खौट। <sup>31</sup> जैबे लोका होरै बूटै सेंधे ऐण्डा केरा सी ता सोचा तिन्हा शूकै बूटै सेंधे की नी केरना। <sup>32</sup> यीशु सेंधे दुई होर माणहु नेणें लाऐदे ती किबैकि ते डाकू ती होर तिन्हा बै बी मोऊती री सजा हुई ती। <sup>33</sup> जैबे तै खोपड़ी नाँ री जगहा पेंधे पुजै ता तिन्है ते दुऐ डाकू यीशु सेंधे एक देहिणी धिरै होर दुजा बाउई धिरै क्रूसा पेंधे चढ़ाए। <sup>34</sup> तैबै यीशुए बोलू, ओ बापु जी, इन्हा लोका बै माफ केर किबैकि ऐ नी जाणदैं कि ए की केरदैं लागे दै सी? होर तिन्है पर्ची पाईया प्रभु यीशु रै झिकडै बोण्डै। <sup>35</sup> लोका खडै-खडै हेरदैं लागे ती होर तौखे खडै यहूदी अगुवें यीशु रा मजाक उड़ादैं लागे होर बोलदैं लागे, “एइयै होरा ता बचाए अगर ऐ परमेश्वरें भेजुदा मसीह सा होर परमेश्वरा रा चनुआ दा सा ता आपणें आपा बै बी बचाला।” <sup>36</sup> सिपाहिये बी तिन्हरा ठढा


केरु होर पीणें री तैँईयै कइवा दाख रस धिनाँ। <sup>37</sup> अगर तू यहूदी रा राजा सा ता आपणें आपा बै बचा। <sup>38</sup> तिन्है यीशु रें क्रूसा पेंधे एक पौटी टाँगी, जुणी पेंधे ऐ लिखु ती, “ऐ यहूदी रा राजा सा।” <sup>39</sup> जे डाकू यीशु सेंधे क्रूसा पेंधे लटकाए दै ती तिन्हा ना एकीए यीशु री निंदा केरिया बोलू, “कि तू मसीह नी आथी ? तू आपणें आपु बै होर आसाबै बचा।” <sup>40</sup> एता पेंधे दुजै तेई डाकुऐ पहलै तेई डाकू बै बोलू, कि तू परमेश्वरा ना नी डौरदा ? तु बी ता एसा सजा पाँदा लागे सा। <sup>41</sup> आसा बै ता आपणें अपराधै री सही सजा मिलदी लागी सा पर एई माणहुए ता कोई बी अपराध नी केरु दा आँथी। <sup>42</sup> तैबै तेई डाकुऐ बोलू, “हे यीशु जैबे तूसे आपणें राज्य ना एलै ता तैबै मुबे बी याद केरेईत।” <sup>43</sup> यीशुए तेइबै बोलू, “हाँऊ तौभै सच बोला सा त औज्र मुं सेंधे स्वर्ग लोका ना हौणा।”

### यीशु मौरा सा

(मती 27:45-56; मरकुस 15:33-

41; यहुन्ना 19:28-30)

<sup>44</sup> तेई ध्याडै ना बारा बाज्रें ना लेइया त्रा बाज्रें तक सारै देशा ना न्याहरा हुआ। <sup>45</sup> सूरजा रा चमकणा बन्द हुआ होर मन्दिरै रें परदैं रें बीचा ना चिरुइया दुई टुकडै हुऐ। <sup>46</sup> यीशुए जोरा सेंधे बोलू, “ओ बापु जी, हाँऊ आपणी आत्मा तुसरै हौथा ना देआ सा।” होर ऐ बोलिया आपणें प्राण छोडै। <sup>47</sup> सबैदारै ऐ सब किच्छ हेरिया परमेश्वरें री प्रशंसा केरी होर बोलू, “सचै ऐ माणहु धर्मी ती।” <sup>48</sup> जे लोका क्रूसै री सजा हेरनै री तैँईयै कैडा



यीशू जिन्दा होआ सा (24:2)



बेटड़ी होर स्वर्गदूत (24:5)

हुए ती ते ऐ हेरिया छाती पीटदैं-पीटदैं आपणै घौरा बै वापस नौठे। <sup>49</sup>ते सब जे यीशु बै ज्ञाणा ती, होर जे बेटड़ी गलीला ना तेई सँधे आइ ती दूर खडै होइया ऐ सब हेरदी लागी ती।

### यीशु बै कब्रा ना रैखा सी

(मती 27:57-61; मरकुस 15:42-47; यहुन्ना 19:38-42)

<sup>50</sup>तौखे यूसुफ नाँ रा एक मर्द ती स यहुदी महासभा रा एक सदस्य ती। स एक शोभला होर धर्मी मर्द ती। <sup>51</sup>स धर्मगुरु होर राजे रै एई फैसलै ना खुश नी ती आँथी। स यहुदिया रै एकी शहर अरमतियाह रा रौहणु आ ती। स परमेश्वरै रै राज्य री गैला केरदा

रौहा ती। <sup>52</sup>तेइयै पिलातुसा राजे हागँ ज़ाइया यीशु री लाश मुँगी। <sup>53</sup>तेइयै लाश क्रूसा पँधे ना उतारी होर चादरी ना स लपेटी। होर स कब्रा न रैखी, जे चाहड़ा ना कोती दी ती। तेसा कब्रा ना पहलै कोई निती रैखू दा ती। <sup>54</sup>स शुक्रवारा रा ध्याड़ा ती होर बशाँ रा ध्याड़ा शुरू हौणु आ ती। <sup>55</sup>जैबै यीशु री लाश नेणी लाई ती, तैबै तिनहै बेटड़िये जे गलीला ना आई ती पीछे-पीछे ज़ाइया स कब्र हेरी होर ऐ बी हेरू कि लाश केण्डे तरहै रैखी सा। <sup>56</sup>ते आपणै घौरा बै नौठी होर यीशु री लाशा पँधे लाणे री तेइयै शोभली बासा आई चीज़ा त्यार केरी होर विधि रै मुताबिक तिनहै बशाँ रै रोज़ा ना कोई कोम नी केरू।

### यीशु मुँएदें ना जिन्दै होआ सी

(मती 28:1-10, मरकुस 16:1-8, यहुन्ना 20:1-10)

**24** <sup>1</sup>तुआरा बै दोती- दोतीयै ते बेटड़ी जुणीए शोभली बासा आइ चीज़ा त्यार केरी ती ते तिन्हा चीज़ा लेइया कब्रा हागँ आई। <sup>2</sup>तिन्है हेरू की जुणी पाथरा सँधे कब्रा रा द्वार बन्द केरू ती स एकी धिरा बै घूरू दा ती। <sup>3</sup>तैबै ते भीतरै नौठि, पर तिन्हा बै यीशु री लाश नी मिली। <sup>4</sup>ते सोचदी लागी कि यीशु री लाशा बै कि हुआ होला? तैबै तौखे एकदम चमकदै झीकडै आलै दुइ मर्द खडै हुऐ। <sup>5</sup>ते बेटड़ी डौरी होर टुँबड़ी मुण्डी केरिया खैडी रौही। तिन्है तिन्हा बेटड़ी बै बोलू, “तुसै जिन्दै बै मुँएदें ना किबै तोपदी लागी दी सी?” <sup>6</sup>ते औखे नी आथी ते जिन्दै हुऐ दै सी। याद केरा जैबै ते गलीला ना ती, तिन्है तुसाबै कि



दुई चेलें बिचा ना यीशु प्रगट होआ  
सा (24:15)

बोल् ती। <sup>7</sup> ए जरूरी सा कि माणहु रा बेटा पापी रें हौथै ढौकीणा, होर तिन्हा स क्रूस पाँधे चढाणा, पर तेई त्रीजे ध्याडी मुँएदें ना जिन्दै होंगा। <sup>8</sup> तैबे तिन्हा बै ते सारी गैला याद आई, <sup>9</sup> तैबे ते कब्रा हागगै ना वापस आई होर तिन्है ए सब गैला ग्यारा चेलें बै होर सैभी बै दैसी। <sup>10</sup> जुणी बेटडीए चेलें बै ए गैला दैसी, ते मरियम मगदलीनी, योअन्ना, याकूबे री आमा मरियम होर तिन्हा सेंधें होरा बेटडी बी ती। <sup>11</sup> पर चेलें बै तिन्हरी गैला बेकार कैथा साही लागी। तिन्है तिन्हरी गैला रा बशाह नी केरू। <sup>12</sup> पर ए गैला शुणिया पतरस खैडा हुआ होर ठोर देइया कब्रा हागगै पुजू होर तौखै झीकडै केलही हेरें होर जे हुआ ती हैरान होइया आपणें घौरा बै नौठा।

**इम्माऊस री बाँता न यीशु रा प्रगट होणा**

(मरकुस 16:12,13)

<sup>13</sup> एक रोज़ यीशु रें दुई चले इम्माऊस नाँ रें गाँ बै जाँदे लागै ती, जे यरूशलेमा ना सौत मीलै री दुरी पँधे ती। <sup>14</sup> ते इन्ना सब गैला बै जे हुई दी ती गल्ल बात केरदै-केरदै जाँदे लागै ती। <sup>15</sup> जैबै

ते आपु ना गल्ल बात होर पुछ-ताछ केरदै लागै ती तैबे यीशु तौखै प्रगट हुए होर तिन्हा सेंधें औँददै लागै। <sup>16</sup> पर परमेश्वरें जे यीशु बै मैना ती तिन्हरी औँछी ऐण्ठी बँद केरी कि ते यीशु बै नी पछियाणी सकै। <sup>17</sup> यीशुए तिन्हा बै बोलू, “मुँबै लागा सा की तुसै कोई गूढी गप्पा रा वचार केरदै लागै दै सी, ते उदास होइया चुपचाप खैडै रौहै। <sup>18</sup> तिन्हा ना क्लियुपास नाँ रें माणहुए बोलू, “शायद तुसै पैहलै माणहु सी जुणी बै यरूशलेमा री ऐसा घटने रें बारें ना पता नी आँथी।” <sup>19</sup> यीशुए तिन्हा बै बोलू, “कुणा गैला?” तैबे तिन्है बोलू, “ए गैला यीशु नासरी रें बारें ना सी। सौँ एक भविष्यवक्ता ती होर बाँहु चमत्कार केरा ती। सौँ परमेश्वर होर सब माणहु री नजरी ना एक महान् गुरु ती। <sup>20</sup> पर आसरें पूजारीए होर धर्म गुरुए मिलिया तिन्हा पँधे दोष लाऊ होर ते क्रूस पाँधे चढाए। <sup>21</sup> आसै बुझू ती कि ते मसीहा सी होर इस्त्राइला बै आजाद करादे आए सी। इन्हा गैला बै बितिया औँज त्रा ध्याडै हुए। <sup>22</sup> औँज दोती आसरी मण्डली री किछ बैटडी जैबे कब्रा हागगै पुजी ता तिन्है एक नोखी गल्ल हेरी, जुण तिन्है एजीया आसा बै दैसी। <sup>23</sup> तिन्है बेटडीए बोलू कि यीशु री लाश कब्रा ना नी आँथी, होर तिन्है स्वर्गदुत भाए, तिन्है स्वर्गदुतै बेटडी बै बोलू यीशु जिन्दै हुए दै सी। <sup>24</sup> तैबे आसरें कई सेंधी ठोर देइया कब्रा हागगै नौठे होर जैण्डा तिन्है बैटडीए बोलू ती तैण्डाए तिनहै हेरू। <sup>25</sup> तैबे यीशुए तिन्हा दुई लोका बै बोलू, तुसै केतरें मूर्ख माणहु सी, जुणा गैला भविष्यवक्तै लिखी सी तिन्हा पँधे बशाह केरना तुसा



यीशु सैभी चेलै बै दर्शन देआ सा (24:36)

बै केतरा मुशकल हुआ। <sup>26</sup>तुसै नी पौदू कि मसीहा रा दुःख च़ेकणा होर आपणी महीमा ना स्वर्गा बै जाणा जरूरी ती। <sup>27</sup>तैबै यीशुए मूसा ना लेईया सारै भविष्यवक्ता रै बारे ना जे धर्म शास्त्रा ना लिखु ती समझाऊ। <sup>28</sup>जैबै ते तेई याँ ना पुजै जौखै तिन्हा जाणा ती, पर यीशुए तिन्हा सेंघे ऐणढा व्यबाहर केरू जैण्डे कि तिन्हा आगै ज़ाणा ती। <sup>29</sup>पर तिन्है यीशु बै बोलू कि औज औखे रोहा किबैकि ध्याड़ा ओउडू सा होर सोन्ह हुई सा। तैबै यीशु तिन्हा सेंघे भितरै नौठै। <sup>30</sup>जैबै ते रोटी खादें बेठे ता यीशुए रोटी हौथा ना लेईया परमेश्वरा रा धन्यावाद केरू होर रोटी चोड़िया तिन्हा बै धिनी। <sup>31</sup>तैबै च़ानक तिन्हरी ओछी खुली होर तिन्है यीशु पछियाणै, पर ते तिन्हरी नजरी ना राहुरे। <sup>32</sup>तैबै ते आपु ना बोलदैं लागै, “जैबै यीशु आसा बै बौता ना धर्म शास्त्रा री गैला समझाँदैं लागै ती, तैबै आसरे मना ना उतेजना पैदा किबै नी हुई?” <sup>33</sup>तैबै ते उठिया वापस यरूशलेमा बै च़ौलै होर तौखै तिन्हा बै ग्यारा चेलै होर तिन्हरै सेंघी कैद्वै मिलै। <sup>34</sup>ते बोलदैं लागै, “यीशु सचीयै जिन्दै हुएदैं सी होर शैमौना बै हेरुए।” <sup>35</sup>तैबै

तिन्है दुहीयै बोता ना जै किछ तिन्हा सेंघे हुआ ती ते सारी गैला चेलै बै दैसी, होर बोलू कि जैबै तिन्है रोटी च़ोड़ी ता काँण्डे तिन्है यीशु पछियाणै।

### यीशु च़ेलै ना हेरिया सी

(मती 28:16-20; मरकुस 16:14-18;


यहन्ना 20:19-23; प्रेरितो 1:6-8)

<sup>36</sup>ते इन्हा गैला बै केरदैं लागै ती कि यीशु तिन्हा मौँडै ऐजिया खडै हुए। होर तिन्हा बै बोलू, तुसा बै शान्ति मिलै। <sup>37</sup>ते घबराए होर डोरै तिन्है बुझू ए ता कोई भूत सा। <sup>38</sup>तैबै यीशुए तिन्हा बै बोलू, “तुसै किबै घबरा सी होर तुसरे मना ना बशाह किबै नी आथी।” <sup>39</sup>मेरै हौथा-जौंघा बै हेरा हाँऊ कोई भूत नी आथी, मुँबै छुँगीया हेरा किबैकि भूतै रै हाड-मास नी होदा, जैण्डा तुसै मूँ ना हेरा सी। <sup>40</sup>ए बोलिया यीशुए आपणै हौथ-जौंघा रिहाए। <sup>41</sup>चेलै बोहू जादा खुश ती होर हेरान ती तिन्हा बै बशाह नी ती हाँदा लागा कि प्रभु यीशु जिन्दै हुए सी, तैबै प्रभु यीशुए तिन्हा बे बोलू, तुसा हागै खाणै बै किछ सा ? <sup>42</sup>तिन्है प्रभु यीशु बै भुनूँदी मौँछी रा एक टुकड़ा धिना। <sup>43</sup>यीशुए स मौँछी रा टुकड़ा चेलै सामनै खाऊ। <sup>44</sup>यीशुए बोलू, “जैबै हाँऊ तुसा सेंघे ती तैबै मै तुसा बै बोलू ती, कि मूसा होर भविष्यवक्ता री कताबा ना ता भजन संहिता ना जे किछ मेरै बारे ना लिखू सा ते सारी गैला पूरी हौंणी। <sup>45</sup>तैबै प्रभु यीशुए पवित्र शास्त्र सोमझणै री तैइयै तिन्हरी समझ खोली। <sup>46</sup>ए गैला बोहु पहलै लिखी दी सा कि मसीह दुःख च़ेकणा, होर त्रिजै ध्याड़ी मुँएदैं



यीशु स्वर्गा बै ज़ा सा (24:51)

बै आर्शीबाद देंदें-देंदें प्रभु यीशु तिन्हा ना अलग हुऐ, होर स्वर्गा बै नौठै।  
 52 चले प्रभु यीशु री आराधना केरिया यरूशलेम बै बापस आए। 53 इन्हा सैभी गैला ना बाद ते लगातार परमेशवरै री जय-जयकार केरदें रौहें होर आपणा सारा बौक्त मन्दिरा ना गुज़ारदें लागै।



चेलें यीशु री महिमा केरा सी (24:52)

ना जिन्दें होणा। 47 यरूशलेमा ना शुरू केरिया सारें देशा ना मन फेरने होर पापै री माफी रा सुसमाचार प्रचार, तेही रें नाँ ना केरिना। 48 तुसै इन्हा सैभी गैला रें गवाह सी। 49 ऐबै जुण वाईदा परमेशवरै मुबें धिना सा स मुँ तुसा सेंधै पूरा केरना कि ज़ैबें तक पवित्र आत्मा तुसा पेंधे नी उतरला ताँ तक तुसै यरूशलेमा छौड़िया बाहरें मतैइत ज़ादें।

### प्रभु यीशु स्वर्गा बै ज़ा सी

(मरकुस 16:19; 20 प्रेरितो 1:9-11)

50 तैबै प्रभु यीशुऐ आपणै चेलें होर बशाह केरनु आए बैतनिय्याह गाँ ना बाहरें नेऐ। होर आपणै हौथ चैकिया तिन्हा सैभी बै आर्शीबाद धिना। 51 तिन्हा





1. यहून्ना 3:16

परमेश्वरै दुनियै रै लोका सँघै ऐण्डी झुरी केरी कि तेइयै आपणा इकलौता बेटा यीशु मसीह एसा दुनिया ना भेजू कि तेई पेंघै बशाह केरनु आलै हमेशै री जिन्दगी पालै।

2. रोमियो 3:23

एसा दुनिया ना सब पापी सी होर परमेश्वरै री महिमा ना दूर सी।

3. रोमियो 6:23

पाप केरनै री मजदूरी मोऊत सा पर परमेश्वरा रा वरदान यीशु मसीहै रै नाँ ना पापै री माफी होर हमेशै री जिन्दगी सा।

4. यहून्ना 1:12

जुणी बी लोकै यीशु मसीह ग्रहण केरु होर तेई पेंघै बशाह केरु तिन्हा यीशुऐ परमेश्वरै री सन्तान होणै रा हक धिना।

5. 1 कुरन्थि 15:3-4

पवित्र शास्त्रै रै मुताबक यीशु मसीह आसरै पापै री तँइयै क्रूसा पेंघै मूँआ होर पवित्र शास्त्रै रै मुताबक त्रीजै ध्याड़ी जिन्दा बी हुआ।

6. प्रकाशितवाक्य 3:20

हेरा हाँऊ तुसरै दिलै रै दुआरा हाग्ये खड़ा सा। जुण मेरी हाक शुणिया दुआर खोलला ता मूँ तेई हाग्ये भीतरै एणा होर मूँ तेई सँघै रोटी खाणी होर तेई मूँ सँघै।

7. रोमियो 10:13

किबैकि जुण प्रभु रा नाँ लेला तेईबै मुक्ति मिलणी।

*Published by :*

## OPERATION AGAPE

Agape Bhawan, B-XI-1995, Brown Road,  
Ludhiana, Punjab, India. Ph : 0161-2610761, 5002024.

Email : [mail@operationagape.com](mailto:mail@operationagape.com). Web : [www.operationagape.com](http://www.operationagape.com).